

বিশালাক্ষী

উপন্যাস

কলিকাতা, ১ নং বেচারাম চাকুর্ঘোর লেন ~~হট~~

শ্রীরাধানাথ মিত্র দ্বারা

প্রণীত ও প্রকাশিত ।

কলিকাতা

৬ নং ভীমঘোষের লেন, গ্রেট হাউন্স প্রেস,

ইউ, সি, বসু এণ্ড কোম্পানি দ্বারা মুদ্রিত ।

সন ১৩০৬ সাল ।

উৎসর্গ পত্র।

মাননীয়

শ্রীলক্ষ্মীযুক্ত চৌধুরী ব্রজেন্দ্রনাথ দাস মহাপাত্র
মহোদয় সমীপেষু।

প্রিয় বন্ধু!

স্বাথময় ভগতে আদান প্রদান সম্বন্ধে একে অন্বে
মিলিত এবং পরস্পর পরিচিত ও অনুগৃহীত হইলেও মনি-
কাঙ্ক্ষনে কাচের বিনিময় দেখিতে পাওয়া যায়!

যে দিন 'প্রিয় বন্ধু' মধুর বাক্যে সম্ভাষণ করিয়াছেন,
সেই দিনই মনে এক অভিনব অভিলাষ হয়, কিন্তু মনের সাধ
মনেই মিলায়, মানুষের ইচ্ছায় কার্য্য হয় না!

কল্পনার কত দিন পরে "বিশালাক্ষী" প্রকাশ করিলাম।
যাহা জানার, তাহা আপনার আদরের—প্রকৃত বন্ধুত্বের
পরিচয়ই এই।

আমার "বিশালাক্ষী" আপনার কর-কমলে সাদরে অর্পণ
করিলাম। আমাকে যখন প্রীতিচক্ষে দেখেন, বিশালাক্ষীও
সেই আদরে আদরিণী হউক।

কলিকাতা।

১নং বেচারাম চাটুর্ঘ্যের লেন,
১৫ই ভাদ্র, ১৩০৬ সাল।

আপনার

শ্রীরাধানাথ মিত্র।

বিশালাক্ষী

(১)

এক রাজার সম্ভান সম্ভতি কিছুই ছিল না। বৃদ্ধ দশায় অচিরে ইহ সংসার ত্যাগ করিয়া যাইতে হইবে মন ঐশ্বর্য ভোগ করিবার তাঁহার কেহই রহিল না, এই সকল চিন্তায় তিনি মগ্ন হওয়ায়, অতিশয় বিষণ্ণ হইয়া পড়িলেন। পানিত্র সভাসদ্বর্গ তাঁহাকে একরূপ ব্যথিত দেখিয়া সকলেই মহানুভূতি দেখাইল, কিন্তু কিছুতেই তাঁহার শাস্তি লাভ হইল না; তিনি দিনে দিনে শোককাতর হইয়া পড়িলেন। বংশরক্ষার জন্য যোগ যজ্ঞ ক্রিয়া ফলাপাদির পূর্ব হইতেই অনুষ্ঠান হইতেছিল, তাহাও নরপতির মনোরথ পূর্ণ হয় নাই। এখনও আবার লোকের কথায় ক্রিয়াদির উদ্যোগের কোন ক্রটি হইল না।

এক দিবস ভূপতি অন্তঃপুরে একাকী বসিয়া রহিয়াছেন, এমন সময়ে প্রতিহারী আসিয়া সংবাদ দিল যে, একজন জটাজুটধারী সন্ন্যাসী তাঁহার সহিত সাক্ষাৎ উদ্দেশে রাজদ্বারে অপেক্ষা করিতেছেন, রাজা সচরাচর দরবার গৃহে লোকজনের সহিত সাক্ষাৎ করিতেন, তিনি নিৰ্জনে বসিয়া থাকিলে লোকের ভাগ্যে রাজদর্শন সহজে ঘটিত না; প্রতিহারী মুখে সন্ন্যাসীর আগমনবার্তা শ্রবণে, ভূপতি তদগো তপস্বীকে তৎসমীপে লইয়া আসিবার আদেশ করিলেন। সন্ন্যাসী আসিয়া রাজসমীপে আসন পরিগ্রহ করিলেন। রাজার কুশলাদি জিজ্ঞাসা করিয়া তাঁহার মনস্তাপের বিষয় অবগত হইয়া সন্ন্যাসী কথায় কথায় উল্লেখ

করিলেন যে, সুদূরবর্তী বিশাল অরণ্যে এক আশ্রমবৃক্ষের তলদেশে এক ফকীর আছেন। তিনি যথাক্রমে দ্বাদশ বৎসর নিদ্রিত ও দ্বাদশবর্ষ জাগ্রত অবস্থায় থাকেন, তাঁহার নিকট কেহ উপস্থিত হইয়া মনোগত অভিপ্রায় জানাইলে, তিনি বৃক্ষ হইতে আশ্রম ফল লইবার অনুমতি দেন। সেই ফল ভক্ষণে বন্ধা নারী ও পুত্রবতী হইয়া থাকে ; কিন্তু সংসাহসী ব্যতিরেকে এই কার্য অত্যাধিকার সম্পাদিত হইবার নহে। ঐ স্থানে উপনীত হইতে নানাবিধ বিয় বিপত্তির সম্ভাবনা ; প্রায় একশত ক্রোশ ব্যাপিয়া দৈত্য ও পিশাচ মণ্ডলী সেই বনের রক্ষণাবেক্ষণে নিযুক্ত, তাহাদিগকে আয়ত্তাধীন না করিয়া কাহারও এই জঙ্গলে প্রবেশ করিবার অধিকার নাই। বনের সম্মুখেই এক সুবিস্তৃত স্রোতস্বতী, তাহা উত্তীর্ণ হইয়া যাইতে হইবে। নৌকা বা অস্ত্র কোন জলযানাদিরও তথায় ব্যবস্থা নাই ; ভটিনী কল কলনাদে অহোরাত্র ছুটিতেছে। তথায় জন-মানবের সমাগম নাই, অকস্মাৎ সে স্থান দেখিলেই প্রাণের আশা ভরসা সকলই ঘুচিয়া যায়। এই জগুই সংসাহসীর আবশ্যক।

সন্ন্যাসীর মুখে সবিশেষ বৃত্তান্ত অবগত হইয়া অপূত্রক রাজা কথঞ্চিৎ আশ্বস্ত হইলেন বটে, কিন্তু একরূপ দুঃসাহসিক কার্যে সহসা যে কেহ স্বীকৃত হইবে না, ইহাও তিনি স্থির বুঝিলেন। বাহ্য প্রকৃতিতে কোন বৈলক্ষণ্য প্রকাশ না হইলেও, নৃপতির ক্ষোভানল বিগুণ বেগে প্রজ্বলিত হইয়া উঠিল। তিনি যথায়থ আদর অভ্যর্থনা করিয়া সন্ন্যাসীকে বিদায় দিয়া কি উপায়ে এই এই কার্য সম্পন্ন হইতে পারে, নির্জনে বসিয়া মনোমধ্যে তাহারই উপায় চিন্তা করিতে লাগিলেন।

(২)

অন্য দিন রাজসভায় যেরূপ লোকের সমাগম হইয়া থাকে, আজও সেইরূপ জনতা হইয়াছে । অমাত্য ও পারিষদবর্গ লইয়া ভূপতি রাজকার্যে নিযুক্ত রহিয়াছেন । রাজ আদেশে ছুষ্ঠের দমন ও শিষ্টের পালন হইতেছে । কিন্তু অন্য দিনাপেক্ষা অল্প নৃপতির বদন-মণ্ডল অধিকতর বিষণ্ণ, তিনি কাহারও নিকট মনোভাব ব্যক্ত না করিলেও সভাস্থ অনেকেই তাঁহার চিত্তবিকার লক্ষ্য করিয়াছিল । যথানিয়মে সকল কার্য সম্পাদিত হইলে সভাভঙ্গের পর, নৃপতি কয়েকজন বিশ্বস্ত অমাত্যকে রূণকাল অপেক্ষা করিবার অনুরোধ করিলেন । রাজ-আজ্ঞা শিরোধার্য্য করিয়া যে যাহার নির্দিষ্ট আসনে অবস্থিতি করিল ।

বিশ্বস্ত অনুরবর্গকে নির্জনে পাইয়া ভূপতি গত দিবস সন্ন্যাসীর নিকট যে ফকীরের কথা শুনিয়াছিলেন, আদ্যোপান্ত তাহা বর্ণন করিলেন । রাজার দৃঢ় বিশ্বাস যে, তাঁহার অমাত্যবর্গের মধ্যে কেহ না কেহ এই কার্যে ব্রতী হইবে, স্বেচ্ছায় আশ্রয় লইয়া আসিবে । তিনি আশ্রয়ের কথা উত্থাপন করিবারাত্র অনেকেই যাইবার জন্য আগ্রহ দেখাইল, কিন্তু এই কার্যে নানাবিধ বিঘ্ন বিপত্তি আছে, অধিকন্তু প্রাণ সংশয় হইতে পারে, এই সকল বিষয় যতই মনোমধ্যে আন্দোলন করিতে লাগিল, ততই সকলে পশ্চাৎপদ হইতে লাগিল । নৃপতি বুঝিলেন, তাঁহার জন্য প্রাণ বিসর্জনে এই কার্য সম্পাদনে কাহারও ইচ্ছা নাই । স্বার্থের দাস হইয়া অন্যকে যে এই কার্যে ব্রতী করিবেন, ধর্ম্মপরায়ণ নৃপতি সে প্রকৃতির লোক নহেন । যখন দেখিলেন যে, এই হুঃসাহসিক কার্যে প্রবৃত্ত হইতে কেহ অগ্রসর হইতেছে না, তখন তিনি দ্বিক্রুদ্ধ

ব্যতিরেকে তদ্বিষয়ে নিরস্ত হইলেন । সভাস্থিত সকলকে নিবৃত্ত হইতে দেখিয়া রাজমন্ত্রী সমস্ত্রমে ভূপতিকে অভিবাদন পূর্বক নিবেদন করিলেন যে, তিনি হুর্কিপাক সম্বন্ধে এই কার্যে প্রবৃত্ত হইবেন । মন্ত্রীর প্রতি রাজার চিরবিশ্বাস, তিনি যখন স্বেচ্ছায় এই কার্যে হস্তক্ষেপ করিতেছেন, অবশ্যই তাঁহার মনোরথ পূর্ণ হইবে । নৃপতি মন্ত্রীর কথা যতই মনে মনে ভাবিতে লাগিলেন, ততই তাঁহার হৃদয় আনন্দরসে আপ্ত হইতে লাগিল ।

রাজমন্ত্রীর একমাত্র ধর্মের প্রতি প্রগাঢ় বিশ্বাস । তিনি বহুকালাবধি রাজসংসারে প্রতিপালিত হইয়া আসিতেছেন, প্রভুর যাহাতে ননস্ত্রুটি হয়, কর্তব্যাপরাধ অমাত্যের তাহাই একমাত্র লক্ষ্য, তিনি আত্মীয় স্বজন, সহধর্মিণী সকলের মায়া মমতায় বিসর্জন দিয়া নৃপমণির অভিপ্রায় মত কার্য সম্পাদনে কৃতসংকল্প হইলেন, তদুত্তেই তাঁহার বিদেশ যাত্রার উদ্যোগ হইতে লাগিল । তাঁহাকে বহুদূর পর্য্যটন করিতে হইবে, পথে ঘাটে নানাবিধ বিপদ আপদের সম্ভাবনা আছে, সশস্ত্র অশ্বারোহী, পদাতিক সৈন্য, শিবির, তঞ্জাম ইত্যাদি যে সকল সাহু সরঞ্জামে অকস্মাৎ কোন বিপদের সম্ভাবনা হইতে পারে না, স্বয়ং নৃপতি সেই সমস্তের ব্যবস্থা করিতে লাগিলেন ।

মন্ত্রীর বিদেশ গমনের উদ্যোগ দেখিয়া সকলেই তখন আশ্চর্যজনপূর্বক বলিতে লাগিল যে, রাজ্যদেশ পাইলে তাহারা প্রত্যেকেই যাইতে সম্মত হইত । কিন্তু ভূপতি ইতিপূর্বেই তাহাদের সকলেরই পরিচয় পাইয়াছিলেন, এক্ষণে তাহারা যাইবার জন্য আগ্রহ প্রকাশ করিলেও, তিনি কাহারও কথায় আদৌ কর্ণপাত করিলেন না ।

(০)

নির্দিষ্ট দিনে লোকজন সমভিব্যাহারে রাজমন্ত্রী ককীবেশ উদ্দেশে দেশ হইতে বহির্গত হইলেন । স্বয়ং নৃপতি অনুচরের মত তাঁহার পশ্চাতে বহুদূর চলিলেন । দেখিতে দেখিতে রাজধানীর প্রায় প্রান্ত সীমায় আসিয়া তাঁহারা উপস্থিত হইলেন । মন্ত্রী মহাশয় ভূপতিকে যথাযথ অভিবাদন করিয়া বিদায় গ্রহণ পূর্বক নগর সীমা অতিক্রম করিয়া চলিলেন । রাজাও স্বেচ্ছায় অমাত্যপ্রধানকে বিদায় দিয়া অনুচরদর্গসহ রাজধানীতে ফিবিয়া আসিলেন ।

উদ্যোগী পুরুষ যখন যে কার্যের অনুরোধে সংযত হয়, আত্মক নিদ্রায় তাঁহার দৃষ্টি থাকে না ; এক মনে এক প্রাণে যথার্থ অভিলষিত কার্য নিৰ্ব্বিঘ্নে সুসম্পন্ন হইতে পারে, তদ্বিষয়েই তদন্ত চিন্তে নিযুক্ত থাকেন । রাজমন্ত্রী একমাত্র ধর্মের প্রতি নিহিত করিয়া বাটী হইতে বহির্গত হইয়াছেন, বাজাদেশ পূর্ণ কবিত্যে পারিলে তাঁহার ধর্ম রক্ষা হইবে, তিনি মনে মনে ঈশ্বর চিহ্নায় নিযুক্ত থাকিয়া কর্তব্য পালনে অগ্রসর হইয়াছেন । লোকজনকে আহার বিহারে কষ্টের কতক লাঘব হইবে, নৃমণি লোকজন অশন বসনের যথেষ্ট ব্যবস্থা করিয়া দিয়াছেন, তাঁহাকে দেশ পর্যাটনে এ সকল কষ্ট কিছুই ভোগ করিতে হইবে না, কিন্তু লোকজন অতিক্রম করিয়া যখন তিনি তরঙ্গময়ী তটিনীর সম্মুখীন হইবেন, তখন তাঁহার এ সকল সাজ সরঞ্জাম কিছুই প্রয়োজনে আসিবে না, একাকী তাঁহাকে সেই বিপদ-সঙ্কুল সলিল রাশিতে ঝাঁপ দিতে হইবে, সৌভাগ্যক্রমে নদী পার হইয়া বাইলেও তাঁহার নিস্তার নাই, যে ককীরের সহিত সাক্ষাৎ করিবার জন্য তিনি বাটী হইতে বাহির হইয়াছেন, এক সুবিস্তৃত কাননভূমি ভেদ

করিয়া তবে তাঁহার দর্শনলাভ হইবে । সাধারণতঃ বন্যপ্রদেশে সিংহ
 ব্যাঘ্র ভল্লুক প্রভৃতি হিংস্রক জন্তুর বাস, দৈবক্রমে তিনি যদিও
 এই সকল ঋপদের অত্যাচার হইতে মুক্তিলাভ করিতে পারেন,
 তাহাতেও তিনি এককালে বিপদমুক্ত হইতেছেন না, যেহেতু তিনি
 পূর্বেই অবগত হইয়াছেন যে, এই বিশাল কাননভূমি ভীষণ দৈত্য
 মানব পিশাচমণ্ডলি পরিবেষ্টিত, তাহার অহোরাত্র বিকট চীৎকারে
 ভুবন গগন প্রতিধ্বনিত করিয়া থাকে । মন্ত্রীর সহায় সম্পত্তি
 একমাত্র ভগবান, তিনি সেই পবিত্র নাম মরণে জীবনে একমাত্র
 সার ভাবিয়া এই অসম সাহসিক কার্যে হস্তক্ষেপ করিয়াছেন ।

পথশ্রমে বিরাম নাই, দিনের পর দিন যাইতেছে, সমভিব্যাহারী
 লোকজনসহ রাজমন্ত্রী উদ্দেশ্য সাধনে অগ্রসর হইতেছেন,
 কুৎসিপাসায় একান্ত ক্লান্ত হইয়া পড়িলে, দেহের অবসন্নতা বোধ
 করিলে, এক স্থানে শিবির সংস্থাপন করিয়া আহারাদি হয়,
 কিন্তু সম্যক শান্তিলাভের অবকাশ নাই, গ্রামের পর গ্রাম
 ছাড়িয়া দেশ হইতে দেশান্তরে চলিয়া বাইতেছেন, পথিমধ্যে কত
 শত শস্যক্ষেত্র, প্রাস্তর, উপত্যকা, পাহাড়, নদ নদী, বন উপবন
 উদ্ভীর্ণ হইয়া যাইতেছেন, তাহার সংখ্যা নাই । একরূপ বিদেশ ভ্রমণে
 স্থানে স্থানে প্রাকৃতিক শোভা সৌন্দর্যে দর্শকের হৃদয় আকৃষ্ট
 হইতে পারে, কিন্তু রাজমন্ত্রী একরূপ ভাবে পথ পর্যটন করিতেছেন
 যে, স্বভাবের শোভায় তাঁহার হৃদয় আকৃষ্ট হইতেছে না, তিনি
 সে সকলের প্রতি একবারও ফিরিয়া চাহিতেছেন না, সমুদয়ের
 প্রতি উপেক্ষা করিয়া আপন মনেই চলিয়াছেন ।

(৪)

পথপর্যটনে একান্ত ক্লান্ত ও অবসন্ন হইয়া রাজমন্ত্রী রাত্রিকালে নিদ্রা যাইতেছেন, এমন সময়ে তিনি স্বপ্ন দেখিলেন যেন দুই ব্যক্তি তাঁহার পার্শ্বদেশে বসিয়া তাঁহার ভ্রমণ-সম্বন্ধে কথাবার্তা কহিতেছে। একজন বলিতেছে, “ভাই! অপুত্রক রাজা পুত্র কামনায় বিশ্বস্ত মন্ত্রীকে দেশান্তরে আত্মের সন্ধানে পাঠাইয়াছেন, ইহাতে তাঁহারও অভিপ্রায় সিদ্ধ হইবে না, অথচ মন্ত্রীকেও আর দেশে ফিরিতে হইবে না।” তাহার কথায় অপর ব্যক্তি উত্তর করিল, “তোমার এ ধারণা সম্পূর্ণ মিথ্যা, রাজার মনোরথ পূর্ণ হইবে, ওদিকে সম্মানে রাজমন্ত্রীও গৃহে প্রত্যাগমন করিবেন।”

“তুমি ইহা কিরূপে জানিলে? রাজার প্রীতির অন্ত মন্ত্রী যেরূপ হুঃসাহসিক কার্য্যে হস্তক্ষেপ করিয়াছেন, ইহা হইতে তিনি যে পরিভ্রাণ পাইবেন, আমার এরূপ আশাই হয় না।”

“যে যেমন, সে জগৎ সেই ভাবেই দেখিরা থাকে, এ কার্য্য তোমার আমার পক্ষে অসাধ্য বলিয়া যে অন্ত দ্বারা সম্পন্ন হইবে না, তোমার মনে মনে এইরূপ দৃঢ় বিশ্বাস ও সংস্কার একান্ত অবিবেচনার কার্য্য।”

“জানি না—তুমি কোন সাহসে ওরূপ প্রত্নান্তর করিতেছ! মনুষ্যের যাহা সাধ্য নহে, তাহা কি কখন মনুষ্য করিতে পারে?”

“কোন একটা কার্য্য দূর হইতে দেখিয়া আমরা যত ভীত হই, প্রকৃতপক্ষে সেই কার্য্যে সংযত হইলে উত্তরোত্তর যত তাহা শেষ হইতে থাকে, ততই আমাদের আশঙ্কা যুচিয়া সাহসের বৃদ্ধি হয়। আর এক কথা, যে ব্যক্তি একমাত্র ধর্ম্মের প্রতি

নিভর করিয়া পরোপকারব্রতে ব্রতী হইয়াছেন, তাঁহার উদ্দেশ্য কখনও নিষ্ফল হইবার নহে । ধর্মই ধার্মিককে রক্ষা করে । রাজ দরবারে অতুল বলশালী কত লোকের সমাগম সত্ত্বেও রাজমন্ত্রী একাকী এই কার্যের ভার লইয়াছেন, অবশ্যই ইহাতে তাঁহার ধর্মের পবিচয় দিয়াছেন ।”

“আয়ুপ্রাণ বিসর্জনে ধর্ম রক্ষা, এও এক বিচিত্র ব্যাপার ! যদি রাজমন্ত্রী পুনরায় গৃহে ফিরিয়া আসেন, অবশ্য তাঁহার যশঃ গৌরব বৃদ্ধি হইবে, নতুবা জনসমাজে তাঁহার অপবাদ বটিবে ।”

“ভাই ! পূর্বেই বলিয়াছি রাজমন্ত্রীর ধর্মের প্রতি আস্থা আছে, তিনি ধর্মবলে বলী হইয়া এই কার্যে প্রবৃত্ত হইয়াছেন । জগতে ধন, মান, যৌবন সকলই ক্ষণস্থায়ী, কিন্তু ধর্মের ক্ষয় নাই, উত্তরোত্তর ধর্মের বৃদ্ধিই হইতে থাকে । যখন তিনি ধর্মপথ অবলম্বন করিয়াছেন, আনার দৃঢ় বিশ্বাস তিনি নির্দিষ্টকালে কার্য সম্পন্ন করিয়া রাজদ্বারে খ্যাতি প্রতিপত্তিতে অধিকতর গৌরব বৃদ্ধি করিবেন ।”

“যতক্ষণ না রাজমন্ত্রী কৃতকার্য হইয়া দেশে ফিরিয়া আসিতেছেন, ততক্ষণ পর্য্যন্ত এ বিষয়ে কোন কথাই বলা যাইতে পারে না ।”

“হির জানিও ধর্মপরায়ণ রাজমন্ত্রীর এই কার্য সম্পাদনে কোন কষ্টই হইবে না, বিপদ উপস্থিত হইলে তিনি একমাত্র ধর্মের দোহাই দিয়া অনায়াসে তাহাতে মুক্তি পাইবেন ।”

তাহাদের উভয়ের এইরূপ কথাবার্তার পরক্ষণেই রাজমন্ত্রীর নিদ্রাভঙ্গ হইল, তিনি স্বপ্নযোগে দুইজনের পরম্পর যে সকল

কথাবার্তা হইতেছিল, একাগ্র চিত্তে তৎসমুদয় শ্রবণ করিতে-
 ছিলেন, এক্ষণে তিনি শেযোক্তের কথায় মনে মনে কথঞ্চিৎ আশঙ্ক
 হইলেন । প্রকৃতপক্ষে ধর্ম বাহীত তাঁহার অণু সহায় কিছুই নাই,
 তিনি ধর্মের প্রতি একমাত্র দৃষ্টি রাখিয়াই গৃহ হইতে বহির্গত
 হইয়াছেন, এখন সেই ধর্মের উপর নির্ভর করিয়াই পুনরায়
 অগ্রসর হইলেন । অনুচরবর্গ সকলেই বিশ্রাম করিতেছিল,
 তাঁহাকে গমনের জ্ঞা তৎপর দেখিয়া তাহারাও প্রস্তুত হইতে
 লাগিল ।

(৫)

এতদিন স্থলপথে ভ্রমণেই রাজমন্ত্রী কাটিতেছিল, মধ্যে মধ্যে
 হুই একটা ক্ষুদ্র তটিনী অতিক্রম করিতে তাঁহাকে বিশেষ কষ্ট
 অনুভব করিতে হয় নাই । বাহাদের নইয়া তিনি দেশ ভ্রমণে
 বাহির হইয়াছেন, সকলেই তাঁহার সঙ্গে সঙ্গে আসিতেছে,
 কোথাও পদব্রজে, কোথাও শিবিকারোহণে, কখন বা অশ্বপৃষ্ঠে
 না হয় নৌকারোহণে সুখস্বচ্ছন্দে তিনি অগ্রসর হইতেছিলেন ।
 কিন্তু কাননের সম্মুখভাগে সুবিস্তৃত স্রোতস্বতী পার হইতে
 হইবে, এ কথা প্রতিক্ষণেই তাঁহার স্মৃতিপথে জাগ্রত ছিল ; তথাচ
 যতক্ষণ না সেই ভীষণ স্থানে আসিয়া উপস্থিত হইতেছেন, প্রকৃত
 কষ্ট অনুভব করিতেছেন, ততক্ষণ পর্য্যন্ত ভাবী বিপদের কথা
 হৃদয়ক্ষেত্রে আন্দোলন করিয়া বিচলিত হন নাই । তাহাতে
 রাজমন্ত্রী মনে মনে স্থির করিয়া রাখিয়াছিলেন যে, যতই কেন
 বিষ বিপত্তিতে তিনি নিমগ্ন হউন না, একমাত্র ঈশ্বরের প্রতি
 সম্পূর্ণ নির্ভর করিয়া অগ্রসর হইবেন, তাহাতে তাঁহার অদৃষ্টে

যাহা ঘটবার ঘটবে, তিনি উদ্দেশ্য সাধনে কদাচ পরাশ্রয় হইবেন না ।

সকল করিয়া কোন কার্যে ব্রতী হইলে, তাহা সময়ে পূরণ হইয়া থাকে । রাজমন্ত্রী কার্য সাধনে বৃদ্ধপ্রতিজ্ঞ হইয়া চলিয়াছেন, কয়েক দিবস ক্রমাগত অগ্রসর হইয়াছেন, আহার বিহারের ব্যবস্থা সম্বন্ধেও শরীরের প্রতি যথানিয়মে দৃষ্টি রাখেন নাই, দিবা-রাত্র চলিয়াছেন । দেখিতে দেখিতে তিনি সেই সুবিশাল তরঙ্গ-ময়ী স্রোতস্বতীর তটদেশে আসিয়া উপস্থিত হইলেন । নদীর কূল কিনারা যেন কিছুই নাই, এক দিক হইতে অন্য দিকে নজর চলে না, বিস্তৃত জলরাশি ভিন্ন আর কোথাও কিছু দৃষ্ট হয় না । রাজমন্ত্রী তটিনীর সন্নিবৃত্ত হইয়াই মনে মনে বুঝিতে পারিলেন যে, এই নদী পার হইয়া সুবিস্তৃত জঙ্গলে পড়িতে হইবে, কিন্তু তটিনীর গম্ভীর কল কল নাদে তাঁহার অন্তরাগ্না শুকাইয়া গেল, তিনি স্থির জানিলেন যে, এতদিন এত পরিশ্রম করিয়া যে এতদূরে অগ্রসর হইয়াছেন, এই নদী পার হইতে না পারিলে, সকলই তাঁহার ব্যর্থ হইবে । তাহাতে এখানে জনমানবের সংস্রব নাই, যে কাহারও সহিত সাক্ষাৎ করিয়া পর পারে যাইবার পরামর্শ করিবেন, একখানিও তরনী নাই যে, তাহার সাহায্যে পার হইয়া যাইবেন ।

রাজমন্ত্রী নদীর তটদেশে বসিয়া একমনে পারে যাইবার উপায় চিন্তা করিতেছেন, কিন্তু কিছুতেই তাঁহার আশা পূর্ণ হইতেছে না । তিনি জানিয়াছেন যে এই স্থানেই বিপদের সূত্রপাত হইল, সঙ্গে যে লোকজন জিনিসপত্র আসিয়াছে, সকলই এই স্থানে পরিত্যাগ করিয়া যাইতে হইবে, যদি ভাগ্য-

ক্রমে পর পারে যাইতে পারেন এবং জঙ্গল মধ্যে প্রবেশ করিয়া
 আম্রবৃক্ষ তলবাসী ফকীরের সন্ধান পান, তাহা হইলে পুনরায়
 তাহাদের সহিত মিলিত হইবার সম্ভাবনা, নতুবা এ জীবনের
 আশা ভরসা সকলই ঘুচিয়া গেল, সংসারের সহিত সকল সম্বন্ধ
 তাঁহার রহিত হইল, প্রিয় পরিজনবর্গকে যে ত্যাগ করিয়া আসিয়া-
 ছেন, আর তাহাদের সহিত তাঁহার দেখা হইবে না, যে অমুচর-
 বর্গসহ তিনি এতদিন একত্রে থাকিলেন, বিদেশে তাহাদিগকে
 রাখিয়া যাইবেন, হয় ত আর তাহাদের সহিতও মিলিত হইতে
 হইবে না। তিনি এইরূপ ঐহিক চিন্তায় নিমগ্ন রহিয়াছেন,
 তথাচ তাঁহার পারলৌকিক বিষয়ে মতিস্থির রহিয়াছে, তিনি
 একমনে এক প্রাণে উপস্থিত বিপদের সম্মুখীন হইয়া অনাথনাথ
 জগতপতিকে স্মরণ করিলেন ।

একমাত্র বিপদভঞ্নের কৃপা ব্যতিরেকে এ দায় যে পরিভ্রাণ
 নাই, অমাত্যপ্রবর স্থির বুঝিয়াই নিৰ্জনে সেই পতিতপাবনের
 আরাধনা করিতে লাগিলেন । ভক্তের কথা ভগবানের প্রাণে
 বাজে, মর্ত্যবাসী রাজমন্ত্রী কাতর প্রাণে স্বর্গীয় দেবাদিদেবের
 বন্দনা করিবামাত্র, অকস্মাৎ দিব্যালোকে তিনী তট আলো-
 কিত হইল, সে দৃশ্য অণুর দৃশ্যপথে পতিত না হইলেও ধর্মপরায়ণ
 রাজমন্ত্রীর চিত্তাকর্ষণ করিল । মন্ত্রীবর এতক্ষণ উদ্বিগ্নচিত্তে কাল-
 যাপন করিতেছিলেন, একরূপ আশ্চর্য্য দৃশ্যে তাঁহার হৃদয় স্তম্ভিত
 হইল, ভয়ের পরিবর্তে তাঁহার হৃদয় বিশ্বয় ও আনন্দে ভরিয়া গেল,
 তিনি বুঝিলেন যে, ইষ্টদেবতার তাঁহার প্রতি কৃপা হইয়াছে ।

(৬)

সুদূরবর্তী অমুচরবর্গকে তথায় অপেক্ষা করিতে ইঙ্গিত করিয়া রাজমন্ত্রী অধিকতর নিৰ্জনে আসিয়া উপস্থিত হইলেন । তথায় তাঁহাকে অধিকক্ষণ অপেক্ষা করিতে হইল না, সঙ্গে সঙ্গে দেবদূত আসিয়া দেখা দিলেন । দিব্যমূর্তি দেবদূতের দর্শন পাইয়া রাজমন্ত্রী মাষ্টাঙ্গে তাঁহাকে প্রণাম করিয়া আদেশ প্রতীক্ষায় রহিলেন । দেবদূত রাজমন্ত্রীর সাহায্যার্থেই তথায় উপস্থিত হইয়াছিলেন, এক্ষণে তাঁহার শিষ্টতায় পরিভূষ্ট হইয়া বলিলেন, “বৎস ! তুমি নাহি, আমি তোমার মনোরথ পূর্ণ করিবার জন্তই এখানে উপস্থিত হইয়াছি, এক্ষণে তোমার কি কার্য করিতে হইবে ?”

দেবদূতের কথায় রাজমন্ত্রী আশ্বস্ত হইয়া সোৎকুল বচনে প্রত্যুত্তর করিলেন, “পিতঃ ! আমি অপুত্রক রাজার মন্ত্রী, তিনি শুনিয়াছেন যে, এই বিশাল নদীর অপর পারশ্চ কাননে এক আশ্রু-রূক্ষতলে জনৈক ফকীর আছেন, তাঁহার নিকট উপস্থিত হইয়া নৃপতির বিষয় জানাইলে, তিনি একটি আশ্রু ফল দিবেন, সেই ফল ভক্ষণে আমাদের রানীগাতা পুত্রবত্ৰ প্রসব করিবেন, আমি প্রভু-পরামর্শ ভৃত্যমাত্র, নৃপতির মনোসাধপূর্ণ করিবার অভিপ্রায়েই এই বিদেশ যাত্রা করিয়াছি । জানি না কোথায় কত দিনে এই উদ্দেশ্য সিদ্ধ হইবে ? উপস্থিত এই প্রশস্ত নদী দেখিয়াই আমার সকল আশা ভরসা ঘুচিয়া গিয়াছে । এক্ষণে কিরূপে এই নদী পার হইতে পারি, আপনাকে অনুগ্রহপূর্বক তাহার উপায় করিয়া দিতে হইবে, আমার অণু প্রার্থনা বা কামনা আর কিছুই নাই !”

মন্ত্রীর কথায় দেবদূত উত্তর করিল, “বৎস ! তুমি সাতিশর

হঃসাধ্য কার্যে হস্তক্ষেপ করিয়াছ, এই বিশাল নদী পার হইলেই যে, তুমি নিরাপদে সেই ফকীরের নিকট উপস্থিত হইতে পারিবে, এরূপ আশা মনোমধ্যে স্থান দিও না । স্থির জানিও, বিপদ সমূহের সূত্রপাত মাত্র হইয়াছে ; যতই অগ্রসর হইতে থাকিবে, ক্রমে ক্রমে অধিকতর বিপজ্জ্বালে জড়িত হইবে ; সে সমস্ত বিপদ হইতে পরিত্রাণ লাভ—বহু ভাগ্যের কথা ।”

দেবদূতের বাক্য শেষ হইতে না হইতে রাজমন্ত্রী কাতর নম্র বচনে উত্তর করিল, “মহাত্মন ! আমি একমাত্র ধর্মের প্রতি লক্ষ্য রাখিয়া এই হঃসাহসিক কার্যে হস্তক্ষেপ করিয়াছি ; ভবিষ্যতেও ভাল মন্দের প্রতি একবারও দৃষ্টিপাত করি নাই ! আমার অদৃষ্টে যাহা থাকে, অবশ্য তাহার ফলাফল আমাকে ভোগ করিতে হইবে ; কিন্তু প্রভুর কার্যে যখন জীবন উৎসর্গ করিয়াছি, তখন যদি ইহাতে আমার মৃত্যুও হয়, তাহাতে আমি কিছুমাত্র বিচলিত নহি । স্থির জানিবেন, কর্তব্য সাধনে জীবন দিয়াছি ।”

রাজমন্ত্রীর কথা শুনিয়া দেবদূতের প্রাণে দয়ার সঞ্চার হইল । তিনি উত্তর করিলেন, “বৎস ! যদি তোমার ধর্মের প্রতি একান্ত আস্থা থাকে, দৃঢ় ভক্তি থাকে, অবশ্য এ কার্য তোমার দ্বারা সম্পাদিত হইবে, কোন কষ্ট ভোগ করিতে হইবে না ; কিন্তু পরিণামের কথা তোমাকে এক্ষণে ব্যক্ত করিবার আমার অধিকার নাই । তুমি নদী পার হইবার জন্য আমার শরণাপন্ন হইয়াছ, ভাল, আমার সঙ্গে এস, আমি তোমার পরপারে পৌছাইয়া দিব । তোমায় আমি এই দুইটা জিনিস দিতেছি, বিশেষ সাবধান হইয়া ইহাদের ব্যবহার করিবে ; যখন ঘেটীর প্রয়োজন হইবে, তখন সেইটা প্রয়োগ করিবে, ইহার কোন প্রকার ব্যতিক্রম হইলে, স্থির

জানিও, তোমার বৃত্তা সন্নিকট হইয়া আসিয়াছে ।” এই কথা বলিয়া দেবদূত রাজমন্ত্রীর হস্তে দুইটা পুঁটুলি দিয়া তাহার যথাযথ ব্যবহারের কথা বলিয়া দিলেন ।

দেবদূতের এক্রূপ আশ্বাসজনক বাক্যে রাজমন্ত্রীর নয়নযুগল হইতে দরদরধারে আনন্দাশ্রু বিগলিত হইতে লাগিল । তিনি ভক্তিসহকারে তাঁহার চরণ বন্দনা করিলেন এবং সেই দিবাপুরুষ তাঁহাকে বাহা যাহা করিতে বলিয়াছেন, ঠিক সেইরূপ কার্য করিতে প্রতিশ্রুত হইয়া তৎপ্রদত্ত দুইটা পুঁটুলি ভক্তিসহকারে গ্রহণ করিয়া তাঁহারই আদেশমত পশ্চাদগামী হইলেন ।

রাজমন্ত্রীর অনুচরবর্গ যে যথায় ছিল, সে তথায় অপেক্ষা করিতে লাগিল । ঋণমধ্যে তিনি দেবদূতসহ অদৃশ্য হইয়া গেলেন ; এ সংবাদ অনুচরগণ কিছুমাত্র জানিতে পারিল না । তাহারা সকলেই মনে মনে স্থির সিদ্ধান্ত করিল যে, রাজমন্ত্রী কোন দৈবক্রিয়াবলে নদী পার হইবার জন্ত অশুরাণে অপেক্ষা করিতেছেন, কোন প্রকার সুবিধা হইলেই অবশ্য তাহারা সবিশেষ জানিতে পারিবে ।



দেবদূতের সহায়তায় রাজমন্ত্রী দুর্জয় নদী অবলীলাক্রমে পার হইয়া আসিলেন, তটিনীর কল কল শব্দ, উর্শ্বিণালার ভীষণ তরঙ্গ প্রভৃতির কষ্ট তাঁহাকে কিছুই ভোগ করিতে হইল না ; তিনি নিরাপদে অবলীলাক্রমে পরপারে উত্তীর্ণ হইয়াই দেবদূতের সঙ্গভ্রষ্ট হইলেন । তখন ব্যাকুলচিত্তে চতুর্দিকে পুনঃ পুনঃ নিরীক্ষণ করিতে

লাগিলেন, কিন্তু কোন দিকেই আর দিব্যমূর্তির দর্শনলাভ হইল না । রাজমন্ত্রী তখন স্থির বুঝিলেন যে, দিব্যপুরুষ তাঁহাকে পরপারে আনিয়াই প্রস্থান করিয়াছেন, এক্ষণে তাঁহাকে প্রত্যাৎপন্নমতির উপর নির্ভর করিয়া সকল কার্য্য করিতে হইবে । দেবদূত তাঁহাকে বারম্বার ভয়ের কথা উল্লেখ করিয়াছিলেন, এক্ষণে তিনি সেই ভয়-সঙ্কুল স্থানে আসিয়াছেন । নদী পার হইয়াই সম্মুখে সুবিস্তৃত পাদপ শ্রেণী, তরুলতাদির একরূপ ঘন সন্নিবেশ যে, এক স্থান হইতে অন্য স্থানে অগ্রসর হইবারও সুযোগ ঘটে না । রাজমন্ত্রী একমাত্র ঈশ্বরের প্রতি চিন্তা সমর্পণ করিয়া চলিয়াছেন । অনুচরবর্গকে ত্যাগ করিয়া আসিয়াছেন, এক্ষণে ক্ষুধার আহার ও পানীয় জল সকলই তাঁহাকে স্বয়ং সংগ্রহ করিতে হইতেছে ।

রাজমন্ত্রী সেই বিশাল অরণ্যে একাকী অগ্রসর হইতেছেন, আর ভাবী দুর্ভিক্ষপাকের কথা সময়ে সময়ে চিন্তা করিতেছেন, কিন্তু একরূপ অবস্থাতেও তাঁহার ঈশ্বরের প্রতি চিন্তাসমর্পণ সম-ভাবেই রহিয়াছে । এক্ষণে তাঁহার আহার নিদ্রা একরূপ রহিত হইয়াছে ; ক্ষুৎপিপাসায় একান্ত ক্লান্ত হইয়া পড়িলে পথি পার্শ্বস্থ বৃক্ষের দুই একটা কলে ও জলাশয়ের জলে তিনি তৃপ্তিলাভ করিতেছেন । এইরূপ দুঃখ কষ্টে কয়েক দিবস অতিবাহিত হইলে, অকস্মাৎ হিংস্র স্বাপদগণের বিকট চীৎকার তাঁহার কর্ণগোচর হইল । তখন তিনি চতুর্দিকে দৃষ্টিপাত করিয়া কোথাও কিছুই দেখিতে পাইলেন না, অথচ যতই তিনি অগ্রসর হইতে লাগিলেন, উত্তরোত্তর সেই শব্দ অধিক পরিমাণে তাঁহার কর্ণগোচর হইতে লাগিল । একমাত্র জগদীশ্বরের অনুগ্রহ ব্যতীত সম্মুখীন বিপদ হইতে মুক্তি লাভের কোন সম্ভাবনা নাই জানিয়া, তিনি কথঞ্চিৎ

আশ্বস্ত হইলেন । অশুচরবর্গ তাঁহার সঙ্গে কেহই নাই যে, কাহারও সহিত পরামর্শ করিয়া পরিত্রাণের চেষ্টা পাইবেন !

সহস্র দৈত্য দল দ্বারা সেই বন রক্ষিত হইয়া থাকে, এ সংবাদ তিনি পূর্বেই অবগত হইয়াছিলেন ; তিনি একাকী অসহায় অবস্থায় বন মধ্যে বিচরণ করিতেছেন ; কোন্ পথ দিয়া যাইলে তাঁহার পক্ষে কষ্টের লাঘব হইতে পারে, সে সুযোগ সকানও তাঁহার জানা নাই । উদ্দেশ্য সাধন, কি শরীর পাতন এইমাত্র সংকল্প করিয়া তিনি বিদেশ যাত্রা করিয়াছেন, একমাত্র ঈশ্বরের প্রতি নির্ভর করিয়া তিনি তখনও অগ্রসর হইতে লাগিলেন. উপস্থিত বিষয় বিপাকেও কিছুমাত্র ভীত হইলেন না ; কিন্তু তাঁহাকে এ ভাবে আর অধিক দূর যাইতে হইল না । পরক্ষণেই সিংহ ব্যাঘ্র ভল্লুক প্রভৃতি স্বাপদ জন্তুর নথর সংযুক্ত সুরহৎ চরণ চিহ্ন তাঁহার দৃষ্টিপথে পতিত হইল । তিনি কোন জন্তুই দেখিতে পাইতেছেন না, অথচ একরূপ ভীষণ দৃশ্যে কথঞ্চিৎ স্তম্ভিত হইলেন ; বুঝিলেন যে, এ যাত্রায় রক্ষা পাইবার আর অল্প উপায় নাই, এখানেই তাঁহার জীবন লীলার অবসান হইবে ; তথাচ তিনি একমাত্র ভগবানের শরণাপন্ন হইয়া প্রত্নোৎপন্ন মতি প্রভাবে তাহাদের প্রতি লক্ষ্য করিয়া হস্তস্থিত একটা খুঁটুলি সজোরে নিক্ষেপ করিলেন । তৎক্ষণাৎ সে ভীষণ দৃশ্যের পরিবর্তন হইল, আর সে বিকট চরণ চিহ্ন তাঁহার সম্মুখে রহিল না, এককালে দাবানল চতুর্দিকে প্রজ্জ্বলিত হইয়া উঠিল, হতাশনের দারুণ উত্তাপে বৃক্ষ লতাদি ক্রমমধ্যে বিবর্ণ হইয়া গেল । দৈব প্রভাবে এই কার্য সম্পাদিত হইল জানিয়া রাজমন্ত্রী মনে মনে কথঞ্চিৎ আশ্বস্ত হইলেন, কিন্তু অগ্নি দেবের ভীষণ ব্যাপকতায় তিনি

পুনরায় ভীত হইয়া পড়িলেন । সু-উচ্চ পাদপশ্ৰেণী জলদগ্নি সংযোগে নিমেষ মধ্যে ভস্মরাশিতে পরিণত হইতে লাগিল, অনল দেবের প্রবল প্রকোপে সমগ্র বনমণ্ডলী প্রজ্বলিত হইয়া উঠিল ।

এক বিপদ হইতে উদ্ধার পাইতে না পাইতে অন্য বিপদের সম্মুখীন হইয়া রাজমন্ত্রী অধিকতর ভীত হইলেন, তাঁহার নিমিত্তই পাদপশ্ৰেণী দগ্ন বিদগ্ন হইতেছে ভাবিয়া, তিনি মনে মনে ব্যথিত হইলেন, কিন্তু এ মানসিক কষ্ট তাঁহাকে আর অধিকক্ষণ ভোগ করিতে হইল না ; তিনি পরক্ষণে অন্য পুঁটুলিটা অগ্নির উদ্দেশে নিক্ষেপ করিলেন । এত যে অনল রাশির প্রবল উত্তাপে বনমণ্ডলী বিকৃত ভাবাপন্ন হইতেছিল, তৎক্ষণাৎ সে সমস্ত পাবক শিখা নির্বাপিত হইয়া গেল, বৃক্ষ লতাাদি হরিদ্বর্ণে সুশোভিত হইয়া নয়নরঞ্জন হইয়া উঠিল । রাজমন্ত্রী এক্ষণে প্রফুল্ল নয়নে সোৎসাহে ফকীরের উদ্দেশে চলিতে লাগিলেন, তিনি দেখিলেন—বাধা বিঘ্ন আর কিছুই নাই, আশঙ্কার বিনিময়ে তাঁহার হৃদয়ে আশার সঞ্চার হইল ।

কতকদূর অগ্রসর হইয়াই তিনি আত্র বৃক্ষের সন্ধান পাইলেন । প্রাণের মায়া মমতা ত্যাগ করিয়া আত্মীয় স্বজনদের স্নেহ যত্নে বিসর্জন দিয়া তিনি যে ব্রত সাধনে বন্ধপারিকর হইয়াছিলেন, ভগবান হয় ত তাঁহার মনোরথ পূর্ণ করিলেন ; আর কয়েক পদ-মাত্র অগ্রসর হইলেই তিনি সেই মহাত্মা নাধুপুরুষের নিকট উপস্থিত হইতে পারিবেন । এই সকল চিন্তা মনোমধ্যে রাজমন্ত্রী যতই আন্দোলন করিতে লাগিলেন, ততই তাঁহার হৃদয়-ক্ষেত্রজাত আশালতা ফলবতী হইতে লাগিল । তিনি সোৎসাহে সত্বর পদবিক্ষেপে ফকীরের সাক্ষাৎ মানসে চলিতে লাগিলেন ।

এ দিকে আত্র বৃক্ষতলে জটাজুট বিভূষিত মহাত্মা নাধু পুরুষ

এক মনে ধ্যানে সংযত রহিয়াছেন, তাঁহার দৃষ্টি একমাত্র ভূপৃষ্ঠে সংযত রহিয়াছে, তিনি একমনে স্থাগুর শ্রায় অচেতনভাবে যোগে মগ্ন রহিয়াছেন । অকস্মাৎ তাঁহার প্রতি দৃষ্টিপাত করিলে কেবল-মাত্র পক কেশরাশি দর্শকের নয়নপথে পতিত হয় । তাঁহার সংজ্ঞা নাই, এক মনে এক প্রাণে আপনার ভাবেই মাতোয়ারা, সম্মুখে একটি কমণ্ডলু ও একখানি কুঠার রহিয়াছে, লোকজন তাঁহার নিকটে কেহই নাই, সহসা তাঁহাকে একরূপ ভাবে মগ্ন দেখিলে অচেতন বলিয়াই উপলব্ধি হয় ।

দেখিতে দেখিতে রাজমন্ত্রী সাধু পুরুষের সম্মুখবর্তী হইলেন, তিনি প্রগাঢ় চিন্তায় নিমগ্ন রহিয়াছেন, অকস্মাৎ কোন কথা কহিলে যোগীবরের যোগ ভঙ্গ হইতে পারে, এই ভাবিয়া রাজমন্ত্রী একপদে দণ্ডায়মান অবস্থায় তাঁহার আদেশ প্রতীক্ষায় রহিলেন । মুহূর্তের পর মুহূর্ত আসিয়া সময় অতিবাহিত হইতে লাগিল, যোগীপুরুষ যেভাবে বসিয়া রহিয়াছেন, তাহার কিছুমাত্র বৈলক্ষণ্য হইল না, ক্রমে প্রহরের পর প্রহর আসিয়া সারাদিন কাটিয়া গেল, তখনও সাধু পুরুষের চৈতন্যোদয় হইল না ; রাজমন্ত্রী এই সুদীর্ঘকাল তাঁহার দর্শন লাভে অপেক্ষা করিতে লাগিলেন । এমন সময়ে যোগীবরের ধ্যান ভঙ্গ হইল । তিনি নয়ন উন্মীলন করিয়াই সম্মুখভাগে রাজমন্ত্রীকে দেখিতে পাইয়া গম্ভীরস্বরে জিজ্ঞাসা করিলেন “কে তুমি ?”

রাজমন্ত্রী সাধু পুরুষের প্রশ্নে যথাযোগ্য অভিবাদন পূর্বক করবোধে উত্তর করিল, “নহাশ্বন্ ! আমি জনৈক রাজার মন্ত্রী, ভূপতি পুত্ররত্নে বঞ্চিত হইয়া সাতিশয় মনকষ্টে আছেন । আপনার নিকট বে নান্দা প্রার্থনা করে, তাহা পূরণ হয়—সেই অভিপ্রায়েই এখানে আসিয়াছি ।”

মন্ত্রীকাহিনী শেষ হইতে না হইতে সাধুপুরুষ তাঁহাকে নীরস্ত করিয়া সম্মুখস্থ কুঠারের প্রতি দৃষ্টিপাত করিলেন, ইঙ্গিতে জানাইলেন যে, ঐ কুঠারাঘাতে সম্মুখস্থ আত্মবৃক্ষ হইতে যে ফল পতিত হইবে, তাহা রাজমহিষীকে ভক্ষণ করাইলেই তিনি গর্ভবতী হইয়া পুত্ররত্ন প্রসব করিবেন। কিন্তু তপস্বীর মুখ হইতে আর কোন কথাই বাহির হইল না।

সাধু পুরুষের সঙ্কেত মত রাজমন্ত্রী কুঠারাঘাতে দুইটা আত্ম ফল লাভ করিলেন, কিন্তু আত্ম সম্বন্ধে কি করিতে হইবে, সাধু-পুরুষকে জিজ্ঞাসা করিতে তাঁহার আর সাহসে কুলাইল না। তিনি দেখিলেন—যোগীপুরুষ পুনরায় ধ্যানমগ্ন হইয়াছেন, কিয়ৎক্ষণ তথান অপেক্ষা করিয়া উদ্দেশে সাধু পুরুষকে প্রণামান্তর আত্ম দুইটা বিশেষ যত্নে গ্রহণ করিয়া সে স্থান হইতে প্রস্থান করিলেন।

যোগীপুরুষের নিকট উপস্থিত হইতে রাজমন্ত্রী নানাবিধ বিিন্ন বিপত্তির সম্মুখীন হইয়াছিলেন, এক্ষণে সে সকল বিভীষিকার লেশমাত্র তাঁহার নয়নগোচর হইল না, তিনি নির্বিঘ্নে নিরাপদে প্রতাগমন করিতে লাগিলেন। যাইবার সময়ে তিনি সতত শঙ্কিত-ভাবে অগ্রসর হইতেছিলেন, আসিবারকালে পূর্ণমনোরথ হইয়াছেন, উদ্বেগ চিন্তা এক্ষণে তাঁহার হৃদয়ে আর কিছুমাত্র নাই; তিনি মনের আনন্দে একদিনের পথ এক প্রহরে আসিতে লাগিলেন।

যে দেবদূতের সহায়তায় রাজমন্ত্রী উত্তালতরঙ্গময়ী তরঙ্গিনী নির্বিঘ্নে পার হইয়া গিয়াছিলেন, তিনি বনপ্রান্তরীমায় উপস্থিত হইবার পূর্বেই সেই দিব্য মহাপুরুষের স্বরণমাত্র তাঁহার মনোরথ পূর্ণ হইল।

দূর হইতে দেবপুরুষের দর্শনলাভ করিয়া রাজমন্ত্রী প্রীতিপ্রফুল্ল নেত্রের
 তাঁহার প্রতি লক্ষ্য করিয়া সবেগে অগ্রসর হইতে লাগিলেন, অনতি-
 বিলম্বেই উভয়ের দেখা সাক্ষাৎ হইল । রাজমন্ত্রী সসন্ত্রমে দেবদূতের
 পদধারণ ও অভিবাদন করিলে, তাঁহার নয়নদ্বয় হইতে দরদরধারে
 আনন্দাশ্রু বিগলিত হইতে লাগিল । দেবদূত রাজমন্ত্রীর মনোরথ
 পূর্ণ হইয়াছে জানিতে পারিয়া বিশেষ সন্তুষ্ট হইলেন এবং অনতি-
 বিলম্বে তাঁহাকে সেই ছুঙ্গার নদীর পর পারে পৌছাইয়া
 অদৃশ্য হইলেন ।

৬

রাজমন্ত্রীর সমভিব্যাহারী লোকজন যে স্থানে তাঁহার সহিত
 বিচ্ছেদ ঘটয়াছিল, এতাবৎকাল তাহারা সেই স্থানেই শিবির
 সংস্থাপন করিয়া তাঁহার অপেক্ষায় ছিল । এক্ষণে রাজমন্ত্রীকে
 আসিতে দেখিয়া তাহাদের আর আনন্দের সীমা রহিল না । সে
 দিবস শিবিরে ঘন ঘন আনন্দধ্বনি প্রতিধ্বনিত হইতে লাগিল ।
 রাজমন্ত্রী সফল মনোরথ হইয়া আসিয়াছেন, অপুত্রক রাজা পুত্র-
 রত্নে বিভূষিত হইবেন, রাজা প্রজা ইহাতে সকলেরই আনন্দ ।
 আনন্দ প্রমোদে সে দিন সেখানেই কাটয়া গেল । পর দিবস অতি
 প্রত্নাবেই রাজমন্ত্রী দেশে ফিরিয়া আসিবার জন্ত বাস্ত হইলেন ।
 অনুচরবর্গ মহাকোলাহলে অগ্রসর হইতে লাগিল । সকলেই
 উৎসাহচিত্তে প্রত্যাগমন করিতেছে, বহু দিবসাবধি সংসারের সহিত
 তাহাদের সকল সম্বন্ধ লোপ হইয়াছে, পিতা মাতা পুত্র কন্যা ভাই ভগ্নী
 সহধর্মিণী আত্মীয় স্বজনের সহিত এই সুদীর্ঘকাল কাহারও দেখা
 সাক্ষাৎ হয় নাই, বাটীতে ফিরিয়া আসিবার জন্ত সকলেই উৎসুক

চিহ্নে অগ্রসর হইয়াছে । বাইবার সময় যে পথ সমস্ত দিন চলিয়াও শেষ হয় নাই, এক্ষণে তাহারা এতই উৎসাহিত হইয়া চলিয়াছে যে, ঘণ্টায় তাহারা প্রহরের পথ অতিক্রম করিতেছে ।

কয়েক দিবসের মধ্যেই রাজমন্ত্রী অনুচরবর্গসহ ফিরিয়া আসিলেন । নৃপতি মন্ত্রীর আগমন বৃত্তান্ত পূর্বেই জ্ঞাত হইয়াছিলেন । তিনি বাত্রাকালে স্বয়ং রাজ্য শাস্ত্রে উপস্থিত থাকিয়া মন্ত্রীকে বিদায় দিয়াছিলেন, এক্ষণেও সেই স্থানে উপস্থিত থাকিয়া তাঁহার প্রতীক্ষায় ছিলেন । যথা সময়ে ভূপতির সহিত রাজমন্ত্রীর সাক্ষাৎ হইল ; মন্ত্রী রাজাকে যথারীতি অভিবাদন করিলে, নৃমনি সাদরে তাঁহাকে আলিঙ্গন করিয়া কুশলবার্তা জিজ্ঞাসায় সাতিশয় প্রীত হইলেন । রাজমন্ত্রী সংক্ষেপে সকল সমাচার ভূপতির গোচর করিলে রাজা তৎসমভিব্যাহারে মহা উল্লাসে গৃহে প্রত্যাগত হইলেন । রাজপ্রাসাদ আনন্দরোলে উথলিয়া উঠিল, আমোদ প্রমোদ উৎসবে নগরীয় সকলেই মত্ত হইল । নৃপতি মন্ত্রী সমক্ষে প্রতিশ্রুত ছিলেন যে, তিনি সফল মনোরথ হইয়া গৃহে প্রত্যাগমন করিলে, তাঁহাকে অর্দ্ধেক রাজত্ব প্রদান করিবেন, সৌভাগ্যক্রমে মন্ত্রীর উদ্দেশ্য সিদ্ধ হইয়াছে, তিনি ভূপতির প্রতিজ্ঞামত অর্দ্ধেক রাজত্বের অধিকারী হইলেন । মন্ত্রীকে একরূপ উচ্চ সম্মানে সম্মানিত হইতে দেখিয়া রাজসভার অনেকেই তাঁহার প্রতি ঈর্ষাপূর্ণ নেত্রে দৃষ্টিপাত করিল, কিন্তু কার্যাক্ষেত্রে তাহাদের কেহই অগ্রসর হইতে পারে নাই, একমাত্র প্রভূপরায়ণ রাজমন্ত্রী ধর্ম সহজে এই কার্যে ব্রতী হইয়াছিলেন, অগত্যা সকলের অন্তর্জালা অন্তরেই বিলীন হইল । পাত্রমিত্র সভাসদবর্গের প্রকৃতি শ্রায়বান ভূপতির কিছুই অজ্ঞাত ছিল না, তিনি সভাস্থলে মুক্তকণ্ঠে মন্ত্রীর যথেষ্ট

প্রশংসা করিলে, যাহারা মন্ত্রী প্রভি মনে মনে অসন্তুষ্ট হইয়াছিল, অনিচ্ছাসত্ত্বেও তাহারা সকলেই এক বাক্যে তাঁহার স্তুতি করিতে লাগিল ।

রাজমন্ত্রী সাধু প্রদত্ত আম্র ফল দুইটা বিশেষ যত্ন সহকারে লইয়া আনিয়াছিলেন । গোপনে তাহার একটা বাহির করিয়া রাজার হস্তে দিয়া বিদায় গ্রহণ করিলেন, সে দিনের মত রাজ দরবার শেষ হইয়া গেল । ভূপতি সানন্দে আম্র ফলটা লইয়া অস্ত্রপুরে প্রবেশ করিলেন, পারিষদবর্গ যে যাহার নির্দিষ্ট স্থানে চলিয়া গেল । সভাগৃহ সে দিনের মত জনশূণ্ড হইল ।

—

৭

বহু দিনের পর রাজমন্ত্রী গৃহে প্রত্যাগমন করিয়াছেন, সংসারে তাঁহার আত্মীয় স্বজন অনেক আছেন, কিন্তু নৃমণি যে মনকষ্টে কালযাপন করিতেছেন, তিনিও সেই কষ্টের সমভাগী, যেহেতু তাঁহারও কোন সম্ভান সম্ভূতি হয় নাই । রাজার মনোরথ পূর্ণ করিবার অভিপ্রায়েই তিনি বিদেশ যাত্রা করিয়াছিলেন, সন্ন্যাসীর নিকট একটা আম্র ফলেরই কামনা করিয়াছিলেন ; ভাগ্যক্রমে বৃক্ষ হইতে দুইটা ফল পড়িয়াছিল, ভূপতির হস্তে একটা আম্র দিয়া অপরটা আপনার স্ত্রীর জন্ত রাজমন্ত্রী লুক্কায়িত রাখিয়াছিলেন, এক্ষণে সহধর্মিণীকে সম্মুখে পাইয়া তিনি সাদরে সেই আম্র ফলটা উপহার দিলেন । সাধ্বীসতী স্বামী প্রদত্ত আম্র ফলটা বিশেষ যত্নে গ্রহণ করিল ।

মন্ত্রীর অদৃষ্টে এ আম্রফল লাভের কোন সম্ভাবনাই ছিল না । ভূপতি সর্কে সর্কা, তাঁহার আদেশমাত্র কার্য সম্পাদিত হইয়া

থাকে, সৌভাগ্য বশতঃ মন্ত্রী এই ফলটা লাভ করিয়াছেন। স্ত্রী পুরুষে আশ্রয় সঙ্কটে যতই মনোমধ্যে আন্দোলন করিতে লাগিলেন, ততই যেন উভয়ের হৃদয়ে অতুল আনন্দের উচ্ছ্বাস বহিতে লাগিল। বিদেশ ভ্রমণে স্বামীর যথেষ্ট কষ্ট হইয়াছে, মন্ত্রীপত্নী পতির সেবা সুশ্রদ্ধায় নিযুক্তা হইলেন।

রাজাদেশে মন্ত্রী এক্ষণে অর্ধেক রাজ্যের অধীশ্বর, নৃপতি মন্ত্রীর জন্ত কোষাগার তোষাখানা প্রভৃতি সমস্ত বিষয়েরই সুবন্দোবস্ত করিয়া দিয়াছেন। একগাত্র জগদীশ্বরকে সহায় স্থির করিয়া রাজমন্ত্রী ভূপতি-প্রদত্ত সম্মানে সম্মানিত হইয়াছেন। এ দিকে রাজমহিষী গর্ভবতী হইল, ওদিকে মন্ত্রীপত্নীও আশ্রয়কল ভক্ষণ করিয়া গর্ভিনী হইলেন। মন্ত্রী রাজার জন্তই আশ্রয় আনিয়াছিলেন, তিনি যে ফকীরের নিকট হইতে দুইটা আশ্রয় পাঠিয়াছিলেন, এ কথা তিনি ও তাঁহার সহধর্মিণী বাতীত অণু কেহ জানিতে পারে নাই। ধর্ম বিশ্বাসে মন্ত্রী অতুল ঐশ্বর্যপূর্ণ রাজ্যলাভ করিয়াছেন, তাঁহার বন্ধা নারীও গর্ভবতী হইয়াছেন, এ শুভ সংযোগে উত্তরোত্তর স্বামী ও স্ত্রী উভয়েরই ধর্মের প্রতি অনুরাগ বর্দ্ধিত হইল।

মন্ত্রীর জন্ত স্বতন্ত্র রাজভবন নির্মিত হইয়াছে। এক্ষণে তাঁহাকে আর রাজার অধীনে থাকিতে হয় না, তৎপদে দ্বিতীয় মন্ত্রী নিযুক্ত হইয়াছেন। মন্ত্রী এক্ষণে রাজপ্রদত্ত রাজ্যের শাসনভার গ্রহণ করিয়াছেন, তাঁহার ধর্মের প্রতি প্রগাঢ় আস্থা থাকায় প্রজাপুঞ্জ সকলেই তাঁহাকে ভক্তিভাবে দেখিয়া থাকে, তাঁহার রাজ্যে চুরি ব্যভিচার বা অন্য কোন অত্যাচারের নাগম্য নাই, সকলেই নির্বিবাদে মনের সুখে কালযাপন করিতেছে, তিনিও তাহাদিগকে অপত্য নির্বিশেষে আদর যত্নে পালন করিতেছেন।

এদিকে যথা সময়ে রাজমহিষী এক পুত্ররত্ন প্রসব করিলেন । বৃদ্ধ রাজা পুত্রমুখ নিরীক্ষণ করিবার জন্ত এতাবৎকাল উৎসুক চিত্তে অপেক্ষা করিতেছিলেন, এ শুভ সংবাদে তিনি সাতিশয় শ্রীত হইলেন । রাজকোষ দরিদ্রগণের হুঃখ বিমোচনার্থ তিন দিনের জন্ত উন্মুক্ত হইল, এক বৎসরের জন্ত প্রজাবর্গ রাজস্ব প্রদানে অব্যাহতি পাইল, রাজপ্রাসাদে আনন্দ উৎসব বহিতে লাগিল । অপুত্রক রাজা পুত্ররত্ন লাভ করিয়াছেন এ সংবাদ স্বল্পকণ্ঠেই সর্বত্র প্রচারিত হইল ; ভবিষ্যদ্বাক্তা, জ্যোতিষী, গ্রহাচার্য্য, গণকগণের শুভাগমনে রাজভণন পুরিয়া গেল, রাজা তাঁহাদের যথাযোগ্য আদর অভ্যর্থনা করিয়া রাজকুমারের জন্ম বৃত্তান্তাদি জিজ্ঞাসা করিলেন । সমাগত সকলেই কুমারের স্কৃতি ও সুলক্ষণের কথা ভূপতিকে জানাইল, কিন্তু সকলেই এক বাক্যে ভূপতি সমীপে ব্যক্ত করিল ;—“তিনি নয় বৎসর নয় মাস নয় দিন পুত্রমুখ নিরীক্ষণ করিতে পারিবেন না, এই সময়ের মধ্যে পিতা পুত্রে দর্শন হইলে, উভয়েরই অনিষ্টের সম্ভাবনা আছে ।” বৃদ্ধ রাজা বহু কষ্টে পুত্ররত্ন লাভ করিয়াছেন, তিনি যে বৃদ্ধাবস্থায় পুত্রধনে ধনী হইবেন, এ সুখ সম্ভোগ স্বপ্নেও ভাবেন নাই ; এক্ষণে ভবিষ্যদ্বাক্তা গণের কথায় তিনি কণ্ঠস্থিত মর্ম্মাহত হইয়া পড়িলেন, তথাচ শাস্ত্র-বাণী লঙ্ঘন করিতে তাঁহার সাহস হইল না । তদন্তেই মহিষী ও রাজকুমারের জন্ত স্বতন্ত্র প্রাসাদ নির্দিষ্ট হইল । দাস দাসী লোক জনের অভাব নাই, রাজার আদেশ মাত্র পরিচারিকা ভৃত্য প্রভৃতির বন্দোবস্ত হইল ।

পুত্রের জন্ত রাজা বিশেষ উদ্বিগ্ন অবস্থায় কালাতিপাত করিতে-
ছিলেন, ভাগ্যক্রমে যদিও তিনি পুত্ররত্ন লাভ করিলেন, তথাচ

গ্রহবৈশিষ্ট্যে প্রায় দশ বৎসরকাল পুত্র মুখ নিরীক্ষণ করিতে পাইবেন না, হয় ত এই সুদীর্ঘ সময়ের মধ্যে তাঁহার ভাল মন্দ ঘটতে পারে, তাহা হইলে তাঁহার জীবনের সাধ জন্মের মত রহিয়া গেল, তিনি মনে মনে এইরূপ তর্ক বিতর্ক করিতে লাগিলেন এবং দিনে দিনে নির্দিষ্ট দিন গণনায় নিযুক্ত রহিলেন । মহিষীর সহিতও তাঁহার দেখা সাক্ষাৎ রহিত হইয়াছে । রাজরানী কুমারকে লইয়া সকল সাধ আফ্লাদ পূরণ করিতেছেন, বৃদ্ধের সে সাধের অংশী হইতে একান্ত ইচ্ছা থাকিলেও শাস্ত্রভয়ে স্ফস্ত রহিয়াছেন । প্রতিদিন তিনি রাণী ও কুমারের মঙ্গল সমাচার লইয়া থাকেন, কুমার কখন কি করিতেছে, তিনি স্বচক্ষে দেখিতে না পাইলেও সদা সর্বদা সে সংবাদ রাখেন ।

নির্দিষ্ট দিনে মন্ত্রী পত্নীও এক কন্যা সন্তান প্রসব করিয়াছেন, তিনি এক্ষণে রাজমহিষী হইলেও স্বামীসহ ধর্ম্মানুরাগিনী ; রাজপ্রাসাদে কুমারের জন্ম উপলক্ষে নানাবিধ তৌর্যাত্মিক আয়োদ প্রমোদাদির ব্যবস্থা হইয়াছিল, মন্ত্রীর সে সকল সাধ আফ্লাদে তাদৃশ অনুবাগ ছিল না, তিনি পুত্রীর মঙ্গলকামনায় দরিদ্র ভোজন করাইয়া ছিলেন ।

রাজা ও মন্ত্রী উভয়েরই সংসার সুখস্বচ্ছন্দে চলিতে ছিল, জগদীশ্বরের কৃপায় উভয়েরই মনোরথ পূর্ণ হওয়ায় দুইজনেই কথঞ্চিৎ নিশ্চিন্ত হইয়াছিলেন । মন্ত্রী যদিও এক্ষণে রাজ্যেশ্বর হইয়াছিলেন, তথাচ সদাসর্বদা নৃপতি সন্নিধানে উপস্থিত থাকিয়া তাঁহার সহিত সুখ দুঃখের কথাবার্তা কহিতেন এবং যখন যে কোন কার্য করিতে হইত, তাঁহার পরামর্শ গ্রহণ করিতেন । ভূপতির সম্মতি ব্যতীত মন্ত্রী কোন কার্যে হস্তক্ষেপ করিতেন না ;

রাজাও তাঁহাকে প্রকৃত বন্ধু জানিয়া হৃদয়দ্বার উদ্ঘাটন করিয়া
বধন যে বিষয়ের প্রয়োজন হইত, তদ্বিষয়ে যুক্তি করিতেন ।

(১০)

সময় য্যোত রোধ হইবার নহে, বিপ্লববিপাকেও তাহার
গতির হ্রাস বৃদ্ধি নাই, সতত একই ভাবে চলিয়াছে । দিনের
পর দিন যাইয়া রাজকুমার নবম বৎসর নবম মাস ও নবম দিন
অতিক্রম করিলেন । পঞ্চম বৎসরে পদার্পণ করিবামাত্র ভূপতি
পুত্রের বিদ্যা উপার্জনের জন্য শিক্ষকাদি নিযুক্ত করিয়াছিলেন,
রাজকুমার যথানিয়মে শিক্ষালাভ করিতেছিলেন । জ্যোতিষী-
বাক্যে পিতা পুত্র এই সুদীর্ঘকাল দেখা সাক্ষাৎ হয় নাই,
অন্য দিন পূর্ণ হইয়াছে, অপুত্রক রাজা পুত্ররত্নকে ক্রোড়ে ধারণ
করিয়া পরমাগ্রেহে পরম শান্তিলাভ করিবেন ! রাজকুমার
নীরেন্দ্রনাথ জন্মাবধি মাতৃ আদরে লালিত পালিত হইয়াছেন ;
জগতে পিতা যে কি আদরের ও সাধনের বস্তু, তাহা তাঁহার
এখনও উপলব্ধি হয় নাই ! কথায় কথায় মাতৃমুখে পিতার
বিষয় অবগত হইয়াছিলেন, কিন্তু পিতৃসমীপে আসিয়া তাঁহার
অপার স্নেহ সম্ভোগ কুমারের ভাগ্যে ঘটে নাই, আজ তাঁহার সে
সাধের দিন আসিয়াছে !

যথাসময়ে পিতা পুত্রে দর্শন হইল, বৃদ্ধ ভূপতি পুত্রকে ক্রোড়ে
লইয়া স্নেহানুরাগে ঘন ঘন মস্তকাস্পর্শ করিতে লাগিলেন, আপনার
গ্রীবাদেশে যে বহুমূল্য মুক্তাকণ্ঠী শোভিত ছিল, তাহা উন্মোচন-
পূর্বক সাগ্রহে ও সান্নুরাগে পুত্রের গলদেশে পরাইয়া দিলেন ।
জানন্দ উৎসবে রাজভবন পূর্ণ হইল ।

বহু পুণ্যফলে অপুত্রক রাজা পুত্ররত্নে বিভূষিত হইয়াছেন, এক্ষণে যে সে সুখসাধ পূর্ণ হইবে, বৃদ্ধ তাহা একদিনের জন্মও মনোমধ্যে কল্পনা করেন নাই। পুত্র মুখ নিরীক্ষণ করিয়া আজ তাঁহার সে মনোসাধ পূর্ণ হইল। অন্তপ্রাশন, কর্ণবেধ প্রভৃতি জাতীয় যে সকল রীতি নীতি আছে, নৃপতি যথানিয়মে সে সমস্ত মঙ্গলাচরণ ইতিপূর্বেই সম্পন্ন করাইয়াছিলেন। এক্ষণে পুত্রের শিক্ষাগতির প্রতি মনোযোগী হইলেন; পূর্ন হইতেই রাজকুমার বিদ্যাশিক্ষার মনোযোগী ছিলেন, পিতৃসকাশে দিনে দিনে তাঁহার শিক্ষার সমধিক উন্নতি হইতে লাগিল।

এত্রাবৎকাল মহিষীর সহিত রাজার সাক্ষাৎ হয় নাই, তিনি পুত্রের মঙ্গলকামনায় পত্নীকে নগনের অন্তরাল করিয়া প্রসন্নচিত্তে ভাবী সুখ আশার কালযাপন করিতেছিলেন। যে দিন পুত্র পিতৃদর্শনে দরবারে প্রথম উপনীত হইলেন, সেই দিন হইতেই মহিষী রাজ-অন্তঃপুরে পুনঃপ্রবেশ করিয়াছিলেন।

পুত্র কন্যা না থাকিলে সংসারের সাধ আহ্লাদ কিছুই পূর্ণ হয় না। রাজার কোন সুখেরই অভাব ছিল না, তথাচ তিনি সন্তান কামনায় অহোরাত্র মনস্তাপনলে দঃ বিদগ্ধ হইতেছিলেন। দিনে দিনে প্রজাপালনেও তাঁহার অনুরাগের হ্রাস হইয়া আসিতে ছিল, কুমারের জন্ম হইতেই তিনি নব উৎসাহে কার্যক্ষেত্রে অবতীর্ণ হইয়াছিলেন; পুত্রমুখ দর্শনে তাঁহার সে উৎসাহের সমধিক বৃদ্ধি হইয়াছিল। সন্তান সন্ততি সংসারের শোভা, বৃদ্ধ রাজা সকল সুখে সুখী হইয়াও অপত্যাধনে বঞ্চিত ছিলেন, কুমারকে ক্রোড়ে লইয়া তাঁহার সুখসাগর উথলিয়া উঠিল।

আশাই লোকের জীবন মরণ, আশার সঞ্চারে হৃদয়ের

উচ্ছ্বাস, আশা ভঙ্গে বোর অবসাদ । জগদীশ্বরের কৃপায় রাজার মনোসাধ পূর্ণ হইয়াছে, তিনি বার্কক্যাবস্থায় উপনীত হইয়াও আশায় নির্ভর করিয়া যুবা পুরুষের মত প্রবল প্রতাপে রাজ্য-সংক্রান্ত তাবৎ বিষয়ের পর্যালোচনা করিতে লাগিলেন ।

দিনে দিনে শশিকলার মত কুমার বৃদ্ধিত হইতে লাগিলেন । তিনি বৃদ্ধরাজার এক মাত্র নয়নমণি, তাঁহার সামান্য কোন অসুখ হইলে প্রাসাদে পলকে প্রলয় পড়িয়া যায় । নীরেন্দ্রনাথ এদিকে যেরূপ লেখাপড়ার আলোচনা করিতে লাগিলেন, ওদিকে সংগীত, ব্যায়াম প্রভৃতি নির্দোষ আমোদ প্রমোদেও সেইরূপ অভিজ্ঞ হইতে ছিলেন । তিনি ষোড়শবর্ষে পদার্পণ করিয়া সর্কবিদ্যায় বিশারদ হইলেন । পুত্রের দিন দিন এরূপ উন্নতি দেখিয়া রাজার আনন্দের আর সীমা রহিল না ।

(১১)

নীরেন্দ্রনাথ সদাই প্রফুল্ল, সংসার সম্বন্ধে তাঁহার কোন চিন্তাই নাই, আপনার লেখাপড়া ও বিলাসভোগেই তাঁহার দিন কাটিয়া যায় । যখন বাহা ইচ্ছা হয়, আদেশমাত্র তাহা পূর্ণ হইয়া থাকে । লোকজন অমাত্য পারিষদবর্গ সকলেই তাঁহার আজ্ঞাধীন ; তিনি ভ্রমণ উদ্দেশে পথে বাহির হইলে জানপদবর্গ সকলেই উৎসুকচিত্তে তাঁহার দর্শনাভিলাষে আগ্রহা-স্থিত থাকে । রাজ্যের শাসন পালন ভার সকলই পিতার উপর গুস্ত রহিয়াছে, কুমার আপন মনে সুখস্বচ্ছন্দে কালযাপন করিতেছেন ।

যৌবন সীমায় পদার্পণ করিবার সঙ্গে সঙ্গেই নীরেন্দ্রনাথ

ইচ্ছামত করেকজন পারিষদ নির্বাচিত করিয়া লইয়াছেন, তাহাদের সহিত তাঁহার গোপনীয় কথাবার্তা হয়। কোন প্রকার সাধ আফ্লাদে তাঁহার অভিলাষ হইবামাত্র পারিষদবর্গের সাহায্যে তাহা পরিপূরিত হইয়া থাকে।

এক দিবস রাজকুমার একাকী পথভ্রমণে বাহির হইয়াছেন। অন্ত্য দিন বেশভূষায় সজ্জিত হইয়া পারিষদবর্গ সমভিব্যাহারে বেড়াইতে যান, আজ তাঁহার সে সাজ সজ্জা কিছুই নাই, অসু-
গত লোকজন কেহ সঙ্গেও যায় নাই। তিনি কতক পথ চলিয়া গিয়াছেন, এমন সময়ে পথিপার্শ্ব ছাদোপরি দণ্ডায়মানা একটা যুবতীর প্রতি তাঁহার নয়ন আকৃষ্ট হইল। রাজকুমার অবিলম্বে সেই বাতীর সরিকটে উপস্থিত হইলেন, দেখিলেন—রমণী তাঁহার প্রতি এক দৃষ্টিে চাহিয়া রহিয়াছে। স্ত্রীলোকের বদনের প্রতি একপ-
ভাবে দৃষ্টিপাত তাঁহার জীবনে এই প্রথম! উভয়ের দৃষ্টি উভয়কে আকৃষ্ট করিল, রমণী স্বভাবমূলভ চাপলো নীরেঙ্গনাথকে মুগ্ধ করিল, ক্ষণকালের মধ্যে রাজকুমার আত্মবিস্মৃত হইলেন। তিনি অনিমেষ লোচনে সেই কামিনীর প্রতি চাহিয়া রহিলেন।

কুলবধুর পক্ষে পরপুরুষের মুখদর্শন মহাপাপ। কুলকামিনী সদাসর্বদা অবগুণ্ঠনেই থাকেন, কোন রূপে পরপুরুষের দৃষ্টি-
পথে পতিতা হইলে সরমে লজ্জায় মৃতপ্রায় হইয়া পড়েন। বার-
নারীর সে লজ্জা সম্ভব কিছুই নাই; তাহারা যুবকের মনমৌন আকৃষ্ট করিবার জন্য নানা হাবভাবে অঙ্গবিকাশে মোহের চার ফেলিয়া থাকে। যে রমণী কুমারের হৃদয় আকৃষ্ট করিয়াছে, সে কুললক্ষী নহে, দেহ বিক্রয়ে জীবিকানিকাহ উদ্দেশ্যে ছাদোপরি দাঁড়াইয়া ছিল। কুহকিনীর মোহিনীশক্তি কুমারের উপর প্রাধান্য

লাভ করিল, নীরেন্দ্রনাথ কুলটাকে স্বর্গের অঙ্গরী জানে আত্মহারা হইলেন । দেখা সাক্ষাতেই উভয়ে উভয়ের প্রতি অনুরাগ দেখাইল, নীরেন্দ্রনাথ রমণীর ইন্দিতে হারদেশে উপস্থিত হইলেন । রমণী সমাদর করিয়া তাঁহাকে গৃহে লইয়া গেল ।

যে কামিনীর প্রণয়ানুরাগে রাজকুমার মোহিত হইলেন, তাহার নাম বিশালাক্ষী । বিশালাক্ষী রূপলাবণ্যে দর্শকের চিত্তাকর্ষণ করিতে না পারিলেও তাহার বাহ্য অসামান্যতা ও সরলভাবে লোকে সহজে মুগ্ধ হইয়া থাকে । নীরেন্দ্রনাথ একদিন রমণীরূপের মোহিনী শক্তির রসাস্বাদন কবেন নাই, সহসা বিশালাক্ষীর তাঁহার প্রতি একরূপ সরল ব্যবহারে তিনি তাহার সঞ্চিত একত্র বসিয়া কথোপকথনে বাগ্ন হইলে, পানীয়সী সুযোগ বুঝিয়া কুমারকে বাটীতে লইয়া যায় । কামিনী কটাক্ষের মোহিনী প্রলোভন তরলমতি কুমারের পক্ষে এই প্রথম ; তিনি সুদর্ভাব সহিত মিলিত হইয়া সবসমোচনী কথাবাহ্যায় স্বর্গস্থ অমৃতভব করিলেন । ক্ষণকালের মধ্যে উভয়ে একরূপ প্রণয়মিলনে মিলিয়া গেলেন যে, দুই আত্মা যেন এক হইল । নীরেন্দ্রনাথ যে অতুল ঐশ্বর্যপতির একমাত্র বংশধর, তাঁহার উপর রাজ্যের ভারী গুণাগুণ নির্ভর করিতেছে, এ সকল ভাবনা চিন্তা তাঁহার হৃদয় হইতে তদ্রূপে বিদূরিত হইল, তিনি বারখিলাসিনীসহ অঙ্গর আনন্দ প্রমোদে মত্ত হইয়া তাঁহার স্বর্ণত জীবনের সাথকতা সম্পাদন করিতে লাগলেন ; কিন্তু এই অসদাচরণে সর্দনাশের বে সূত্রপাত হইল, হতভাগ্য নীরেন্দ্রনাথ আপনার পদমর্যাদার যে লোপ করিলেন, তাঁহার সে সকল চিন্তার ক্ষণমাত্র অবসর ঘটিল না ।

(১২)

যে যাহা কামনা করে, তাহা পূর্ণ হইলেই অত্র বাসনা আসিয়া হৃদয়কে উদ্বেলিত করিতে থাকে । বক্ষা মহিষী পুত্রবতী হইয়াছেন, রাজভবন আনন্দে পূর্ণ হইয়াছে, তথাচ যেন রাজরাণী কথঞ্চিৎ অভাব বোধ করিতেছেন ! পুত্রের বিবাহ দিয়া সৰ্ব্বশুণ-সম্পত্তি রূপলাবণাবতী বধু লইয়া সাধের সংসার পাতিতে তাঁহার একান্ত ইচ্ছা হইয়াছে । একদিন তিনি কথায় কথায় নৃপতিসমীপে মনোভাব ব্যক্ত করিলেন । পুত্রগতপ্রাণ বৃদ্ধরাজা এই সুখকর প্রস্তাবের অনুমোদন করিলেন । স্বামী ছাড়া উভয়েরই ইচ্ছা পুত্র সংসারী হইয়া বিষয় সম্পত্তির সকল ভার গ্রহণ করেন । মহাভবনের ইচ্ছা সঙ্গে সঙ্গেই কাষো পরিণত হইয়া থাকে ; ভূপতির আদেশমত দেশ দেশান্তরে উপযুক্ত পাত্রীর অনুসন্ধান লোক প্রেরিত হইল ।

রাজকুমারের বিবাহ জন্ত নানাস্থান হইতে সম্বন্ধ আসিতেছে, আলোখা প্রেরিত হইতেছে, দেনা পাওনার হিসাব চলিতেছে, কিন্তু কোথাও কথার ধাৰ্য্য হইতেছে না । আলোখা কন্টার প্রতিমূর্তি দেখিয়া মহিষী পছন্দ করিলে, রাজার তাহাতে মন উঠে না : ভয়ত যেখানে রাজার মত হয়, সেখানে রাণীর মুখভার হয় । এইরূপ পাত্রী নির্দাচনেই ছুই দশ দিন কাটিয়া গেল ।

এদিকে বিশালাক্ষীর সহিত নারৈকনাথ প্রেমলাপে প্রমত্ত হইয়া প্রতিদিনই সেই রমণীর গৃহে বাতায়িত করিতে লাগিলেন, তিনি বাহাদের নিকট মনের কথা খুলিয়া বলিতেন, এ প্রণয়ের কথা তাহারাও বিন্দুমাত্র জানিতে পারিল না । প্রথম দিন যাইবার সময় তিনি পারিষদবর্গ কাহাকেও সঙ্গে লন নাই,

বেশভূষারও পরিবর্তন করিয়া ছিলেন, এক্ষণে সেই ভাবেই তিনি যাতায়াত করিতেছেন। কুলটার যখন যাহা প্রয়োজন হইতেছে, কুমার কোষাগার হইতে অর্থ লইয়া তাহা পূরণ করিতেছেন; নিজের টাকা নিজে খরচ করিতেছেন, অমাত্যবর্গ তৎসম্বন্ধে কেহ কোন কথাই উত্থাপন করিতেছে না, কিন্তু যতই দিন যাইতে লাগিল, উত্তরোত্তর তাঁহার বদনমণ্ডলে যেন চিস্তার ঘোর কালিমা রেখা দেখা দিল।

আপন মনে সকল কার্য্য করিবার অধিকার থাকিলেও কুমারের প্রতি সুবিষ্ণু ভূপতির সন্দেহাট্টা ছিল, ভূপতি কুমারের চরিত্র সম্বন্ধে কথঞ্চিৎ সন্দিগ্ধ হইয়াছিলেন, কিন্তু আদরের পুত্র তাঁহার কথায় মনোবেদনা পাইতে পারে ভাবিয়া তিনি মনের কথা মনেই চাপিয়াছিলেন, মহিষী সঙ্গীপেও এ কথার বিন্দুবিসর্গও প্রকাশ করেন নাই।

রাজকুমারের বিবাহের কথা ইতিপূর্বেই দেশ দেশান্তরে রাষ্ট্র হইয়া গিয়াছে, নানাস্থান হইতে সম্বন্ধ আসিলেও কোথাও মনস্থ হইতেছে না। এদিকে মন্ত্রীপুত্রীও বিবাহের উপরুক্তা হইয়া উঠিয়াছেন, তাঁহারও সম্বন্ধের জন্ত নানাস্থানে পাত্রের সন্ধান হইতেছে। মন্ত্রীকণ্ঠা হেমপ্রভা রূপে গুণে ধন্যা, বালিকার প্রতি দৃষ্টিপাত করিলেই হৃদয় মোহিত হইয়া যায়; অঙ্গের গঠন প্রণালী এতই সুন্দর যে, মগের পুত্রলি বলিয়া লোকের ভ্রম জন্মে; বরাননী এমনই সুলক্ষণা যে, তিনি যাহার অঙ্কলক্ষী হইবেন, তাহার সুখ ভোগের পরিসীমা থাকিবে না। সম্বন্ধসূত্রে মন্ত্রীকুমারীর আলেখ্যখানি রাজমহিষীর হস্তগত হইয়াছে, তিনি চিত্রখানির প্রতি যতবার দৃষ্টিপাত করিয়াছেন, প্রতিবারেই প্রতিমূর্তি 'তাঁহার

হৃদয় আকৃষ্ট করিয়াছে । রাজমহিষী মন্ত্রীপুত্রীর সহিত কুমারের সম্বন্ধ নির্গরে স্থির সিদ্ধান্ত করিয়া স্বামী সকাশে মনোভিলাষ প্রকাশ করিলেন, রাজা আলেখো মন্ত্রীকন্টার অপরূপ রূপলাবণ্য দেখিয়া এককালে চমৎকৃত হইলেন । অন্ত রাজ্যের অধিপতি হইলেও মন্ত্রী প্রতিদিন রাজার সহিত দেখা সাক্ষাৎ করিতেন, উভয়ের সহিত উভয়ের সুখ দুঃখের কথাবার্তা হইত । কথায় কথায় একদিন ভূপতি মন্ত্রী সকাশে তাঁহার কন্টার সহিত পুত্রের বিবাহের কথা উত্থাপন করিলে, ধর্মপরায়ণ মন্ত্রী আহ্লাদে সে বিষয়ের অনুমোদন করিলেন । উভয়ের সহিত উভয়ের কথাবার্তা স্থির হইয়া গেল, আদান প্রদান সম্বন্ধে উভয়পক্ষেই কোন ওজর আপত্তি হইল না ।

কুমার সম্ভোগনে বিশালাক্ষীর সহিত প্রণয়সক্ত হইয়াছিলেন, কিন্তু বারবিলাসিনীর কুহকে পতিত হইলেও আত্মপরিচয় তাহার নিকট অব্যক্ত রাখিয়াছিলেন । যতই দিন যাইতে লাগিল, যদিও তিনি রমণীর আয়ত্তাধীন হইয়াছিলেন, তথাচ এ কার্যে যে সমাজে ঘৃণা, লোক পরম্পরায় প্রকাশ পাইলে তাঁহাকে যে অপদস্থ হইতে হইবে, দিনে দিনে এ কথা তাঁহার স্মরণপথে জাগরিত হইল । বিশালাক্ষী স্বার্থসাধনেই কুমারকে আত্মগত্য ভাব দেখাইয়া তাঁহার উপর আধিপত্য বিস্তার করিয়াছে, নীরেজনাথের পরিচয় আত্মমুখে অব্যক্ত হইলেও, বারাজনার নিকট তৎসম্বন্ধে কিছুই অপ্রকাশ ছিল না । মন্ত্রীকুমারীর সহিত নীরেজনাথের বিবাহ হইবে, দিন ধাৰ্য্য হইয়াছে, গোপনে এ সংবাদ বিশালাক্ষী জানিতে পারিয়া, কুলটা একদিবস মিষ্টালাপে কুমারকে তুষ্ট করিয়া জিজ্ঞাসা করিল, "ভাই ! তোমার নাকি

বিবাহ ?” প্রণয়িনীর মুখে বিবাহের কথা শুনিয়া কুমার প্রত্যুত্তরে বলিলেন “প্রিয়তমে ! আমার আবার বিবাহ কি ?”

“প্রাণেশ্বর ! এও কি কথা ? আমি আপনার দাসী মাত্র, আমার প্রতি আপনার স্নেহপ্রকাশ পদ্মপত্রে জলবিন্দু—কতক্ষণের জন্ত ? এই আছে, এই নাই । আজ আমাকে এত আদর বহু করিতেছেন, হয়ত কাল আর এভাবে থাকিবে না । আমার সহিত দেখা সাক্ষাৎ করিতেও ঘৃণা বোধ করিবেন ।”

“সুন্দরি ! আমি তোমার কথার অর্থ কিছুই বুঝিতে পারিতেছি না । সহসা তোমার মনে এরূপ ভাব হইল কেন ?”

“পুরুষের মন কখন সত্য, কখন নিদয় ! আজ আমাকে ভাল বাসিয়া, বক্ষে স্থান দিতেছেন, হয়ত কাল আমার ছায়াম্পর্শে ঘৃণা বোধ করিবেন । আপনি সংসারী—সংসার মর্শ্ব করিতে হইলে, বিবাহ করিতে হইবে । নবযুবতীকে গৃহে আনিয়া কি আর আমাকে আপনার মনে ধরিবে ?”

“আমার জীবন সঙ্গম ! আজ তুমি অনর্থক এ সকল কথা উত্থাপন করিয়া আমার প্রাণে কেন বাথা দিতেছ ? বিবাহের কথা উঠিয়াছে বটে, কিন্তু আমি তোমার রূপে মোহিত, আমি তোমায় ছাড়িয়া অণু রমণীর প্রণয়ামুক্ত হইতে ইচ্ছুক নহি । তুমিত জান—আমি তোমায় আত্মসমর্পণ করিয়াছি ।”

“সে ভাই, কেবল কথার কথা ! আমার মন ভুলাইবার জন্ত তুমি এরূপ কথা বলিতেছ, কিন্তু সময়ে এসব কিছুই স্মরণ থাকিবে না । বিবাহ কর, তাহাতে আমার কোন আপত্তি নাই, তবে অনাথা বলিয়া মনে রাখিও, তোমার অনুরূপে আমি সর্বস্বথী হইয়াছিলাম । অভাগীর অদৃষ্টে এসুখ ভোগ হইবে

কেন ? আমি মহাপাতকী, তাই প্রাণের প্রাণ পাইয়াও সময়ে বিদায় দিতে হইল—সকলই অদৃষ্ট !”

চতুরা বিশালাক্ষী এইরূপ আক্ষেপ করিয়া রোদন করিতে বসিল, তাহার নয়নধারায় বক্ষঃশূল ভাসিয়া গেল । সরল প্রকৃতি নীরেদ্ধনাথ প্রণয়িনীকে এরূপ বিলাপ করিতে দেখিয়া আশ্বাস বাক্যে তাহাকে কতই সাহুনা করিতে লাগিলেন । কুমারের সোহাগে বিশালাক্ষী পুনরায় কাতরকণ্ঠে বলিতে লাগিল “আমার অদৃষ্টে যাহা আছে, তাহাই ঘটবে, আমার জন্ম আপনাকে কষ্ট-ভাগী করিব না, তবে আপনার নিকট আমার এই প্রার্থনা যে, বিবাহকালে পাত্রীর মুখের প্রতি দৃষ্টিপাত করিবেন না, উভয়ে একত্র হইলেও নয়নে নয়নে যেন মিলন না হয় ; যদি এক দিনের জন্মও আমাকে ভান বাসিয়া থাকেন, তাহা হইলে আমার শপথ—দাসীর এই কথাটি রক্ষা করিবেন, আপনার নিকট আমার অন্য ভিক্ষা আর কিছুই নাই ।”

প্রণয়িনীর নিকট এইরূপ অনুরাগেব পরিচয় পাইয়া নীরেদ্ধনাথ তৎসনীপে শপথ করিয়া বলিলেন, “আমি প্রতিজ্ঞা বন্ধ হইয়া বলিতেছি যে, বহুদিন তোমায় আশ্রয় ভালবাসা থাকিবে, কখনই তাহার মুখাবলোকন করিব না । তুমি আমার প্রতি সদয় থাকিও, আমি তোমার রূপেই মৃত থাকিয়া যেন জীবনের শেষ পর্য্যন্ত কাটাইতে পারি ।”

বিশালাক্ষী প্রেমিককে প্রতিজ্ঞাবন্ধ করিয়া সাদর সোহাগে ভালবাসার ভাণে প্রেমের কতই চিত্র অঙ্কিত করিল, কুমার প্রণয়িনীর হাবভাবে মোহিত হইলেন ।

(১৩)

মহিষী অতি যত্নে মন্ত্রীপুত্রী হেমপ্রভার আলোখ্যানি নিকট রাখিয়াছেন, ভাবী বধুর প্রতিমূর্তি দেখিয়া স্বামী স্ত্রী উভয়েরই মনোনীত হইয়াছে, মন্ত্রীকন্টার সহিত কুমারের বিবাহেরও দিন ধাৰ্য্য হইয়া গিয়াছে, উৎসবদির উত্তোগ আয়োজন হইতেছে, তথাচ তাঁহার একান্ত ইচ্ছা, পাত্রীর আলোখ্যা দেখাইয়া কুমারের মনোগত অভিপ্রায় জানিবেন । আহার সময়ে কুমার অন্তঃপুরে প্রবেশ করেন, অবশিষ্ট সময় তাঁহার বহির্দেশেই কাটিয়া যায় । মহিষী আলোখ্যানি কুমারের হস্তে স্বয়ং দিয়া পুত্রের অভিপ্রায় জানিবেন, মনে মনে স্থির করিয়া রাখিয়াছেন, কিন্তু তাঁহার সাবকাশে কুমারের অবসর হয় না, দুই একদিন কুমারকে ডাকাইয়া পাঠাইয়াও তাঁহার সাক্ষাৎ পান নাই । সময়ে তাঁহার সহিত দেখা হইলে, সাক্ষাতে মনের অভিলাষ পূর্ণ করিবেন ভাবিয়া চিত্রখানি রাজমহিষী আপনার নিকটেই রাখিয়াছেন ।

এদিকে বিশালাক্ষী উদ্দেশ্যসাধনে কৃতসঙ্কল্পা হইয়া গ্রামস্থ কয়েকটা চতুরা বৃদ্ধাকে ডাকাইয়া পাঠাইল । অর্থের লোভে চারি পাঁচটা বৃদ্ধারমণী তাহার নিকট উপস্থিত হইলে, কথাবার্তায় পরীক্ষা করিয়া তাহাদের একটাকে মাত্র নিকটে রাখিয়া অপরগুলিকে বিদায় দিল । হেমপ্রভার সহিত নীরেজনাথের সম্বন্ধের বিষয় মায়াবিনী পূর্বেই সন্ধান লইয়াছে, মন্ত্রীপুত্রীর প্রতিমূর্তিখানি মহিষী আপনার নিকট রাখিয়া দিয়াছেন, এ বৃত্তাস্তও তাহার অজ্ঞাত ছিল না ; এক্ষণে বিশালাক্ষী বৃদ্ধাকে নির্জনে পাইয়া তাহাকে যথেষ্ট অর্থের প্রলোভন দেখাইয়া আপনার কার্যে ব্রতী করিল ।

ইতিপূর্বেই বিশালাক্ষী মন্ত্রীপুত্রীর অপরূপ রূপলাবণ্যের পরীক্ষা পাইয়াছেন। সে বালিকা কুমারের নেত্র-পথে পতিতা হইলে আর নীরেক্রনাথ তাহার প্রতি প্রীতিপ্রকল্প ভাবে চাহিবেন না, রমণীর প্রতি কুমারের অবজ্ঞা হইবে, এই জন্মই মায়াবিনী কুমারকে বালিকার মুখের প্রতি চাহিতে নিষেধ করিয়াছে; কুমারও তাহার কথায় প্রতিজ্ঞাবদ্ধ হইয়াছেন। এক্ষণে চতুরা বৃদ্ধার সাহায্যে মহিষীর করগত চিত্রখানি বিকৃত করিতে পারিলেই তাহার মনোরথ কতক পূর্ণ হইতে পারে স্থির ভাবিয়া বৃদ্ধাকে অর্থ প্রদানে বশীভূত করিয়া তাহার নিকট আপন অভিপ্রায় ব্যক্ত করিল।

বৃদ্ধা বিশালাক্ষীর কথা মত হেমপ্রভার প্রতিমূর্তিখানি বিকৃত করিতে প্রতিশ্রুত হইয়া গোপনে একটা রঙ্গের বাটী ও তুলিকা লইয়া রাজ অন্তঃপুরের প্রবেশদ্বারে উপস্থিত হইল। তথায় বসিয়া সে এমনই বিকৃত স্বরে রোদন করিতে লাগিল যে, তদন্তে দ্বাররক্ষক আসিয়া তাহার রোদনের কারণ জিজ্ঞাসা করিল। বৃদ্ধা দ্বারবানের কথায় সজল নয়নে উত্তর করিল “বাবা! আমার দুঃখ তোমার প্রকাশ করিয়া কোন ফল হইবে না।”

দ্বাররক্ষক বৃদ্ধার কথায় উত্তর করিল “কেন? কি হইয়াছে! ভুই কাহার সহিত দেখা করিতে ইচ্ছা করিস্?”

“দ্বারবানজি! আমার কষ্ট রাণীমাতার অন্নগ্রহ ভিন্ন অন্তের দ্বারা দূর হইবার নহে।”

দ্বারবান বৃদ্ধার কথায় আর কোন দ্বিকল্পিত করিল না। বৃদ্ধা আপন মনে ছন্দোবন্ধে রোদন করিতে লাগিল। রাজকুমারের বিবাহ উৎসবে সকলেই মত্ত, প্রাসাদে আনন্দ উৎসব প্রবাহিত

হইতেছে, এমন সময়ে বৃদ্ধার একরূপ বিলাপকাহিনী সকলেরই অপ্রিয় হইয়া উঠিল। বৃদ্ধার কথা অনতিবিলম্বেই রাজ-অন্তঃপুরে প্রচার হইয়াছিল; মহিষীর বিশ্বস্ত পরিচারিকা বৃদ্ধার সবিশেষ সন্ধান লইবার জন্ত তাহার নিকট উপস্থিত হইলে, সে অধিকতর করুণ স্বরে রোদন করিতে লাগিল। পরিচারিকা বৃদ্ধাকে জিজ্ঞাসা করিল “কেন তুমি একরূপ রোদন করিতেছ? তোমার যদি টাকা কড়ির অভাব হইয়া থাকে, আমার সঙ্গে আইস, রাণীমাতার আদেশ মত তোমার মনোবাঞ্ছা পূর্ণ করিয়া দিব।”

পরিচারিকার কথায় বৃদ্ধা কহিল, “আমার অন্ম সাধ আর কিছুই নাই, একবার মহারানীর চরণ দর্শন করিব; যদি তুমি আমাকে তাঁহার সহিত সাক্ষাৎ করাইয়া দিতে পার, তাহা হইলেই জানিব, তোমার দ্বারা আমার উপকার হইল।”

পরিচারিকা বৃদ্ধার নিকট আর অপেক্ষা না করিয়া এককালে মহিষী সমীপে উপস্থিত হইয়া বৃদ্ধার কথা জানাইল। রাজরানী কুমারের বিবাহ জন্ত সাতিশয় ব্যস্ত রহিয়াছেন, মাসুলিক ক্রিয়া কলাপাদির স্বয়ং উদ্যোগ করিতেছেন, তথাপি বৃদ্ধার একরূপ মনো-কষ্টের কথা শুনিয়া তাঁহার সরল প্রাণে ব্যথা লাগিল; তিনি বৃদ্ধাকে সমভিব্যাহারে লইয়া আসিতে দাসীর প্রতি আদেশ করিলেন। কিন্তু বৃদ্ধা কি জন্ত তাঁহার সহিত দেখা করিতে একরূপ বাগ্ন হইয়াছে, তাহা কিছুই বুঝিতে পারিলেন ন।

অল্পক্ষণ পরেই পরিচারিকা বৃদ্ধাকে সঙ্গে লইয়া মহিষী সমীপে উপস্থিত হইল। বৃদ্ধা রাণীমাতার দর্শন পাইয়া সার্থক প্রণাম করিয়া রোদন করিতে করিতে আত্মকাহিনী প্রকাশ করিতে লাগিল। বৃদ্ধার কথায় মহিষী বুঝিলেন যে, মন্ত্রী এক্ষণে যে প্রদে-

শের অধীশ্বর হইয়াছেন, সেখানেই বৃদ্ধার বাস । নারীসুলভ চাপল্যের বশবর্তী হইয়া রাণী সোৎসুকে বৃদ্ধাকে মস্তীর কথা জিজ্ঞাসা করিলে, বৃদ্ধা উত্তর করিল “রাণী মা ! আমি সেই রাজার বাটীতে প্রতিদিন যাইয়া থাকি, তিনি ও তাঁহার পরিবারবর্গ আমাকে বিশেষ ভালবাসেন ; যেদিন হইতে আমি পুত্র কন্যায় বঞ্চিত হইয়াছি, ঈশ্বর আমাকে সম্মান সমৃতির সুখভোগে নিরাশ করিয়াছেন, সেই দিন হইতে আমার সারা দিনই তাঁহার বাটীতে কাটিয়া যায় ।”

বৃদ্ধার কথা শুনিয়া মহিষী ভাবিলেন, অবশ্যই এই বৃদ্ধা হেমপ্রভাকে দেখিয়া থাকিবে । প্রতিমূর্ত্তি দেখিয়া যদিও তিনি বালিকাকে পরম রূপবতী বলিয়া সিদ্ধান্ত করিয়াছেন, তথাপি বৃদ্ধার মুখে সবিশেষ পরিচয় অবগত হইলে তাঁহার চিত্ত অধিক-তর প্রীত হইবে, এই স্থিরসিদ্ধান্ত করিয়া তিনি শশব্যস্তে আপনার কক্ষ হইতে হেমপ্রভার প্রতিমূর্ত্তিখানি আনিয়া বৃদ্ধার হস্তে দিয়া জিজ্ঞাসা করিলেন, “ভাল দেখেছি, তুমি যে মস্তীকন্যার কথা বলিতেছ, এই চিত্রের সহিত তাহার সাদৃশ্য হয় কি না ?”

চিত্রখানি কয়েক খণ্ড বস্ত্র দ্বারা আচ্ছাদিত ছিল । বৃদ্ধা ক্ষিপ্ত হস্তে একে একে সেই বস্ত্র খণ্ডগুলি উন্মোচন করিয়া চিত্রখানি হস্তে লইয়া মহিষীর অজ্ঞাতসারে বর্ণনয়ী তুলিকা দ্বারা এককালে সেখানি বিকৃত করিয়া ফেলিল এবং যেরূপ ভাবে আচ্ছাদিত ছিল, ঠিক সেইরূপ বস্ত্রদ্বারা আবৃত করিতে লাগিল, এবং মহিষীর চিত্ত-বিনোদনের জন্ত বলিতে লাগিল “কুমারী নয়, যেন সাক্ষাৎ লক্ষ্মী । দেবী আপনার ভাগ্য বড়ই সুপ্রসন্ন, তাই সুন্দরীর সহিত পুত্রের বিবাহ দিতেছেন ।”

বৃদ্ধার কথার মহিষী সাতিশয় প্রসন্ন হইলেন এবং তাহাকে যথোচিত পুরস্কার দিয়া বিদায় দিলেন ।

বৃদ্ধার মুখে হেমপ্রভার রূপের কথা শুনিয়া রাজরানী এতই আনন্দিতা হইয়াছিলেন যে, বৃদ্ধা যখন চিত্রখানি প্রত্যর্পণ করিল, সে সময়ে আলেখ্যখানি যে এককালে বিকৃত হইয়াছে, তাহা দেখিয়া লইবারও তাঁহার সাবকাশ হয় নাই । বৃদ্ধা চিত্রখানি যে ভাবে বাঁধিয়া দিল, তিনি সেই রূপেই তাহা লইয়া যথাস্থানে রাখিয়া দিলেন ।

রাজা ও রানী চিত্র দেখিয়াই উভয়েই স্তম্ভিত হইয়াছেন । এক্ষণে একবার কুমারকে দেখাইলেই মহিষীর মনোবাসনা পূর্ণ হয়, তিনি কুমারের প্রতীক্ষায় অপেক্ষা করিতে লাগিলেন ।

এদিকে বৃদ্ধা বিশালাক্ষীর কার্য শেষ করিয়া মনোমত পুরস্কার লাভ করিয়া সহাস্ত্র বদনে গৃহে ফিরিয়া গেল ।

(১৪)

সময় কাহারও মুখাপেক্ষী নহে, দেখিতে দেখিতে দিন চলিয়া যায় । যেদিন নীরেক্রনাথের সহিত হেমপ্রভার বিবাহের দিন ধার্য হইয়াছে, তাহার আর বিলম্ব রহিল না । ধ্বজাপতাকা, নহবৎ, দীপালোক প্রভৃতি সাজ সরঞ্জামে রাজপথ সুসজ্জিত হইয়াছে, দাস দাসী অমাত্য পারিষদবর্গ সময়োচিত অলঙ্কার ও বেশ ভূষা পুরস্কার পাইয়াছে, দীন দরিদ্রদিগের জন্ত রাজকোষ মুক্ত রহিয়াছে, প্রার্থীর প্রার্থনা যাত্রই পূরণ হইতেছে, আমোদ প্রমোদের তরঙ্গ বহিতেছে, রাজাদেশে উৎসবের আয়োজনাদির কোন অংশেই ক্রটি হয় নাই ।

সকল বিষয়েই সুবন্দোবস্ত হইয়াছে, আগামী কল্য রাজ-কুমারের গাত্রহরিদ্রার দিন, কিন্তু আজ পর্য্যন্ত মহিষীর মনোসাধ পূর্ণ হয় নাই ; তিনি নীরেন্দ্রনাথের সহিত সাক্ষাৎ করিবার জন্ত কয়েক দিবস তাঁহাকে ডাকাইয়া পাঠাইয়াছিলেন, কিন্তু কোন মতেই তাঁহার কার্য্য সম্পন্ন হয় নাই । রাণীর একান্ত ইচ্ছা গাত্রহরিদ্রার পূর্বে কুমারকে পাত্রীর প্রতিমূর্ত্তিখানি দেখাইয়া তাঁহার মনোগত ভাব অবগত হইবেন, অতঃ তাহা সম্পন্ন না হইলে মহিষীর মনের সাধ মনেই থাকিবে ; এজন্য তিনি আর একবার দাসীকে কুমারের নিকট পাঠাইয়া দিলেন ।

পরিচারিকার সহিত নীরেন্দ্রনাথের সাক্ষাৎ হইল, রাণীমাতা যে কয়েক বার তাঁহাকে ডাকাইয়া পাঠাইয়া ছিলেন, এ সংবাদ কুমার ইতিপূর্বেই অবগত হইয়াছিলেন ; এজন্য তদুত্তরে নাতৃ নমীপে উপস্থিত হইলেন । মহিষী নীরেন্দ্রনাথের মুগ্ধচন্দন করিয়া বলিলেন “বাবা ! আমি কতবার ডাকাইয়া পাঠাইয়াছি, একবারও দেখা পাই নাই ।”

“মা ! আমি বহির্বাটীতে অত্র কার্য্যে বাস্ত ছিলাম, আপনার আদেশ আমি জানিতে পারি নাই । অপরাধ মার্জনা করবেন ।”

“বাবা ! তুমি আমাদের অন্ধের বর্ধি ! তোমার মুখ চাহিয়াই আমরা সংসারী, পিতা নাতার মনে বাহাতে কষ্ট হয়, এমন কাজ করিও না । অধীশ্বর তোমার মুখ তাকাইয়াই আজ পর্য্যন্ত রাজ কার্য্যে ব্যাপিত রহিয়াছেন । তোমাকে কোন বিষয়ে অপরাধী বলিতে আমাদের প্রাণে বাজে । এখন আমার এই একটী সাধ আছে—”

মহিষী এই কথা বলিতে বলিতে বদ্বাচ্ছাদিত প্রতিমূর্ত্তিখানি

লইয়া নীরেন্দ্রনাথের হস্তে প্রদান করিলেন, মাতৃ প্রদত্ত সামগ্রীটি কুমার সাদরে গ্রহণ করিলেন, কিন্তু বস্ত্রের মধ্যে যে কি আছে তাহা তিনি কিছু মাত্র অবগত নহেন, এজন্য সাগ্রহে জিজ্ঞাসা করিলেন “মা! একি! আমি ইহা লইয়া কি করিব।”

“বাবা! আমার একান্ত ইচ্ছা ছিল, এই বস্তুটি স্বহস্তে তোমাকে দিব, আজ আমার সে মনস্কামনা পূর্ণ হইল। জানিও ইহার মধ্যে যাহার প্রতিমূর্তি লুক্কায়িত রহিয়াছে, তাহাকে লইয়াই তোমার সংসারী হইতে হইবে, তোমাকে অন্য কথা বলিবার আর কিছুই আমার নাই। তুমি আপনার গৃহে বাইয়া এই প্রতিমূর্তিখানি দেখিলেই সবিশেষ বুঝিতে পারিবে।”

মাতার কথা মত কুমার আর দ্বিক্রমি না করিয়া অবনত মস্তকে মহিষীকে যথাযথ অভিবাদন করিয়া চিত্রখানি হস্তে করিয়া তাঁহার নিকট হইতে বিদায় গ্রহণ করিলেন।

বিশালাক্ষী এক্ষণে কুমারের হৃদয়াধিষ্ঠাত্রী দেবী। দিনে দিনে পাপীয়সী নীরেন্দ্রনাথকে এক্রপ আয়ত্তাধীন করিয়াছে, যে শয়নে স্বপনে তাহার প্রতিমূর্তিই কুমারের হৃদয়ে অঙ্কিত হইতে থাকে। নীরেন্দ্রনাথের বয়স্যগণ পূর্বে সদানন্দদা তাঁহার সহিত একত্রে থাকিত, এক্ষণে তাঁহার তাহাদের প্রতি আর সে অনুরাগ যত্ব নাই, সকলেরই সহিত কুমারের দেখা সাক্ষাৎ হয়, কিন্তু পূর্বের মত সে সরলভাবে নেশামিশি আর নাই। তিনি তাহাদের লইয়া গল্পালাপ করেন, কথাবার্তা কহেন, তথাচ তিনি যেন কি এক আবরণে আচ্ছাদিত থাকেন, প্রকৃত মনের কথা তাহাদের কাহারও নিকট প্রকাশ করেন না।

মহিষী প্রদত্ত চিত্রখানি নীরেন্দ্রনাথ আপনার কক্ষে আনিয়াই

মিভূতে তাহার আত্মোপাস্ত দেখিলেন । বৃদ্ধা কর্তৃক ইতিপূর্বেই আলেখ্যখানি বিকৃত হইয়াছিল, তথাচ বালিকার অলৌকিক রূপ-লাবণ্য বিকাশ পাইতে লাগিল । চিত্রের প্রতি একবার তিনি দৃষ্টিপাত করেন, পরক্ষণে প্রণয়িনী বিশালাক্ষীর মূর্তি তাঁহার নয়ন-পথে উদ্ভিত হইলে হস্তস্থিত চিত্রের কথা বিস্মৃত হইয়া যান । কুমার মনে মনে স্থির করিয়া রাখিয়াছেন, পিতা মাতার সম্বোধের জন্ত তাঁহার এ বিবাহ, তিনি পূর্বেই বিশালাক্ষীকে আত্ম সমর্পণ করিয়াছেন ; এ দারপরিগ্রহে তাঁহার আয়োদ প্রমোদের কোন পক্ষেই ব্যাঘাত ঘটবে না, অধিকন্তু মন্ত্রীপুত্রীর সহিত তাঁহার বিবাহ হইলে, রাজ্যের অর্দ্ধাংশ যে পরহস্তগত হইয়াছে, সময়ে তিনিই তাহার অধিকারী হইবেন, মন্ত্রীর অগ্র সন্তান সন্ততি আর কেহই নাই, যে সে ভোগ দখল করিবে । রাজকুমার চিত্র দর্শনে মনে মনে প্রীত হইলেন ।

এদিকে বিশালাক্ষী বৃদ্ধার সাহায্যে মনোরথ পূর্ণ করিয়াছে, রমণীর প্রেমে রাজকুমার উন্মত্তপ্রায়, দিনে দিনে পিশাচিনী কুমারের উপর এরূপ প্রতিপত্তি লাভ করিয়াছে, যে তাহার সকল কথাই নীরেন্দ্রনাথ অনুমোদন করিয়া থাকেন । বিবাহের রাতে উভয়ে দেখা সাক্ষাৎ হইবে না, বিশালাক্ষী কুমারকে নয়নের অন্তরালে রাখিয়া বিচ্ছেদ যাতনা সহ করিবে—প্রণয়িনীর প্রাণে ব্যথা দিতে নীরেন্দ্রনাথ একান্ত অনিচ্ছুক, কিন্তু পিতা মাতার সাধ আহ্লাদে হস্তারক হইলে, হয়ত তাঁহারা বিরক্ত হইতে পারেন ; এইরূপ সাত পাঁচ ভাবিয়া চিন্তিয়া কুমার বিশালাক্ষীর নিকট এক রাত্রে জগু বিদায় লইয়াছেন । বিবাহ উৎসব উপলক্ষে বিশালাক্ষীর কয়েকখানি নূতন অলঙ্কার হইয়াছে, নীরেন্দ্রনাথ

মোহিনীর মনের ভাব ব্যক্ত হইতে না হইতেই সে সমস্ত প্রস্তুত করাইয়া দিয়াছেন ।

(১৫)

অর্ধ বায়ে সংসারের সাধআহ্লাদ যাহা পূরণ হয়, বৃদ্ধ রাজা পুত্রের বিবাহ উপলক্ষে সে সমস্ত আমোদ প্রমোদের কোন অংশেই ক্রটি করেন নাই । মহাসমারোহে নীরেন্দ্রনাথের বিবাহ উৎসব সাজ হইয়াছে । মন্ত্রী রাজার চিরানুগত, বিবাহসূত্রে তাঁহার সহিত বৃদ্ধরাজের সঙ্ঘাবের অধিকতর বৃদ্ধি হইয়াছে, আদৌ কথা-স্তুর উপস্থিত হয় নাই, নিৰ্ব্বিঘ্নে শুভকার্য সম্পন্ন হইয়া গিয়াছে । বধুমাতাকে গৃহে আনিয়া রাজার সুখের সীমা নাই, মহিষী কন্যার ন্যায় হেমপ্রভাকে আদর যত্ন করিতেছেন, রাজসংসার যেন আনন্দশ্রোতে ভাসিতেছে ।

ধর্মের সংসারে দিনে দিনে সুখের সঞ্চার হইয়া থাকে ; রাজ-মন্ত্রী অবস্থার বৈষম্যেও নিত্যকার্যে অবহেলা করেন নাই ; তিনি এতাবৎকাল ঈশ্বর চিন্তায় সংযত থাকিয়া দিন কাটাইয়া আসিয়াছেন, সম্পদ বিপদে একদিনের জন্তও তাহার অন্তথা করেন নাই, আজও সেই ভাবেই তাঁহার দিন অতিবাহিত হইতেছে । সময় শ্রোতে অবস্থার ঘোর পরিবর্তনে তাঁহার ধর্মানুষ্ঠানের বৈলক্ষণ্য হয় নাই । স্বামীর ধর্মানুরাগে স্ত্রীর ধর্মভাব স্বতই বিকাশ হইয়া থাকে, মন্ত্রীপত্নীও পতির অনুসরণ করিয়াছেন ; সংসারের সাধ আহ্লাদে তাঁহাদের তাদৃশ আসক্তি হয় না, তথাচ লৌকিকতা বজায় রাখিতে উভয়েই কোন অংশে ক্রটি করেন না ।

হেমপ্রভা বালিকা বয়সেই রূপে গুণে লোকের চিত্তাকর্ষণ

করিতেন, এক্ষণে যৌবন সীমার পদার্পণ করিয়াছেন, তাঁহার আলোকিক রূপরাশিতে দশদিক আলোকিত হইতেছে। কুমারীর বালিকা বয়স হইতেই পিতার ধর্ম্মানুষ্ঠানের প্রতি একান্ত লক্ষ্য ছিল, বয়োবৃদ্ধির সহিত তাঁহার ধর্ম্মের প্রতি অনুরাগের বৃদ্ধি হইয়াছে। পিতা মাতা দেখিয়া গুনিয়া তাঁহাকে যোগ্যবরে সম্প্রদান করিয়াছেন, কিন্তু রাজকুমারের চরিত্র পূর্বেই কলুষিত হইয়াছে, হতভাগ্য দেবীমূর্ত্তিকে অঙ্কলক্ষী করিয়াও কুলটার প্রেমে এমনই উন্মত্ত যে, সেই স্বর্ণপ্রতিমার প্রতি ফিরিয়া চাহিতেও তাহার ইচ্ছা হয় না। হেমপ্রভা সকল সুখে সুখী হইয়াও স্বামী প্রেমে বঞ্চিত; এক্ষণে তিনি আর বালিকা নহেন, যৌবনের সর্ব্বলক্ষণ তাঁহার অঙ্গে প্রত্যঙ্গে বিকাশ হইয়াছে। হেমপ্রভা বয়সসুলভ চাপল্যের বশবর্ত্তিনী হইয়াছেন, কিন্তু তিনি মনের উদ্বিগ্ন মনেই সম্বরণ করেন। লজ্জা সরমে প্রাণের কথা কাহারও নিকট ব্যক্ত করেন না। যখন সময়ে সময়ে যৌবন তাড়নায় একান্ত অধীরা হইয়া পড়েন, এক মনে ঈশ্বর চিন্তায় নিযুক্ত থাকিয়া চিন্তের কথঞ্চিৎ শান্তিলাভ করেন।

বিবাহের পর হইতেই নীরেন্দ্রনাথের আগোদ প্রমোদ অধিক মাত্রায় বৃদ্ধি পাইয়াছে; তিনি প্রতি দিনই বিশালাক্ষীর গৃহে রাত্রি যাপন করেন, জীবন সঙ্গিনী জানিয়া বিশালাক্ষীকেই আশ্রয়প্রাণ উৎসর্গ করিয়াছেন। পানীয়সী এক্ষণে কুমারকে ক্রীড়ার পুত্তলি প্রাপ্ত করিয়াছে। এক সময়ে বিশালাক্ষী অতি দীনাবস্থায় দিন যাপন করিত, উদরের অন্ন ও পরিধের বস্ত্রের জন্ত তাহাকে পরের মুখাপেক্ষী হইয়া থাকিতে হইত, আজ তাহার গৃহদ্বারে দ্বারবান বসিয়াছে, দাস দাসীতে সংসারের কাজকর্ম্ম করিতেছে, কুহকিনী

অনন্ত মনে নীরেন্দ্রনাথের সর্কনাশ সাধনেই ব্রতী হইয়াছে । বেশ ভূষা সাজসজ্জার প্রয়োজন হইলে মায়াবিনীর মুখের কথা বাহির হইতে না হইতেই তৎসমুদয় কুমার স্বয়ং আনাইয়া দেন ।

বৃদ্ধ রাজা পুত্রের মুখ চাহিয়াই এখনও রাজকার্য্য পর্যালোচনা করিতেছেন ; সংসারের সাধ আত্মাদ বহুপূর্বেই তাঁহার শেষ হইয়াছিল । ভগবানের কৃপায় বৃদ্ধবয়সে পুত্রমুখ দেখিয়া তিনি নবীন উৎসাহে সকল কার্য্যের পর্যালোচনা করিতেছিলেন, কিন্তু যেদিন হইতে নীরেন্দ্রনাথের কলুষিত প্রকৃতির পরিচয় পাইয়াছেন, সেইদিন হইতেই তাঁহার সকল বিষয়ে শৈথিল্য দাঁড়াইয়াছে, পুত্রের কলঙ্ক লোকসমাজে প্রকাশিত হইলে তাঁহাকেই অপদস্থ হইতে হইবে, তাহাতে রাজা ; তাঁহার যথেষ্ট খ্যাতি প্রতিপত্তি রহিয়াছে । অপত্যস্নেহের এমনই মহিমা যে, তিনি পুত্রের বিষয় যতই চিন্তা করিতেছেন, উত্তরোত্তর তাঁহার হৃদয়তন্ত্রী ছিন্ন ভিন্ন হইতেছে, তথাচ পুত্রের কলুষিত চরিত্র সম্বন্ধে মুখ ফুটিয়া কাহারও নিকট কোন কথা ব্যক্ত করিতে তাঁহার প্রবৃত্তি হইতেছে না । বড় সাধে তিনি পুত্র কামনা করিয়াছিলেন, কিন্তু হতভাগ্য পুত্র তাঁহার বৃদ্ধাবস্থায় আনন্দপ্রদ না হইয়া অবসাদের মূল হইয়াছে ।

মহিষী মনোমত বধুমাতা পাইয়া পরম সুখী হইয়াছেন, কিন্তু ভাগ্যদোষে রাজকুমারের আচার ব্যবহারে তাঁহার চিত্তের বিকৃতভাব দাঁড়াইয়াছে । এত সাধ্যসাধনায় ঈশ্বর যে তাঁহাকে পুত্রবতী করিলেন, রাজরাণীর বহুদিনের মনস্কামনা পূর্ণ হইল, পুত্রের বিবাহ দিয়া তিনি সাধের সংসার পাতিলেন, একমাত্র কুমারের অসৎ চরিত্রে রাজসংসারের সে শ্রী ছাঁদ যেন লোপ পাইতে লাগিল । কুমারের কলুষিত চরিত্রের কথা তাঁহারও

অবিদিত রহিল না, পুত্র যে প্রতি রাত্রি স্থানান্তরে যাপন করিয়া থাকেন, এ সম্বাদও তিনি পাইয়াছেন ; সাক্ষাৎ লক্ষ্মীস্বরূপিনী বধুমাতার স্বামীর সহিত দেখা সাক্ষাৎ হয় না, পতিপ্রণয়িনী পতিপ্রেমে বঞ্চিতা হইয়াছেন, ক্ষণে ক্ষণে এই কথা মহিষীর হৃদয়-ক্ষেত্রে জাগরিত হইয়া তাঁহাকে ব্যথিত করিতে থাকে ; তিনি কখনও বধুমাতাকে পিতৃগৃহে কখন বা আপনার নিকট রাখিয়া যুবতীর চিত্ত প্রীতি সম্পাদনে প্রয়াসী হইয়া থাকেন ।

(১৬)

কুমারের কলুষিত চরিত্র রাজা ও মন্ত্রী পরিবার উভয় পক্ষেরই বিরক্তিকর হইয়া উঠিয়াছে ; ভূপতি ও মন্ত্রী উভয়েই এক্ষণে বার্কিকা দশায় উপনীত হইয়াছেন, উভয়েরই সংসারের সাধ আহ্লাদ মিটিয়া আসিয়াছে ; তবে পুত্র কণ্ঠার সুখ সম্ভোগে তাঁহারা অংশ গ্রহণ করেন । রাজা ও মন্ত্রী পুত্র কণ্ঠার বিবাহ দিয়া অধিকতর নিকট সম্বন্ধে আবদ্ধ হইয়াছেন, এ শুভ পরিণয়ে তাঁহাদের পরস্পর অধিকতর প্রীতির সঞ্চার হইয়াছে, কিন্তু বিকৃত-মতি নীরেজনাথের অসদাচরণে দুইটা সংসার যেন বিশৃঙ্খল হইবার উপক্রম হইয়াছে, এ সময়ে রাজপুত্র আপনার শোচনীয় অবস্থার প্রতি দৃষ্টিপাত না করিলে, চরিত্র সংশোধনে চেষ্টা না করিলে, দুইটা সংসারই নষ্ট হইবার সম্ভাবনা ঘটিয়াছে ।

বুদ্ধ রাজা ও মহিষীর সর্বস্ব ধন অশ্বের নয়ন রাজনন্দনের যে দিনে দিনে অধোগতি হইতেছে, প্রতীকার সাধনে সত্বর উন্মোচনী না হইলে, তাঁহাদের আর সংসার ধর্ম রক্ষা করিতে হইবে না ।

পুত্রের এরূপ কুৎসিৎ প্রকৃতির পরিচয়ে বৃদ্ধ পতিপত্নী উভয়েই মনে মনে সাতিশর অসুখী হইয়াছেন। কিন্তু আশ্রয়ের কলঙ্কের কথা জনসমাজে ব্যক্ত হইলে, তাঁহাদেরই অপবাদের কথা ভাবিয়া মনের উদ্বেগ মনেই রাখিয়াছেন, সাধ আত্মাদের ইচ্ছায় উভয়ে যে এত কষ্ট ভোগ করিলেন, ঈশ্বর তাঁহাদের সকল সাধে হস্তারক হইলেন; উভয়েই আপন আপন অদৃষ্টকে দিকার দিয়া মনোকষ্ট ভোগ করিতেছেন।

হেমপ্রভা একগুণে স্বস্তুরালয়েই দিনপাত করেন, দাস দাসী তাঁহার পরিপর্যায় নিয়োজিত থাকে। বেশ ভূষা সাজসজ্জা কোন সুখেরই তাঁহার অভাব নাই, কিন্তু পতিপ্রাণা রমণীর নিকট এসকল সুখভোগ অতি তুচ্ছ; যুবতী সকল সুখ সুখী হইয়াও পতিপ্রেমে বঞ্চিতা হইয়াছেন, এই দুঃখেই তাঁহার দিবাধামিনী অতিবাহিত হইতেছে। মহিষী বধুমাতাকে দুহিতৃত্বাবে আদর যত্ন করেন। শাণ্ডীীর সহিত হেমপ্রভার এরূপ ভালবাসা হইয়াছে যে, বৃদ্ধা তাঁহাকে এক দণ্ডের জন্তও নয়নের অন্তরাল করেন না। স্বস্তুর শাণ্ডীীর আদর যত্নের কোন অংশেই অভাব নাই, মন্ত্রীকুমারী তাঁহাদিগকে পিতৃ মাতৃত্বাবে গ্রহণ করিয়াছেন। যখন যাহা অভাব হয়, অথবা ভাল মন্দ মনে উদয় হয়, অকপট চিত্তে তিনি শাণ্ডীীর নিকট মন-ভাব প্রকাশ করিয়া থাকেন, মহিষীও বধুমাতার অভিলাষ পূর্ণ করিয়া তাঁহার চিন্ত প্রকুল রাখেন।

একদিন আহারাতে বধুমাতাকে লইয়া মহিষী আপনার কক্ষে বসিয়া গল্পালাপ করিতেছেন, উভয়ে সুখ দুঃখের কথাবার্তা হইতেছে, এমন সময়ে হেমপ্রভা সলজ্জভাবে মহিষীকে জিজ্ঞাসা করিল "মা! আমার মনে একটা সাধ হইয়াছে, যদি এ বিষয়ে

আপনাদিগের অনুমতি পাই, তাহা হইলে একবার মনোভিলাষ পূর্ণ করিতে চেষ্টা করি ।”

বধূর কথার মহিষী স্নেহে প্রত্যুত্তর করিলেন, “কেন মা ! আমি তোমার সকল সাধইত পূর্ণ করিয়া থাকি, তবে আজ এত সঙ্কচিত হইতেছ কেন ? তোমার অভিপ্রায় আমার নিকট নিঃশঙ্কচিত্তে ব্যক্ত কর, অবশ্য তাহার পূরণ হইবে ।”

“মা ! আজ আমি যে কার্যের অনুষ্ঠানে উদ্যোগী হইতেছি, এ বিষয়ে আপনাদিগের সম্পূর্ণ সহায়তা চাই ; আপনাদিগের সহানুভূতি না পাইলে, আমার এ কার্যে অগ্রসর হইবার সাধা নাই । কেবল আপনার অনুমতি লইয়া এ কার্য করিতে আমার শক্তিতে কুলাইবে না, ইহার অনুষ্ঠান পূজাপাদ কর্তাগহাশয়েরও অনুমতি সাপেক্ষ । বহুদিবস হইল আমার বিবাহ হইয়াছে, আপনাদিগের অনুগ্রহে আমার কোন স্মথেরই অভাব নাই, কিন্তু আমার অদৃষ্টে দোষে এত দিন পতিস্মথে বঞ্চিত রহিয়াছি । রমণীর স্বামীই জীবনসৰ্বস্ব, পতির আদরেই সতীর সম্মান ; যার আদরে আদরিণী, অদৃষ্টদোষে এ পূর্ণ যৌবনে যদি সেই স্বামীর মোহাগ কি বস্তু না বুঝিলাম, সেই স্মথ যদি উপভোগনা করিলাম, তাহা হইলে আর এ জীবনে প্রয়োজন কি ?”

হেমপ্রভার মুখ হঠতে এই কয়েকটী কথা নিঃসৃত হইতে না হইতেই তিনি অবগুণ্ঠনে বদন ঢাকিলেন, দরদরপারে যুবতীর নয়ন-যুগল হইতে বারিধারা বর্ষিতে লাগিল । মহিষী বধুমাতার এই মন-কষ্টের কথা পূর্ন হইতেই জ্ঞাত ছিলেন ; ছলে কোশলে তিনি এতাবৎকাল যুবতীর মন ভুলাইয়া রাখিতেছিলেন কিন্তু সতীর প্রণয়ের গতিরোধ হইবার নহে ! যুবতী এতদিন প্রণয়াবেগ মনে মনেই সম্বরণ করিয়াছিলেন, লজ্জা সম্মে খণ্ডর শাণ্ডী কাহারও

নিকট প্রাণের কথা বাহির করেন নাই, আজ তাঁহার প্রাণ প্রণয়োৎসেগে উথলিয়া উঠিয়াছে ; তিনি মনের আবেগ মনে চাপিতে অক্ষম হইয়াই কথা প্রসঙ্গে শাওড়ী ঠাকুরাণীর নিকট হৃদয়দ্বার উদ্ঘাটিত করিয়াছেন ।

মহিষী বধুমাতার মনবিকার লক্ষ্য করিয়া তাঁহাকে নানাবিধ প্রবোধ বাক্যে সাস্তনা করিতে লাগিলেন । স্বহস্তে তিনি হেম-প্রভার নয়নজল মুছাইয়া দিলেন এবং তাঁহার কথায় ব্যথিত হইয়া প্রত্যুত্তর করিলেন, “মা ! কুমারের দোষেই সোণার সংসার আজ ছারখার হইতেছে । আমরা আর কয়দিন বাঁচিব, আমাদের অবিদ্যমানে সকল ভারই তোমাদের উপর ; কুমার পরিণামের প্রতি চাহিয়া দেখেন না, তাই একরূপ অসার আমোদে মাতিয়া আপনার সর্বনাশ করিতেছেন, সঙ্গে সঙ্গে সোণার সংসারেও কালিয়া ঢালিতেছেন । মা ! কুমার যাহাতে সংসারী হয়, যদি তুমি একরূপ কোন কৌশল করিতে পার, আমরা সাধ্যমত তাহার উপায় করিয়া দিব । তোমাদের সুখেই আমাদের সুখ, তুমি যে এ বয়সে স্বামীর বিচ্ছেদ যন্ত্রণা ভোগ করিতেছ, ইহাতে কি আমার প্রাণ ব্যথিত নহে ? কিন্তু কি করিব ? ঈশ্বর আমাদের প্রতি বিমুখ, নতুবা স্বর্ণ-প্রতিমা গৃহে আনিয়াও কুমারকে গৃহবাসী করিতে পারিলাম না ? সকলই অদৃষ্টের দোষ !”

“মা ! আমার হৃৎখে আপনাদের হৃৎখ . আপনারা যে আমার বাথায় ব্যথিত হন, তাহা আমি জানি ; তাই আজ মনে মনে স্থির করিয়াছি যে, যদি স্বামীকে সংসারী করিতে পারি, তাহা হইলেই জীবন রাখিব, নতুবা এ প্রাণ বিসর্জন দিব—লোকালয়ে আর এ মুখ দেখাইব না ।”

“মা ! তোমার মুখ চাহিয়াই আমরা আজও সংসারী আছি। যে দিন হইতে কুমারের অধোগতি হইয়াছে, সেই দিন হইতেই সকল সুখে আমরা বঞ্চিত হইয়াছি। তুমি মা মরণের কথা বলিলে প্রাণ যে আতঙ্কে শিহরিয়া উঠে ! কেন মা, তুমি বল—কি কৌশলে কুমারকে সংসারানুরাগী করিবে ? তোমার কথায় যে আমার প্রাণ কাঁপিতেছে, বল—আর বিলম্ব করিও না, তোমার কথায় আমার প্রাণ অধীর হইতেছে।”

“মা ! আমি কখন এমন কাজ করিব না, বাহাতে গুরুজনের প্রাণে বাজে ; আপনারা আগাকে বিশেষ ভালবাসেন, আপনাদের স্নেহেই দাসী প্রতিপালিত হইয়া আসিতেছে। আমি শুনিয়াছি—কুমার এক বেষ্ঠার প্রেমে অমুরক্ত হইয়া সেই স্থানেই সারারাত্রি থাকেন ! পাপীয়সীর মোহিনীশক্তিতে কুমার এতই মুগ্ধ যে, তিনি সংসারের প্রতি দৃষ্টিহীন হইয়াছেন। আমার ইচ্ছা এই যে, আপনারা কয়েক দিবসের জন্ত সেই বেষ্ঠার সন্নিকটেই একটা বাটীতে আমার বাসের বন্দোবস্ত করিয়া দেন, আমি দাস দাসী লইয়া কয়েকদিনের জন্ত সেইখানেই থাকিব। আর এক কথা, এ দেশে যত গোয়ালিনী আছে, এই কয়েকদিনের জন্ত তাহাদিগকেও সেইখানে থাকিতে হইবে, আমি তাহাদের সহিত মিলিয়া ছুধের ব্যবসা করিব। আমার একটা রৌপ্যের কলসী দিবেন, আমি সেই কলসীতে ছুধ পূরিয়া সেই বেষ্ঠার বাটীতে ছুধ বেচিতে যাইব। দেখি, ইহাতে আমার মন-সাধ পূর্ণ হয় কি না ;—কুমার সংসারী হন কি না ?”

“মা ! তুমি বাহা বলিলে, আমার ইহাতে অমত নাই, কিন্তু সে কুহকিনী কুমারকে যেরূপ বশীভূত করিয়াছে, তুমি সরলা

অবলা তাহাতে কুললক্ষী ; তুমি কি একপে সে.ডাকিনীর হাত হইতে কুমারকে ছাড়াইয়া আনিতে পারিবে? ঈশ্বর কি আমাদের সে দিন দিবেন যে, কুমার সংসারী হইবে। আজই মহারাজকে তোমার মনের অভিপ্রায় জানাইব, তিনিও পুত্রের ব্যবহারে দিবারাত্রি অন্ত-জালায় দগ্ধ বিদগ্ধ হইতেছেন। যদি কোন উপায়ে হতভাগ্য কুমারের দুর্ঘটি ফিরাইয়া সংসারী করিতে পার, তাহা হইলে জানিব, যা তোমার গুণেই পতনোন্মুগ সংসার আবার রক্ষা হইবে ; আমরা হারানিধি পুনরায় পাইব। রাজপুত্রের বর্তমান ব্যবহারে আমাদের সে আশা ভরসা আর নাই। ঈশ্বর কি মা সে দিন দিবেন !”

শাশুড়ীর সহিত হেমপ্রভাব এইরূপ নানাবিধ কথাবার্তা হইতে লাগিল। উভয়েরই হৃদয় রাজপুত্রের জন্ম অশুখী, উভয়েই উভয়কে প্রবোধ বাক্যে সাস্তুনা করিতে লাগিলেন ; কথোপকথনে বহুক্ষণ কাটিয়া গেল। মহিষী মনে মনে স্থির করিলেন, হয় ত সাধবী সতীর উদ্দেশ্য সিদ্ধ হইতে পারে।

(১৭)

বিশালাক্ষী যে বাটীতে বাস করে, রাজপ্রাসাদ হইতে অন্তরালে হইলেও সে স্থানটী রাজ্যের বহির্ভুক্ত নহে, তবে বেণ্ডাপল্লী ; তথায় অধিকাংশ ইতর লোকের বাস। সম্মুখেই প্রশস্ত রাজপথ রহিয়াছে, নাগরিকগণের ইন্দ্রিয় লালসা পরিতৃপ্তির জন্ম সগয়ে সময়ে সেই পথে গতিবিধি হইয়া থাকে। তাহার অনতিদূরে রাজার এক বিলাস ভবন। এক্ষণে রাজা রুদ্ধ হইয়াছেন, তাঁহার সংসারের সাধ মিটিয়া আসিয়াছে, এ সময়ে সে বাটীটি প্রায় সর্বদাই বন্ধ থাকে, তবে রাজার ধনের অভাব নাই, তথায় তাঁহার যাতায়াত

না থাকিলেও, লোকজনের পূর্বমত বন্দোবস্ত রহিয়াছে, সাজ-সজ্জারও কোন অংশে অভাব হয় নাই, ঘর দ্বার সকলই পরিষ্কার পরিচ্ছন্ন । বধুমাতার অভিলাষমতে মহারাজ এই বিলাস ভবনটাই তাঁহার কয়েক দিবস বাসের জন্ত নিৰ্দিষ্ট করিয়া দিয়াছেন ; রাজ্য-স্বায় নাগরিক গোয়ালিনীগণ তথায় যাইয়া অবস্থিতি করিতেছে, সকলেই সুন্দর বেশভূষায় সুশোভিত, কুমারপত্নীও সময়োচিত বসন ভূষণে সাজিয়াছেন । তাঁহাদের রক্ষণাবেক্ষণে প্রহরী নিযুক্ত হইয়াছে ।

বিলাস ভবনটী এক্ষণে গোয়ালিনীর বসবাসে নূতন শোভা ধারণ করিয়াছে । তাহারা সকলেই বাটার একতল গৃহে অবস্থিতি করে, দ্বিতলে একমাত্র ভেনপ্রভা থাকেন । তাঁহার পরিচারিকাগণ সকলেই সঙ্গ আসিয়াছে । মন্ত্রীকুমারী গোয়ালিনীবেশে বিশালাক্ষীর বাটার সম্মুখ উপস্থিত হইয়া প্রাণেশ্বরকে মোহিত করি-
বাস করিয়া করিয়াছেন, তাঁহার সহিত আবও কয়েকটি সুন্দরী গোয়ালিনী গাঁচবে, তাহারাও বিবিধ বর্ণের বেশভূষায় সজ্জিত হইবে, প্রত্যেকেই লুক্কপূর্ণ কলস কক্ষে বাইবে । ভেনপ্রভার আদেশ মাত্রেই সকল বিষয়ের স্বেচ্ছাবস্ত হইয়াছে । এখন রাজকুললক্ষী যদি উদ্দেশ্য সাধন করিতে পারেন, পথলাভ রাজ-কুমারকে যদি আশ্রমে আনিতে পারেন, সংসারধর্মের তাঁহার যদি অনুরাগ জন্মে, তাহা হইলেই ভেনপ্রভার উদ্দেশ্য সূক্ষ্ম হয়, নতুবা তাঁহাকে লোকলজ্জায় সাতিশর অপদস্থ হইতে হইবে, তিনি লজ্জায় জনসনায়ে মুখ দেখাইতে কুণ্ঠিতা হইবেন । বালাকাল হইতেই রাজনন্দিনী ধর্মের প্রতি একমাত্র লক্ষ্য রাখিয়া কাঁচা করিয়া আসিয়াছেন, এখন তাঁহার উদ্দেশ্য সিদ্ধির বিষয় পরীক্ষা ;

তিনি এই সময়ে একমনে বিপদবারণ ভগবানের শরণাপন্ন হইলেন ।
আরাধনার বহুক্ষণ অতিবাহিত হইল, তথায় জনপ্রাণী কেহ রহিল
না ; ইতিপূর্বেই দাস দাসীকে সে স্থান হইতে বিদায় দিয়াছিলেন ।

কুমার প্রতি দিনই বিশালাক্ষীর ভবনে আগমন করিয়া
থাকেন, সতীর সহিত পতির সাক্ষাৎ না থাকিলেও হেমপ্রভা
কোন সময়ে স্বামীর তথায় গতিবিধি হয়, পূর্বেই সংবাদ লইয়া
ছিলেন ; এক্ষণে তিনি নিকরচিত গোয়ালিনীগণকে মনোমত সাজ
সজ্জায় সাজাইয়া স্বয়ং সূচাৰু বেশভূষায় ভূষিত হইয়া সকলে মিলিয়া
কলসীকক্ষে বিশালাক্ষীর বাটীর দিকে চলিলেন, কলসী গুলি ঢুঙে
পরিপূর্ণ । তাহারা মৃদুন্দ গতিতে পথে চলিতেছে, এদিকে সুল-
লিত সঙ্গীতে শ্রোতার মন প্রাণ আকুল হইতেছে । সকলেরই
বদন অবশুর্গনে আচ্ছাদিত, তথাচ রমণাকর্ষণের স্তম্ভুর স্বরে প্রাণ
মন যেন কাড়িয়া লইতেছে ! বানাকর্ষণের স্বর, অতি মধুর , দত
শোনা যায়, ততই যেন শুনিতে ইচ্ছা হয়, তাহারা গাহিতেছে :—

কেঁড়ে ভরা দুধ রয়েছে কে নিবিবে আয় ।

চলে গেতে চোকে উঠে ননী গড়ায় তায় ॥

এ দুধ যে কিন্তে পাবে, রনিক সূজন বলি তারে,

বিকাই নাত যারে তারে, এমনই কি দায় ।

যে জানে এ দুধের কদর, তাব কাছে আন নাঃ ত দর,

কাতরে চায় কবে আদর, লুটিয়ে পড়ে পাত ।

যেচে বেচে সাধ মেটনা, বিয়াদের এ নেনা দেনা,

আলাপেত যায় না চেনা, মজে কি মজায় ।

নীরেন্দ্রনাথ বিশালাক্ষী সহ প্রেমালোকে বিহ্বল থাকিলেও
কামিনীগণের এই কোমল কণ্ঠস্বর তাঁহার কণকুহরে প্রবেশ

করিল । কুমার অপূর্ব সঙ্গীত শ্রবণে মোহিত হইলেন, তদন্তে গৃহের জানালা উন্মুক্ত করিয়া গায়িকাগণের প্রতি চাহিয়া দেখিলেন । রমণীগণের সঙ্গীতে বিরাম নাই, তাহারা সকলেই সম-স্বরে সেই একই গীত গাইতেছে । সুধার সঙ্গীতে নীরেন্দ্রনাথের মনপ্রাণ মাতিয়া উঠিল, তিনি তদন্তে গায়িকাদিগকে তাঁহার নিকট উপস্থিত হইবার জন্ত লোক পাঠাইলেন ।

হেমপ্রভা স্বামীর সহিত সাক্ষাৎ উদ্দেশেই কুললক্ষী হইয়া পথের বাহির হইয়াছিলেন, প্রাণেশ্বরের অভিপ্রায় বুঝিয়া সহচরীবৃন্দে পরিবেষ্টিতা হইয়া তৎসঙ্গীপে উপস্থিত হইলেন । নীরেন্দ্র গোয়ালিনীগণের বেশ ভূষা, ভাবভঙ্গী দেখিয়া বিস্মিত হইলেন । সাধারণতঃ দুর্ভাবিক্রয়কারিণীগণ যে অবস্থায় দিন কাটান করে, ইহাদের সহিত তাহাদের কিছুই মিল নাই । কুমার মনে ভাবিলেন, হয়ত ইহারা কোন উদ্দেশ্য সাধনে আসিয়াছে, কিন্তু পরক্ষণে সে সংস্কার তাঁহার আর বহিল না ; তিনি তাহাদিগকে জিজ্ঞাসা করিলেন, “তোমরা দুধ বেচিতে বাস্তায় কেন ?”

“দুধের পরিষ্কার পাইলে, এখানে আসিতে হইত না ।”

“দুধ এক আর বিক্রয় না? যে তোমরা দল বাধিয়া বাহির হইয়াছ ?”

“মহাশয় ! দুধের কাঁটতি খুবই আছে, তবে কিনা—জিনিষ বুকে দর ।”

“কেন ? বাজারে কি ভাল দুধ পাওয়া যায় না ।”

“আমরা বাজারে জিনিষ বেচি না, যদি আপনার আবশ্যক থাকে, দুধ নিন, খেয়ে দেখবেন, বাজে জিনিষ কিনা ।”

“ভাল, দর কত ?”

“এক কলসী দুধের দর, এক কলসী টাকা ।”

“দরটা চড়া বটে, যাহাই হউক, তোমরা যে কয় কলসী দুধ আনিয়াছ, সবটা দিয়া যাও । আমি টাকা দিতেছি ।”

“একেইত বলে খরিদার, আপনি দুধের আদর জানেন, দর দস্তুর করতে হ’ল না ।”

নীবেন্দ্র গোপীগণকে পাত্রস্থিত সমস্ত দুধ ঢালিয়া দিতে বলায়, তাহারা তাহাই করিল । তিনিও কথামত টাকা দিয়া তাহাদিগকে বিদায় দিলেন, কিন্তু কুমার তাহাদের সঙ্গীতে মোহিত হইয়া ছিলেন, একাধু ইচ্ছা তাহাদিগকে আর একটী গান গাইতে বলেন : মনের কথা মনেই রহিল, মুখ ফুটিয়া কোন কথা বলিতে পারিলেন না । সম্মুখে প্রণয়িনী রহিয়াছে, হয়ত একপ করিলে বিশালাক্ষী তাহার উপর বিরক্ত হইতে পারে, তিনি আর কোন কথাই বলিলেন না ; কেবল এই মাত্র বলিলেন, “আচ্ছা ! দুধ থাইয়া দেখিব, যদি ভাল হয়—আবার কাল লইব, তোমরা যোগে আসিও ।”

কুমারের মুখের কথা শেষ হইতে না হইতে এক গোয়ালিনী বলিয়া উঠিল, “মহাশয় ! আমাদের বাবসাই এই—আমরা এ পাড়া মে পাড়া দুধ যোগাইয়া বেড়াই, আপনি যখন আসিতে বলিতেছেন, অবশ্য কাল আসিব ।”

গোয়ালিনীরা চলিয়া গেলে বিশালাক্ষী কুমারকে বলিল “তোমার মত নির্বোধ আর নাই ! আজ গয়নার মেয়ের কাছে ঠকলে, দুধের বদলে টাকার কলসী তাহারা লইয়া গেল ! ছি ছি, তুমি না পুরুষ মানুষ !

“ঠকা জেতায় জগৎ সংসার । আজ হারিলাম, তাহাতে ক্ষতি কি ? কালত আমার জিত হইতে পারে ।”

“তোমার বত ক্ষমতা আমারত তা আর জানতে বাকি নাই, মিছে বাক্ চাতুরী রাখ ।”

“তা নয়, তা নয়, তুমি কি ভাবিয়াছ—আমি এতই বোকা যে, না বুঝিয়া এতগুলি টাকা নষ্ট করিলাম ? ঠিক জানিও আমার শুদে আসলে আদায় আসিবে ।”

“বলিহারি বুদ্ধির দোড় ! ওরা কিনা তোমার সমকক্ষ যে একদিন না একদিন উহাদিগকে বাগে পাইবে ?”

“ভাল ! দেখাই যাউক !”

বিশালাক্ষীর সহিত নীরেজের এইরূপ কথাবার্তায় বহুক্ষণ কাটিয়া গেল । কুহকিনী ভাবিয়া ছিল যে, কুমার এককালে সম্পূর্ণ অরত হইয়াছে, তাঁহাকে ক্রীড়ার পুত্তলি করিয়াছে, কিন্তু আজ গোপবালাগণের সহিত তাঁহার ব্যবহারে পাণীয়সী কণক্ষিৎ সন্দিষ্টা হইল ; অকারণ কতকগুলি টাকা বাহির হইয়া গেল, কোশলে বিশালাক্ষী এ সমস্ত টাকাই রাজপুত্রের নিকট হইতে হস্তগত করিতে পারিত, কিন্তু কোথা হইতে গোয়ালিনীরা আসিয়া তাহার সাধে বাদ সাধিল, এখনও গোপবালাদিগের তথায় আসিবার সম্ভাবনা আছে । প্রথম দিন দেখা সাক্ষাতে যখন কুমারের মনের ভাবের কিঞ্চিৎ পরিবর্তন ঘটিয়াছে, তখন চতুরা বিশালাক্ষী এ কথা নীরেজনাথের নিকট অপ্রকাশ রাখিলেও মনে মনে স্থির জানিয়া ছিল । তথাচ যতক্ষণ না পরীক্ষার ইহার নিগূঢ় মীমাংসা হইতেছে, ততক্ষণ মুখের কথা প্রকাশ করিয়া কথান্তর উপস্থিত করিতে তাহার সাহস কুলার নাই । পিশাচিনী ইহাও স্থির জানিয়াছিল যে, মোহের ঘোরে কুমার তাহার করগত, চৈতন্য উদয়ে নীরেজনাথ তাহার প্রতি আর চাহিয়াও দেখিবেন না ।

(১৮)

পতিব্রতা হেমপ্রভা প্রাণের উদ্বিগ্নে পতির উদ্দেশে বেশার দ্বারে উপস্থিত হইয়াছিলেন, সহচরীগণের সহিত মিলিত হইয়া কুমারকে সংসারী করাই তাঁহার একমাত্র লক্ষ্য ছিল, প্রথম দিনের কার্য শেষ হইয়া গিয়াছে, তাহাতে ভাল মন্দ সবিশেষ কিছুই বোঝা যায় নাই ।

উভয়ের সহিত উভয়ের আদৌ দেখা সাক্ষাৎ নাই, ক্ষণ-কালের জন্য তিনি যে অবগুণ্ঠনের অন্তরাল হইতে স্বামীমুখ দর্শন করিয়াছেন, তাহাতেই তাঁহার হৃদয় আনন্দরসে আপ্নত হইয়াছে । ছদ্ম বিক্রয়ের অছিলায় তিনি কুমারের নিকট উপস্থিত হইয়াছিলেন, নীরেন্দ্রনাথ সমস্ত ছদ্ম ক্রয় করিয়া তাঁহান্ন সম্মান রাখিয়াছেন, মূল্য সম্বন্ধেও কোন কথাস্তর হয় নাই, কার্যের সূত্রপাতে হেমপ্রভা যে লক্ষণ দেখিয়াছেন, হয়ত সময়ে তাঁহার মনোভিলাষ পূর্ণ হইতে পারে । যতক্ষণ না তিনি বিশালাক্ষীকে কুমারের নয়নশূল করিতে পারিতেছেন, ততক্ষণ তাঁহার অভিপ্রায় সিদ্ধ হইতেছে না, এজন্য তিনি মনের ভাব মনেই রাখিয়াছেন । প্রথম দিনে তেমন কথাবার্তা কিছুই হয় নাই, যাহা দুই একটি হইয়াছে, তাহাও বাবদায় সম্বন্ধে, এ কথার উপর ভিত্তি সংস্থাপন করিয়া আশ্বস্ত হইতে হেমপ্রভা এখনও ইতস্ততঃ করিতেছেন ।

আজ দ্বিতীয় দিন, হেমপ্রভা গোপবানাগণকে স্বতন্ত্র বেশভূষায় সাজাইয়াছেন । পূর্বদিবস যে যে ভাবে সজ্জিতা হইয়াছিল, আজ তাহাদের আর সে পোষাক নাই, সকলেই নূতন সাজে সাজিয়াছে, সকলেরই কক্ষে পূর্বদিনের মত ছদ্মপূর্ণ রৌপ্য কলস, সকলেই পূর্ব দিবসের মত সম্বরে গান গাইতে গাইতে চলিয়াছে, পূর্ব দিনও

যে পথে বাইয়াছিল, আজও সেই পথে চলিয়াছে । বিশালাক্ষীর গৃহে নীরেন্দ্রনাথের সহিত সাক্ষাৎ তাহাদের উদ্দেশ্য, সেই অভি-প্রায়েই তাহারা সেই বারাননার বাটীর অভিমুখে বাইতেছে, সকলেই সমস্বরে গীত গাহিতেছে :—

কি জানি পারি কি হারি !

আকুল প্রাণে ব্যাকুল হয়ে বেড়াই পথে গোপনারী ।

মনের কথা বলি কা'কে, ব্যথার ব্যথী আছে বা কে,

একথাও যাকে তাকে, সরমে যে বলতে নারি ।

কলিতে এ কি কারখানা, বিচারেও কি নাইরে মানা,

আসল নকল যায় না জানা, ভেজাল তোরে বলি হারি ।

মুড়ি মিছরি দরে সমান, মানীর যে আর থাকে না মান,

চাইত উহার উচিত বিধান, দেখি তায় কি করতে পারি ।

আজও বিশালাক্ষীর গৃহে কুমার আমোদে মত্ত রহিয়াছেন, পূর্ব পরিচিত বামাকর্ষ ধ্বনি তাঁহার কর্ণকুহরে প্রবিষ্ট হইবা মাত্র তিনি ব্যগ্রভাবে তাহাদিগকে আপনার নিকট ডাকাইয়া পাঠাইলেন । নীরেন্দ্রনাথ নারীস্বরে মোহিত হইয়াছেন, বিশালাক্ষী তাহা বুঝিতে পারিয়াছিল, কিন্তু অদ্যকার ব্যাপার সম্যক্রূপে দেখিতে ইচ্ছা করিয়া রননৈ তাঁহার কথায় কোন আপত্তি করিল না ।

এদিকে রমণীগণ একে একে সকলেই কুমারের সন্নিকটে উপস্থিত হইল । নীরেন্দ্রনাথ তাহাদিগকে দেখিয়াই জিজ্ঞাসা করিলেন, “কাল তোমরাই দুধ বেচিতে আসিয়াছিলে না, আবার কি ?”

“মহাশয় : আমাদের কাজই এই । আমরা গম্ভীর নেয়ে, দুধ বেচেই জীবন ধারণ করি । আপনার যদি দুধের আবশ্যক থাকে—বলুন, দুধ দিয়া চলিয়া যাই ।”

“ছুধের আবশ্যক আছে বলিয়াই তোমাদিগকে ডাকাইয়াছি, ছুধও লইব, কিন্তু আজ তোমরা যে গান গাইতেছিলে, তাহাও ছুধের গান নয় !

“মহাশয় ! সব দিন কি সমান যায়, যে দিন যেমন সে দিন তেমন । আপনি যদি গান শুনিয়া থাকেন, তাহা হইলে ছুধের গানই শুনিয়াছেন । আমাদের ছুধ ছাড়া আর কি আছে ? তবে দিনে দিনে বাজার মন্দা পড়িতেছে, আসল নকলের ভেদাভেদ আর কেহই দেখেন না, জিনিস হলেই হ’ল, কোন্ জিনিসের কেমন তার, তাহার পরীক্ষা করে কয় জন ?”

আমি কাল তোমাদের ছুধ খাইয়া দেপিয়াছি, তারে মিষ্ট বটে ; কিন্তু তা ব’লে এ জিনিস আর কোথাও পাওয়া যায় না, এ কথা আমি বলিতে পারি না ।”

“মহাশয় ! আমাদেরও সেট কণা, জিনিস পাবেন না কেন ? হাতে বাজারের যেখানে যেমন খুঁজবেন, তেমন পাবেন, তা ব’লে কি আসল জিনিস যেখানে সেখানে পাওয়া যায় ?”

কুমারের সহিত গোপনারীগণের এইরূপ কথাবার্তা হইতেছে, তিনি তাহাদের সহিত আমোদ প্রমোদ করিতেছেন, এ দৃশ্য বিশালাক্ষীর নয়নশূল হইয়া উঠিল । রমণী একবার নীরেজনাথের প্রতি, অন্তর্য গোপনারীগণের দিকে কটাক্ষপাত করিল । অবগুণ্ঠনবতী হেমপ্রভা গোপনারীগণের সঙ্গেই আছেন, কিন্তু তাঁহার মুখ হইতে একটি কথাও নিঃসৃত হইতেছে না, তথাচ পিশাচিনীর প্রতি যুবতীর একমাত্র লক্ষ্য রহিয়াছে । তিনি মনে মনে বুঝিয়াছেন, কুমারের সহিত তাঁহার সঙ্গিনীগণের এরূপ কথাবার্তায় কুহকিনী বিরক্ত হইয়াছে । কোন উপায়ে পিশাচিনীর

মারাচক্র হইতে প্রাণেশ্বরকে উদ্ধার করিবেন, পতিব্রতা এই কার্য জীবনের সারব্রত ভাবিয়া আজ বারাননা গৃহে উপস্থিত হইয়াছেন ; পানীয়সীর অন্ন ভঞ্জেতে তাঁহার সর্ব শরীর কল্পিত হইতেছে। তথাচ সরমভরে হৃদয়ের উদ্বেগ হৃদয়েই চাপিয়া রাখিয়া, মহা-যজ্ঞের আহতির অপেক্ষায় আছেন। সাধবীর উদ্দেশ্য সিদ্ধ হইতে বুঝি আর অধিক কাল বিলম্ব হইবে না। এদিকে বিশালাক্ষী কথায় কথায় তাঁহার সঙ্গিনীগণের সহিত বচসা আরম্ভ করিল। গোয়ালিনীগণকে নীরেজনাথ স্বয়ং তথায় আশ্বাস করিয়াছিলেন ; তৎসময়ে বিশালাক্ষী তাহাদিগকে অবমানসূচক বাক্য প্রয়োগ করায় তিনি এককালে অগ্নিশর্মা হইয়া উঠিলেন ; এবং তাহাদের পক্ষসমর্থন করিয়া সদর্পে উত্তর করিলেন, “উহারা আমার কথায় এখানে আসিয়াছে, উহাদিগকে কোন কথা বলিবার তোমার অধিকার নাই। আমার বিষয় আমি নষ্ট করি বা রাখি, তাহা তোমার মত সাপেক্ষ নহে। তুমি তোমার প্রাপ্যের প্রতি দৃষ্টি রাখিবে, ইহা ছাড়া কোন বিষয়ে কোন কথা কহিবার তোমার অধিকার নাই।”

প্রেমিকের মুখে বিশালাক্ষী এরূপ অবজ্ঞাসূচক বাক্য শুনিয়া মর্শ্বাহত হইল। পিশাচিনী জানিত, কুমার মোহের কুহকে মুগ্ধ হইয়াই তাহাকে আপনায় ভাবিয়া আদর বহু করিয়া থাকেন ; এক্ষণে নীরেজনাথের মুখে যেরূপ কথাবার্তা শুনিল, তাহাতে যেন উহার চৈতন্য সঞ্চার হইল ; সে আর কোন বিক্রম না করিয়া স্মিষ্ট বচনে কুমারকে সাধনা করিতে লাগিল।

রাজপুত্র কতকটা প্রকৃতিস্থ হইয়া গোপনারীগণের প্রার্থনা মত মৃত্যু দিয়া সমস্ত হুগ্ন লইলেন এবং পর দিবস তাহাদিগকে

তথায় উপস্থিত হইবার জন্ত আকিঞ্চন করিলেন । নীরেজনাথের অহুরোধে এক রমণী উত্তর করিল, “মহাশয় ! আপনি আমাদের প্রতি যথেষ্ট শিষ্টভাব দেখাইয়া থাকেন, কিন্তু কর্তী ঠাকুরাণী আমাদের প্রতি বড়ই অসন্তুষ্টা । আমরা প্রাণের দায়ে আপনার নিকট আসিয়া থাকি ; দুই একটা কথায় আমাদের মন বিচলিত হইলেও তাহা দোষ বলিয়া গ্রহণ করি না, কিন্তু আমাদের জন্ত আপনি গৃহিণীর অপ্রিয় হইবেন, আমাদের এরূপ ইচ্ছা নহে ।”

“আমি তোমাদের সহিত আলাপে বিশেষ আনন্দিত হইয়াছি । তোমাদের আসিবার যদি কোন অসুবিধা না হয়, তাহা হইলে এখানে প্রতিদিন আসিও, তোমাদের প্রতি যাহাতে কোন প্রকার অসদ্ব্যবহার না হয়, সে দিকে আমি নিজে দৃষ্টি রাখিব । তোমাদের কোন ভয় নাই বা ভয়ের কারণও দেখি না । আমার কথা অমান্য করিতে পারে, এখানে এমন কাহাকেও দেখিতে পাই না ।”

“যদি আপনি আমাদেরকে এতই সাহস দিতেছেন, তাহা হইলে আমাদের সঙ্গে সঙ্গে আসিয়া কতকটা দাঁড়াইয়া যান । হাজার হউক, আমরা স্ত্রীলোক ; আমাদের লজ্জা সরমের ভয় ত আছে ; বিশেষ দায়ে পড়িয়াই এ কাজ করিতেছি । নতুবা এত রাত্রি পর্য্যন্ত কি বাহিরে থাকিতে পারি ?”

“দেখিতেছি শুধু ছপ বেচাই তোমাদের উদ্দেশ্য নহে । আমার মনে হইতেছে, তোমাদের যেন অণু কোন অভিসন্ধি আছে ; কিন্তু আমাকে তোমরা তাহা প্রকাশ করিতেছ না । যদি বলিতে কোন নিষেধ না থাকে, তাহা হইলে স্বচ্ছন্দে বলিতে পার ।”

“মহাশয় ! আপনি যখন কাল আসিবার কথা বলিয়াছেন, আমরা অবশ্য আসিব । আজ রাত্রি অধিক হইয়াছে, আমরা

বাড়ী যাই । আমরা গৃহস্থের বধু, কুলনারী ; সে সকল পরিচয় সময়ে জানিতে পারিৱেন । এখন বিদায় দিন ।”

রাজকুগার তাহাদের কথায় আর দ্বিক্রু কৱিলেন না, কেবল মাত্র আগামী কল্য দেখা সাক্ষাতের জন্ত পুনঃ পুনঃ অনুরোধ কৱিতে লাগিলেন এবং তাহাদের সঙ্গে সঙ্গে বিশালাক্ষীর বাটীর নিয়তল অবধি আসিলেন । গোপনারীগণ বিশালাক্ষীর বাটী হইতে কিছু দূর চলিয়া গেল, নীৱেন্দ্রনাথ যতদূর দেখিতে পাওয়া যায়, অনিনেষ নেত্রে তাহাদের প্রতি একদৃষ্টিতে চাহিয়া ৱহিলেন ।

অশুকার কথায় বার্তায় রাজকুগারের হৃদয় সগদিক বিচলিত হইল । তিনি গোপনারীগণের মুখে বিশেষ বৃত্তান্ত অবগত হইবার জন্ত অত্যন্ত উৎসুক ও কৌতূহলী ৱহিলেন । এদিকে মায়াবিনী বিশালাক্ষী কুমাৱের মনহরণে যগাসাধা চেষ্টা পাইতে লাগিল ।

(১২)

সেতারের তার একশূৱে বাঁধা থাকিয়া মধুৱনিনাদে লোকের চিত্তরঞ্জন কৱে, কিন্তু তাহার একটীৱ বন্ধন উন্মুক্ত হইলে আর সে স্মৃষ্টিশূৱ পাওয়া যায় না । নীৱেন্দ্রনাথ বিশালাক্ষীর প্ৰেমে এতই উন্মত্ত হইয়াছিলেৱ যে, তাঁহার সংসার ধর্মের প্রতি অনুরাগ দিনে দিনে লোপ পাইয়াছিল, তিনি প্ৰেমনয়ীকেই জীবনসৰ্বস্ব বলিয়া জানিয়াছিলেৱ, পিশাচিনীৱ ক্ৰীড়ার পুত্তলি হইয়াছিলেৱ, সংসারের সুখ দুঃখের প্রতি তাঁহার আদৌ লক্ষ্য ছিল না ; তিনি একমনে সেই কুহকিনীকেই হৃদয়ের অধিষ্ঠাত্রী দেবীভাবে ভজিয়া-ছিলেৱ, তাহার কথায় নীৱেন্দ্রনাথের জীবন মরণ নির্ভর কৱিতে ছিল । গোপকন্ঠাগণের সহিত বিশালাক্ষীৱ কথাস্তর হওয়য় কুমাৱের

চিত্ত-বৈলক্ষণ্য হইয়াছিল ; তিনি মনে মনে ভাবিলেন, সকল বিষয়েই বিশালাক্ষী আপনার প্রভু দেখাইতে চেষ্টা পাইয়া থাকে, কিন্তু প্রকৃত পক্ষে সে কলুষিত চরিত্র বারামনা ব্যতীত আর কিছুই নহে । কালক্রমে তাহার প্রতি আমার আসক্তি প্রকাশেই পিশাচিনীর এতদূর স্পর্ধা হইয়াছে । আজ আমার সমক্ষে গোপনারীগণের অবমাননা করিল, হয় ত সময়ে অন্তের সমক্ষে আমাকে অবমান করিতে পারে । হীন প্রকৃতি নারীর অসাধ্য কার্য কিছুই নাই । সে আমার বলে বলী হইয়া হয়ত একদিন আমাকেই ঘৃণার চক্ষে দেখিবে ! আমি মোহে অন্ধ হইয়া তাহার প্রতি জীবন উৎসর্গ করিয়াছিলাম, পিতা মাতা সহধর্মিণী আত্মীয় স্বজন কাহারও মুখের প্রতি একবার তাকাইয়াও দেখি নাই, আমি কুহকিনীকে লইয়াই সংসার সাধ মিটাইতেছিলাম ; ছি ! ছি ! আমি কি নির্বোধ ! আমার মত কাপুরুষ আর জগতে নাই, নতুবা রাজপুত্র হইয়া বেষ্টার দাস, এই হীনভাবে আমার দিনাতিপাত হইতেছিল ! আমার জীবনে ধিক ! আর এক কথা, এই যে গোপনারীগণ আমার নিকট যাতায়াত করিতেছে, তাহাদের কিছু গোপনীয় কথা হয়ত ব্যক্ত করিবার আছে, কিন্তু বেশ বুঝিতে পারিয়াছি, তাহারা এই পিশাচিনীর ভয়েই কোন কথা প্রকাশ করিতে সাহস করে নাই । যাহা হইবার তাহাই হইবে, আর আমি মারাবিনীর মোহে মুগ্ধ হইয়া অন্ধ থাকিব না । কুহকিনী আমার সর্বনাশ করিতে উদ্যোগী হইয়াছে, তাহাকে আপনার ভাবিয়া আত্ম সমর্পণ করিয়াছিলাম, সেই নির্বুদ্ধিতার জন্য আমাকে এই পরিতাপ সহ্য করিতে হইতেছে । আজ বিশালাক্ষীর সমক্ষেই আমি গোপনারীদিগকে সমধিক আদর যত্ন করিব, কালশাপিনী

আমার অন্তে প্রতিপালিত হইয়া আমারই অনিষ্ট করিবে, এ কার্য কখনই হইতে দিব না। আমি তাহার ভালবাসায় মোহিত হইয়াছিলাম, তাহাতে কাপুরুষের পরিচয় মাত্র প্রকাশ পাইয়াছে ! নীরেঙ্গনাথ এইরূপ বহুক্ষণ বিবিধ চিন্তায় নিমগ্ন থাকিয়া আপনার বর্তমান অবস্থা সবিশেষ বুঝিতে পারিলেন, বিশালাক্ষীর প্রতি তাঁহার স্নেহ মমতা হৃদয় হইতে দূর হইয়া গেল, কুহকিনীর আর মুখ দেখিবেন না মনে মনে সঙ্কল্প করিলেন।

এ দিকে বিশালাক্ষীর ব্যবহারে কুমার যে বিরক্ত হইয়াছিলেন, পিশাচিনী তাহা সম্যক্ রূপেই বুঝিতে পারিয়াছিল। এত দিন কুমারকে লইয়া সুখ-স্বচ্ছন্দে তাহার দিন কাটিতেছিল, কোন বিপ্লব বাধা উপস্থিত হয় নাই, সহসা কোথা হইতে গোপনারীগণ আসিয়া তাহার প্রণয়ের পথে কণ্টক হইল, সংশয় উপস্থিত করিল। গত-রাত্রে যেরূপ ব্যাপার ঘটিয়াছিল, তদুপায় সেই দণ্ডেই কুমারের নিকট তাহাকে যথেষ্ট অবগান ভোগ করিতে হইত, কুহকিনী অনেক কৌশলে কুমারকে সম্বুধি করিয়াছিল, কিন্তু নীরেঙ্গনাথ পার্শ্বীয়সীর প্রতি বাহু বিরক্তিতাব প্রকাশ না করিলেও মনে মনে যে, সান্ত্বনয় অসম্বুধি হইয়াছিলেন, তাহা তাহার অবিদিত রহিল না। পূর্বে রাত্রির মত আজও কুমার গোয়ালিনীদিগকে তথায় আসিবার জন্য আকিঞ্চন করিয়াছেন, তাহাদের আগমনে প্রণয়িনীর দ্বাধাতে মনকণ্টে না উপস্থিত হয়, তৎপ্রতি কুমারের আদৌ লক্ষ্য হয় নাই, প্রেমিকার মনোরঞ্জে তিনি উপেক্ষা করিয়াছেন। কুমারকে বিপথগামী করিয়া বিশালাক্ষী দশ টাকার সংস্থান করিয়াছে, এক্ষণে নীরেঙ্গনাথের সহিত মনান্তর হইলে পার্শ্বীয়সী সুখ-স্বচ্ছন্দে জীবনযাত্রা নির্বাহ করিতে পারে, কিন্তু কুমারের বীতানুরাগী হইয়া তাহার

এখানে নিশ্চিন্তে বাস করা এককালে অসম্ভব ; তাহাতে কুমার রাজ্যের হর্তাকর্তা বিধাতা, তিনি যে তাহাকে বিনাদণ্ডে মুক্তি-প্রদান করিবেন, কদাচ এরূপ হইতে পারে না । পিশাচিনী আপনার অবস্থা যতই ভাবিতে লাগিল, উত্তরোত্তর ততই তাহার আশঙ্কা উপস্থিত হইল ।

এ দিকে হেমপ্রভা প্রতিদিনই গোপনারীগণের সহিত পতির সাক্ষাৎ উদ্দেশে বিশালাক্ষীর বাটী বাতায়ত করিতেছেন, সাধ্বী-সতী স্বামীর মঙ্গল কামনায় একমনে উদ্দেশ্য সাধনে সর্বতা হইয়াছেন, বিপথগামী পতিকে সংসারী করিতে পারিলেই তাঁহার মনস্কামনা পূর্ণ হইবে, নতুবা মন্থীকুমারীর এত আয়াস এত যত্ন সকলই বিফল হইবে । পূর্বরাত্রিতে বিশালাক্ষীর গৃহে কুমারের যে ভাব সতী স্বচক্ষে দেখিয়াছেন, তাহাতে সন্ময়ে তাঁহার হৃদয়ের আশালতা ফলবতী হইতে পারে ভাবিয়া, তিনি অনেকটা আশ্বাসিত হইয়াছেন । গোপবানীগণ হেমপ্রভাকে উদ্দেশ্যসিকির আর বিলম্ব নাই বলিয়া আশ্বাসিত করিতেছে, তিনি তাহাদের প্রবোধ বচনে আশ্বস্ত হইয়াছেন ।

বিশালাক্ষী অল্প দিনের মত বেশ ভূষার সজ্জিতা, কিন্তু বিবম চিন্তায় তাহার হৃদয় ব্যথিত ; বাহ্য লক্ষণে চিত্তবিকারের পরিচয় প্রকাশ না হইলেও সে যে মনকষ্ট ভোগ করিতেছে, তাহা সহজে বুঝিতে পারা যায় । সন্ধ্যার দীপালোকে গৃহের অন্ধকার দূর হইয়াছে, বিশালাক্ষী ক্ষুণ্ণ মনে কুমারের আগমন প্রতীক্ষায় বসিয়া আছে, কুহকিনী হাব ভাবে নীরেন্দ্রনাথের মন মোহিত করিতে এখনও যত্ন পাঠিতেছে, এমন সময়ে নীরেন্দ্রনাথ আসিয়া দেখা দিলেন । পৃথিবীসী কুমারকে আদর যত্নে অভ্যর্থনা করিতে সবত্ন

হঠাৎ নীরেজনাথের অমুরাগ লাভে বঞ্চিত হইল । অভাগিনী বুঝিল যে, তাহার কপাল ভাঙিয়াছে, তথাচ কুগারের চিত্তবিনোদনে কোন অংশে ক্রটি করিল না । নীরেজনাথের মূর্তি আজ প্রশান্ত, বিশালাক্ষীর কথায় অল্প দিন কুমার এককালে মোহিত হইয়া যান, আজ প্রণয়িনীর সাধ্য সাধানায় তাঁহার সে ভাব লক্ষিত হইতেছে না, তবে নিতান্ত প্রয়োজনীয় বিষয়ে তিনি দুই একটা কথায় উত্তর দিয়া নিশ্চিত হইতেছেন ।

বিশালাক্ষীর সহিত কুমার এইভাবে কালক্ষেপ করিতেছেন, এমন সময়ে গোপনারীগণের কর্ণস্বর শুনিতে পাইলেন ; তিনি সঙ্গীতধ্বনি শ্রবণেই সাতিশয় উৎকণ্ঠিত হইলেন এবং তাহাদের আগমন প্রতীক্ষায় স্বয়ং গবাক্ষ সঙ্গীতে দাঁড়াইয়া রহিলেন । এভাবে তাঁহাকে অধিকক্ষণ অপেক্ষা করিতে হইল না । অবিলম্বে গোপনারীগণ গীত গাইতে গাইতে তথায় আসিল ;—

আশাব গাছে ফুল ফুটেছে আমোদের আর সীমা নাহি ।

মনের মানুষ পাইবা খুঁজে—হৃদয় মাঝে জাগছে তাই ।

স্ববাদ প্রাণে প্রবোধ দিতে, আপন জনে খুঁজে নিতে,

এসেছি য কাঙ্গ দারিতে, বজায় করে ধরকে যাউ ।

পতির সোহাগ চায় যে নতী, রাজপথে ভাব এ দুর্গতি,

হুঃহৃদয় নারীর প্রতি বারেক যেন দেখা পাই ।

আকুল প্রাণের এ নিশানা, মানে না সে কোন মানা,

এ প্রেমে যে দেয় গো হানা, তার মুখেতে পড়ুক ছাই ।

পূর্ব রাত্রির গীতেই কুমার গোপবালাগণের প্রতি কথঞ্চিৎ অমুরাগ প্রকাশ করিয়াছিলেন, এক্ষণে তাহাদের সুগধুর সঙ্গীতে তাঁহার প্রাণ অধিকতর আকুল হইয়া উঠিল, তিনি অল্প দিন তাহাদিগকে উপরে লইয়া আসিয়া কথা বার্তা কহেন, বিশালাক্ষীর

সহিত তাঁহার মনান্তর হইয়াছে, তাহাদিগকে উপরে আসিবার জন্ত অসুরোধ করিলে সে বিবাদের সমধিক বৃদ্ধি হইতে পারে, সে বাদ বিসম্বাদে কুমারের এখন আর ইচ্ছা নাই । তিনি বিশালাক্ষীর সহবাস নরক যন্ত্রণা জানে তদন্তে সে স্থান পরিত্যাগ করিলেন । বিশালাক্ষী নীরেজনাথের পশ্চাতে চলিল, কিন্তু নিমেষ মধ্যে কুমার সেই বেষ্ঠার বাটী পরিত্যাগ করিয়া চলিয়া গেলেন, কুহকিনী দ্বার দেশে দাঁড়াইয়া কুমারের প্রতি এক দৃষ্টে চাহিয়া রহিল, তথাচ নীরেজনাথ আর তাহার প্রতি তাকাইয়াও দেখিলেন না ।

গোপনারীগণ কুমারকে তাহাদের সম্মুখীন হইতে দেখিয়া সকলেই বিশেষ আনন্দ প্রকাশ করিল, কিন্তু রাজপথে প্রকাশ্য ভাবে আলাপ পরিচয় করিতে সকলেই যেন কুণ্ঠিত ভাব দেখাইল, নীরেজ রমণীগণের মনের ভাব জানিতে পারিয়া দ্বিভুক্তি না করিয়া তাহাদের পশ্চাতে চলিলেন । দেখিতে দেখিতে গোপনারীগণ একটা সুবৃহৎ অট্টালিকার সম্মুখে উপস্থিত হইল, কুমার তাহাদের সহিত কথাবার্তার জন্ত একান্ত উৎসুক ছিলেন, একে একে রমণীদল সেই বাটীর প্রবেশ দ্বারে উপস্থিত হইলে, তিনি আব অদয়াবেগ সম্বরণ করিতে পারিলেন না, ব্যাকুল চিত্তে জিজ্ঞাসা করিলেন “আগিও কি আপনাদের সঙ্গে যাইব ?”

কুমারের কথায় একজন গোপললনা প্রত্যুত্তর করিলেন, “না মহাশয় ! আমরা কুলনারী, বিশেষ দারে পড়িয়াই পথের বাহির হইয়াছিলাম, আমাদের সহিত দেখা সাক্ষাতে যদি আপনার ইচ্ছা থাকে, অনুগ্রহপূর্বক কল্যা আসিবেন । অকস্মাৎ পুরুষ মানুষকে গৃহে আনিলে আগাদিগকে লোকের নিকট নিন্দিত হইতে হইবে ।”

নী । আপনার কথায় আমার বিরক্তি করিবার সাধ্য নাই । জানি না, আপনারা কাহার অনুসন্ধান করিতে ছিলেন, তবে প্রকাশ, আপনারা কোন দায়গ্রস্ত হইয়াই একরূপ পথে বাহির হইয়াছিলেন, কিন্তু একরূপ কি বিপদ ঘটয়াছে, কিছুই বুঝিতে পারিলাম না ।

গো-না । মহাশয় ! যখন আমাদের সহিত আলাপ করিবার জন্য আপনি আকিঞ্চন করিতেছেন, তাহাতেই আমাদের মনস্কামনা পূর্ণ হইয়াছে । আজ এই পর্য্যন্তই থাক, কল্যা আসিবেন ; আমাদেরও সেই আকিঞ্চন ।

নীরেক্রনাথ গোপনারীর কথায় কথঞ্চিৎ সন্দিগ্ন হইলেন ; তাহাদের সহিত তাঁহার আলাপ পরিচয় নাই, তিন বার মাত্র সন্ধ্যার পর দেখা সাক্ষাৎ হইয়াছে । যখন তাহারাই তাঁহাকে গৃহে প্রবেশ করিতে নিষেধ করিল, তিনি স্বেচ্ছায় তাহাদের বাটী প্রবেশে সাহসী হইলেন না, কিন্তু এ রহস্যের অন্তর্ভেদ জন্ম তিনি বিশেষ উদ্দিগ্ন চিত্তে গৃহাভিমুখে চলিয়া গেলেন । গোপনারীগণ এতক্ষণ দ্বারদেশে কুমারের জন্য অপেক্ষা করিতে ছিল, এক্ষণে গৃহে প্রবেশ করিল ।

(২০)

মন্ত্রীকুমারী হেমপ্রভা প্রাণকান্তের সাক্ষাৎ উদ্দেশে এতাবৎকাল উৎকণ্ঠিত চিত্তে যাপন করিতে ছিলেন, এক্ষণে বিশালাক্ষীর সহিত কুমারের আর সে সম্ভাব নাই । পিশাচিনীর প্রকৃত পরিচয় তিনি অবগত হইয়াছেন, তাঁহার প্রণয়ে সংশয় উপস্থিত হইয়াছে, বাহাকে আপনার জানিয়া আত্মসমর্পণ করিয়া ছিলেন, তাহার প্রতি সন্দেহ দাঁড়াইয়াছে, এ অবস্থায় স্বামীর

সহিত দেখা সাক্ষাতে কুমার পতিব্রতা অঙ্কলক্ষীকে স্নেহচক্ষে দৃষ্টিপাত করিবেন, প্রণয়সূত্রে আবদ্ধ হইবেন, তাহাতে আর তাঁহার সন্দেহ রহিল না ; তথাচ তিনি পতির প্রকৃত মনোভাব হৃদয়ঙ্গম করিবার জন্ত জর্নৈক বৃদ্ধাকে সহায় অবলম্বন করিলেন ।

অদ্য নীরেন্দ্রনাথ তাঁহাদের বাটীতে আসিয়া দেখা সাক্ষাৎ করিবেন, প্রকৃত পরিচয় স্বামী স্ত্রীর মনে মনে অবধারিত থাকিলেও উভয়ের সহিত উভয়ের আদৌ আলাপ পরিচয় নাই । লম্পট কুমার এতদিন বেগু প্রেমে উন্মত্ত হইয়া কাটাইয়াছেন, রাজপুত্র হইয়াও সামাজিক কাজ কর্মের প্রতি দৃষ্টিপাত করেন নাই, কুহকিনী বিশালাক্ষী তাঁহার হৃদয়ের একমাত্র অধিষ্ঠাত্রী দেবী হইয়াছিল । প্রেমিক প্রেমিকার কথা প্রসঙ্গে উভয়ের সহিত মনান্তর উপস্থিত হইয়াছে, বিশালাক্ষীর স্বার্থের প্রতি সম্পূর্ণ দৃষ্টি । কুমার তাহার প্রতি বিরূপ হইয়াছেন, সাধ্য সাধনায় তাঁহাকে ফিরাইবার জন্ত কুহকিনী কোন অংশেই ক্রটি করিবে না, উভয়ের সহিত দেখা সাক্ষাতের পূর্বেই যদি কুমার সহধর্মিণীর প্রতি অশুররক্ত হন, প্রিয়তমার পবিত্র প্রণয়ডোরে আবদ্ধ হন, তাহা হইলে বিশালাক্ষী আর নীরেন্দ্রনাথকে আয়ত্তাধীন করিতে পারিবে না ।

কুমার স্বেচ্ছায় গোপনারীগণের সহিত দেখা করিতে ইচ্ছা করিয়াছেন ; তাহারাকে, কি জন্যই বা তাহারাকে একরূপ ভাবে তাঁহার সহিত সহনা আলাপ করিল, এ সকল বিষয় জানিবার জন্য তিনি যখন একান্ত অধীর হইয়াছেন, বিশেষতঃ তাহাদের মনস্তষ্টির জন্য তাঁহার বিলাসিনী বিশালাক্ষীর সহিত মনান্তর উপস্থিত হইয়াছে, এ অবস্থায় যে পরম রূপবতী সর্বগুণসম্পন্ন

ভাৰ্য্যার প্রেমাকিঞ্চনে উপেক্ষা করিবেন, তাহা সম্পূর্ণ অসম্ভব । তাহাতে কুমার বিশালাক্ষীর প্রেমে মুগ্ধ হইয়াই আত্মীয় স্বজন সকলের প্রতি বীতানুরাগী হইয়াছেন, বৃদ্ধ পিতার জীবনান্তে তিনিই অতুল ঐশ্বৰ্য্যের একমাত্র অধীশ্বর হইবেন, প্রজাবর্গের শাসন পালন সকল তার তাঁহার উপরেই ন্যস্ত হইবে, এ সকল বিষয় আদৌ চিন্তা করিয়া দেখেন নাই । পত্নীর সহিত তাঁহার মনো-মিলন হইলে তিনি সংসার ধর্ম্ম সকল দিক বজায় রাখিয়া সুখ স্বচ্ছন্দে দিন যাপন করিতে পারিবেন ।

পতি পত্নী উভয়ের একত্র মিলিত হইবার শুভক্ষণ উপস্থিত হইয়াছে হেমপ্রভা এক্ষণে পূর্ণ যুবতী, কিন্তু দৈব দুর্বিপাকে পতি-প্রেমে বঞ্চিত হইয়া মনের কষ্টে দিনাতিপাত করিতেছেন । স্বামী যদি তাঁহার প্রতি কৃপাদৃষ্টি করেন, তাহা হইলে তিনি জীবন সার্থক করিবেন, নিনেঘে তাঁহার সকল দুঃখ নুতিয়া যাইবে । তিনি প্রাণনাথের আগমন প্রতীক্ষায় নব সাজে সজ্জিতা হইয়াছেন । গোপনারীবৃন্দ এক্ষণে তাঁহার প্রিয়সহচরী, তিনি তাহাদের সহায়েই বিপদগামী পতিকে উদ্ধার করিয়া সংসারী করিবার জন্য উদ্যোগী হইয়াছেন । মন্ত্রীকুনারীর সন্তিত তাহারাও সূচাক বেশ ভূষায় সুশোভিতা হইয়াছে, সকলেই কুমারের দর্শন আশায় উৎফুল্ল নেত্রে অপেক্ষা করিতেছে ।

রাজপ্রাসাদে হেমপ্রভা গোপনারীগণকে লইয়া কয়েক দিবস অতিবাহিত করিতেছেন । যে যে জিনিসে গৃহ সজ্জিত হইতে পারে, তথায় তাহার কোন বস্তুরই অভাব নাই । সন্ধ্যার সমাগমেই দীপালোকে গৃহ গুলি আলোকিত হইয়াছে । যে গৃহে হেমপ্রভা স্বামীর সহিত দেখা করিবেন, অন্যান্য গৃহীপেক্ষা সেটা

অধিকতর সাজ সজ্জায় সজ্জিত হইয়াছে । মন্ত্রীকুমারী যে বৃদ্ধার সহায়ে এই যজ্ঞ সম্পন্ন করিতে মনস্থ করিয়াছেন, ইতিপূর্বেই তাহার নিকট আপনার ও কুমারের আদ্যোপান্ত বিবরণ বিবৃত করিয়াছেন । কুমার আসন গ্রহণ করিলে বৃদ্ধা উপকথাচ্ছলে সেই আধ্যাত্মিক উল্লেখ করিবেন, এইরূপ বন্দোবস্ত করা হইয়াছে ।

এদিকে কুমার অন্য দিন যে সময়ে বিশালাক্ষীর বাটীতে আসিয়া থাকেন, আজ তাহার পূর্বেই তিনি বাটী হইতে বাহির হইয়াছেন, কি এক অভূতপূর্ব রহস্যে তাঁহার হৃদয় যেন উদ্বেলিত হইতেছে ; তিনি যতক্ষণ না গোপনারীগণের সহিত প্রকাশভাবে কথাবার্তা কহিতেছেন, ততক্ষণ তাঁহার অস্থির হৃদয় কিছুতেই শান্তি লাভ করিতেছে না । কুমার সন্ধ্যার অনতিবিলম্বেই গোপনারীগণের কথামত সেই বাটীর সম্মুখে আসিয়া উপস্থিত হইলেন ; তাহাদের ছুই একজন তাঁহার আগমন প্রতীক্ষায় দ্বারদেশে অপেক্ষা করিতেছিল, কুমার সম্মুখীন হইবামাত্র তাহারা সাদরে সম্মুখে তাঁহাকে বাটীর ভিতর লইয়া গেল ।

একটি সুসজ্জিত সুবিস্তৃত গৃহে নীরেন্দ্রনাথ আসন পরিগ্রহ করিলে, গোপনারীগণ তাঁহার সম্মুখীন হইল ; তিনি তাহাদের সহিত কথাবার্তার তৃপ্তিলাভ করিলেন । তথায় এক অপূর্ব কাণ্ডি দিব্য-লাবণ্য যুবতীর প্রতি তাঁহার লক্ষ্য আকৃষ্ট হইল । অত্র তিন দিবস বিশালাক্ষীর বাটীতে গোপনারীগণের সহিত তাঁহার সাক্ষাৎ হইয়াছে, কিন্তু এরূপ ভাবে তাহাদের সহিত মিলিত হইবার তাঁহার এই প্রথম সুযোগ ! কুমার সকলের সহিত আলাপ পরিচয় করিলেন, কিন্তু যে রমণীর প্রতি তাঁহার অমুরাগ সঞ্চার হইল, যাহার রূপমাগরে ডুবিয়া তিনি আশ্রয় হইলেন, তাঁহার সহিত

কথোপনের বিশেষ সুবিধা পাইলেন না, অধিকন্তু অন্যান্য কামিনীগণ যে ভাবে মিলিত হইল, সে যুবতীর হাবভাবে সে ভাব কিছুমাত্র লক্ষিত হইল না । আলাপ পরিচয়ে কুমার সকলকেই দেখিলেন, সকলেরই সহিত তাঁহার কথোপকথন হইল, কিন্তু যাহাকে দেখিবার জন্য তিনি উৎসুক হইয়াছেন, তাঁহার দর্শন পাইয়াও রাজপুত্রের মনসাধ পূরিল না ; যুবতীর প্রতি যতই সতৃষ্ণ নয়নে চাহেন, ততই তাঁহার সহিত মিলিত হইবার জন্য কুমার অধীর হইতে লাগিলেন ; অথচ পরনারীর মুখের প্রতি একদৃষ্টিতে সে ভাবে চাহিয়া থাকিতে ভদ্রোচিত লজ্জায় তাঁহাকে কথঞ্চিৎ অপ্রস্তুত করিল । রমণী অবগুণ্ঠনবতী, কিন্তু যুবতীর অলৌকিক রূপ লাভণ্য মেন পরিধেয় বস্ত্র ভেদ করিয়া বিকীর্ণ হইতেছে । কুমার সতৃষ্ণ নয়নে যুবতীর প্রতি একবার চাহিয়া দেখেন, পরক্ষণে লজ্জায় মুখ ফিরাইয়া লন, একারণ তাঁহার হৃদয় পরিতৃপ্তি লাভ করিল না, তাহাতে রমণীর বদনমণ্ডল বস্ত্রাচ্ছাদিত থাকায় দর্শনস্থল উপভোগও তাঁহার সম্পূর্ণ হইল না ।

কুমার হেমপ্রভার প্রতি সচকিত দৃষ্টি নিক্ষেপ করিতেছেন বুঝিতে পারিয়া, এক গোপবাল্য তাঁহাকে পরিহাসপূর্ণক জিজ্ঞাসা করিল “মহাশয় ! দেখিতেছেন কি ?”

“রূপ ! প্রবৃত্তি বলে—দেখিয়া কাজ নাহি, নয়ন কিন্তু সে মানা মানে না, একবার দেখিয়া তাহার সাধ মিটে না, সে দিবানিশা অবিরত দেখিতে চায় ।”

“এ আপনার কেমন কথা ! মনের বাসনা আঁধিতে প্রকাশ ; আপনার যদি দেখিতে ইচ্ছা না থাকে, তাহা হইলে এদিকে নয়ন ফিরাইতেছেন কেন ?”

“ভদ্রে ! আমি তোমার কথায় হাব মানিলাম । তুমি আমার মনের কথা ঠিক বুঝিয়াছ । এখন জিজ্ঞাস্য—এই অবগুষ্ঠনবতী যুবতীটা কে ?”

“মহাশয় ! সবুরে মোওয়া ফলে, বাস্ত হইতেছেন কেন ? কিছুক্ষণ পরেই সবিশেষ জানিতে পারিবেন । আমাদের আর পরিচয় দিবার প্রয়োজন হইবে না ।”

“আপনাদের কথামত আমি আজ এখানে আসিয়াছি । পরিচয়ে জানিয়াছি—আপনারা কুলবালা, তবে আমাকে লইয়া একরূপ রঙ্গ করিতেছেন কেন ?”

“আপনি রসিক পুরুষ ! একটু রসিকতা না করিলে, আপনার মন বসিবে কি ?”

“আমায় মাজ্জনা করুন । আর পরিহাস করিবেন না । আমি আপনাদের প্রকৃত পরিচয় জানিবার জন্ত একান্ত উৎসুক হইয়াই এখানে আসিয়াছি ।”

এইরূপ আলাপ পরিচয়ে কিয়ৎক্ষণ কাটিয়া যাইলে, হেমপ্রভার ইঙ্গিতে বৃদ্ধা আখ্যায়িকাচ্ছলে কুমার সমীপে তদীর বৃত্তান্ত বর্ণনা করিল । বৃদ্ধার মুখে উপকথা শুনিয়া নীরেন্দ্রনাথ আত্মকাহিনী বিবৃত হইতেছে স্থির জানিয়া, প্রণয়িনীর সাক্ষাৎ জন্ত এককালে অধৈর্য হইয়া পড়িলেন । পতিব্রতা তাঁহার জন্ত এত কষ্ট ভোগ করিয়াছেন; রাজকণ্ঠা ও রাজকুলবধু হইয়া তাঁহাকে স্বামীর দর্শন আশায় বেগ্নাগৃহে উপস্থিত হইতে হইয়াছে জানিয়া, নীরেন্দ্রনাথ সহধর্মিণীর বিষয়ে যতই চিন্তা করিতে লাগিলেন, উত্তরোত্তর তাঁহার হৃদয় এককালে অধীর হইয়া উঠিল ; তিনি চিন্তনংগমে যথাশক্তি চেষ্টিত হইয়াও অবশেষে হনরাবেগ কিছুতেই

সম্বরণ করিতে পারিলেন না, বস্তার প্রবাহ মত তাঁহার চিভ উখলিয়া উঠিল। বৃদ্ধার গল্ল শেষ হইতে না হইতে কুমার সোৎসাহে উত্তর করিলেন, “আর না, আর না ! যথেষ্ট হইয়াছে, আমি নিতান্ত মূঢ়, তাই কাঞ্চন বিনিময়ে কাচের আদর করিয়াছিলাম ! প্রতিপ্রাণা স্বা-বীসতীর হৃদয়ে একরূপ কষ্ট দিয়াছি, আগার মত মহাপাতকী এ জগতে আর নাই। আমি যে কুহকিনী বেষ্ঠার প্রণয়ে মুগ্ধ হইয়া যথা সর্বস্ব নষ্ট করিতে বসিয়াছিলাম, আজ তাহার যথেষ্ট প্রতিফল পাইয়াছি, আমার জন্মই সোণার সংসার ছারখার হইবার উপক্রম হইয়াছিল। এখন আমার জ্ঞানচক্ষু উন্মীলিত হইয়াছে। পিশাচিনী বিশালাক্ষীই আমার প্রণয়পথের একমাত্র কণ্টক, আমি সেই মায়াবিনীর কুহকে পতিত হইয়াই আত্ম-বিসর্জনে উদ্যত হইয়াছিলাম, বিপথগামী এ হতভাগ্যের জন্মই আমার জীবনসর্বস্ব সংসারসঙ্গিনী স্বর্ণপ্রতিমা প্রিয়তমা হেমপ্রভার এই লাঞ্ছনা ! আমার জীবনে ধিক্ !”

কুমারকে এইরূপ আক্ষেপ করিতে দেখিয়া পতিপ্রাণা হেমপ্রভা সসন্ত্রনে স্বামীসকাশে উপস্থিত হইলেন, আনন্দাক্রান্তে রমণীর হৃদয়দেশ ভাসিয়া গেল ; তিনি স্নেহানল করযুগল দ্বারা পতির চরণদ্বয় ধারণ করিয়া বলিলেন, “কুমার ! প্রাণেশ্বর ! প্রভু ! ঘটনাচক্রে যাহা হঠবার হইয়া গিয়াছে, তাহার জন্ম পরিতাপের আর প্রয়োজন কি ? তুমি স্বামী, আমি স্ত্রী—দাসী ; পতি সহস্র দোষে দোষী হইলেও পত্নীর আদরের ও আরাধ্যের বস্তু। দাসীকে একরূপ অনুরোধ উপরোধ করিয়া নিরয়গামী করিবেন না। জগদীশ্বর যে আমাদের প্রতি কৃপাদৃষ্টি করিয়াছেন, আপনার যে স্মৃতি হইয়াছে, তাহাতেই আমরা চরিতার্থ হইয়াছি।”

নীরেন্দ্র । প্রিয়তমে ! আমি নরকের কীট, আমার পাপের প্রায়শ্চিত্ত নাই ! আমি ঘোর নারকী, তাই পতিপ্রাণা প্রেমসীর প্রাণে এই কষ্ট দিয়াছি । তুমি কি আমায় ক্ষমা করিবে ?

হেমপ্রভা । নাথ, প্রভু ! হৃদয়েশ্বর ! তুমিই আমার জীবন সর্বস্ব, আমি তোমার দাসী ; এরূপ অনুনয় বিনয়বাক্যে আমাকে কেন কলুষিত করিতেছেন ?

কুমারের আত্মকাহিনী প্রকাশমাত্রেই বৃদ্ধা ও অন্তান্ত রমণীগণ গৃহ হইতে নিজ্জান্ত হইয়াছিল, তথায় পতি পত্নী ভিন্ন আর কেহই ছিল না । এক্ষণে স্বামী ও স্ত্রী উভয়ে একত্র মিলিত হইয়া মনের আবেগে কত কথাই কহিতে লাগিলেন । বিবাহাবধি হেমপ্রভা স্বামী সুখসম্ভোগ করেন নাই, এক্ষণে পত্নিকে পাইয়া তিনি মনের সাধে কত কথাবর্তা কহিতে লাগিলেন, সে কথার আর বিরাম নাই । এক বিষয়ের কথাবর্তা শেষ হইতে না হইতে, অন্য কথার উত্থাপন হয়, বহুদিনের পর স্বামী স্ত্রী উভয়ের শুভ সম্মিলন । হেমপ্রভা এতদিন যে স্বামীর সহিত দেখা সাক্ষাৎ হয় নাই, পতিবিরোগ বিধুরা যুবতী মনের কষ্ট মনেই সম্বরণ করিতেছিলেন, আজ সতীর পক্ষে তাপিত হৃদয়ে শান্তির সঞ্চার হইয়াছে, মেঘে বিজলী খেলিয়াছে । যুবকযুবতী আনন্দ-সমুদ্রে ঝাঁপ দিয়াছে, হেমপ্রভার যত্নে বহুদিনের রোপিত আশালতা আজ মুঞ্জরিত হইয়াছে ! স্ত্রী-পুরুষের মনের সাধ, বন্ধন বিমুক্ত শ্রোতস্বতীর জ্বালায় আনন্দে উথলিয়া উঠিল ; আনন্দ উৎসবে গৃহ প্রতিধ্বনিত হইল ।

হেমপ্রভার সঙ্কল্প সিদ্ধ হইল, গোপনারীগণ কয়েক দিবস যথেষ্ট শ্রম করিয়াছিল ; এক্ষণে তাহাদের আনন্দেরও সীমা রহিল না ।

উপসংহার ।

পতনোন্মুখসংসার রক্ষা হইল । বিকৃতগতি নীরেঙ্গনাথ সহ-
ধর্ম্মীগৌসহ মিলিত হইয়া মনের সুখে দিনযাপন করিতে লাগিলেন ।
যে গোপনারীগণ হেমপ্রভার সহদেশে সহায়তা করিয়াছিল, তাহারা
সকলেই রাজমহিষীর নিকট আশাতীত পুরস্কার লাভ করিল ।
বৃদ্ধ ভূপতি পুত্রের মতি গতি দেখিয়া সংসারের প্রতি এককালে
বীতানুরাগ হইয়াছিলেন ; এক্ষণে কুললক্ষ্মীবধুমাতার বুদ্ধিকোশলে
হারানিধি পথভ্রান্ত কুমারকে পুনঃপ্রাপ্ত হইয়া আনন্দসাগরে ভাসি-
লেন । দিন দিন সংসারের প্রতি কুমারের অনুরাগ দর্শনে
রাজকীয় সমস্ত কার্যভার ভূপতি পুত্রের হস্তে ঞ্জিত করিয়া নিশ্চিত
হইলেন । হেমপ্রভার পিতা জামাতার জন্ত বিশেষ হুঃখিত ছিলেন,
এক্ষণে কুমার সংসারী হইয়াছেন, বিষয় কার্যে মন দিতেছেন,
সংসারের সকল দিকে তাঁহার দৃষ্টি রহিয়াছে দেখিয়া, তিনি সান্তি-
শয় প্রীত হইলেন । দিনে দিনে কুমারের সদনুষ্ঠানে রাজ্যের
শোভা সৌন্দর্যের বৃদ্ধি হইতে লাগিল । কোন বিষয়ে কাহারও
কোন অভিযোগ বা হুঃখ প্রকাশের কারণ রহিল না ।

নীরেঙ্গনাথ পতিপ্রাণা হেমপ্রভাকে প্রাণের সহিত ভাল-
বাসিতে লাগিলেন, পতিপত্নী উভয়েকই মনের সুখে দিনযাপিত
হইতে লাগিল । সপ্তৎসরের মধ্যেই প্রণয়ের নিদর্শন স্বরূপ
হেমপ্রভা পুত্ররত্ন প্রসব করিয়া খণ্ডর শাণ্ডী ও স্বামীর আনন্দ-
বর্ধন করিলেন । সংসারে উত্তরোত্তর শ্রীবৃদ্ধি দেখা দিল,
নির্ঝাণোন্মুখ দীপ পুনরায় প্রজ্বলিত হইয়া উঠিল ।

যে দিন কুমার বিশালাক্ষীর গৃহ হইতে বিদায় লইয়া আসিয়া-
ছিলেন, সেই দিনই কুহকিনী বুঝিয়া ছিল যে, তাহার আশা ভরসা

সকলেই শেষ হইয়া গিয়াছে, এক্ষণে পাপীয়সী প্রাণরক্ষার উপায়ানু-
সন্ধানের জন্ত চেষ্টা করিতে লাগিল ; কিন্তু নীরেজনাথ হেমপ্রভার
সহিত মিলিত হইয়াই সর্বাত্মে পাপীয়সীকে তাঁহার সম্মুখে উপস্থিত
হইবার জন্ত আদেশ পাঠাইলেন । বিশালাক্ষী তৎসমীপে নীত হইলে
কুমার তাহাকে যৎপরোনাস্তি তিরস্কার করিলেন । বিশালাক্ষীর
কুমন্ত্রণায় কুমার কুপথগামী হইয়াছিলেন, এক্ষণে নীরেজনাথের
আর সে মতিগতি নাই ! বিশালাক্ষী কুমারের কথায় কোন দ্বিভক্তি
করিল না, প্রতিমুহূর্তেই কৃত অপরাধ জন্য দণ্ডভোগের অপেক্ষা
করিতে লাগিল । পিশাচিনীকে এ অবস্থায় অধিকক্ষণ থাকিতে
হইল না, কুমারের আদেশমত প্রহরীগণ বিশালাক্ষীর কেশাকর্ষণ
পূর্বক তাহাকে তথা হইতে লইয়া গেল ।

বিশালাক্ষীর প্রতি কোন প্রকার দণ্ডবিধান হয় পতিপ্রাণা
সরলা হেমপ্রভার এক্রপ আদৌ ইচ্ছা ছিলনা, তিনি স্বামীকে
এপ্রকার নৃশংস কার্য হইতে নিবৃত্ত হইবার জন্ত পুনঃ পুনঃ অনুনয়
বিনয় করিতে লাগিলেন । নীরেজনাথ পিশাচিনীর ব্যবহারে
নিতান্ত বিরক্ত হইলেও প্রিয়তমার '...ষধ বাক্যে কোন রূপ দণ্ড
দানে কাস্ত রহিলেন ।

বারবিলাসিনীর প্ররোচনার সোণার সংসার নষ্ট হইবার উপ-
ক্রম হইয়াছিল, পাপীয়সীর নিগ্রহে শোভা সৌন্দর্যের বৃদ্ধির সহিত
স্বল্পদিনেই রাজ্যের পূর্বকীর্ত্তি সংরক্ষিত হইল । হেমপ্রভার
একপক্ষে পিত্রালয়, অন্য পক্ষে শশুরের বাটী সকলেই মনের সুখে
কালান্তিপাত করিতে লাগিলেন ।

—

সমাপ্ত ।

বিজ্ঞাপন ।

নিম্নলিখিত পুস্তকগুলি আমার নিকট প্রাপ্তব্য ।

ছায়া—সাহিত্যের কল্পিত, বঙ্গসংসারে জলন্ত আলোখা,
৪৬৮ পৃষ্ঠায় পূর্ণ, মূল্য ১।১০ ।

ছায়াপথ—(উপন্যাসে সনাতন ধর্ম প্রসঙ্গ) যদি সংসারে
নূতন জীবন্ত চিত্র দেখিতে চান, যদি মোহিত হইবার সাধ থাকে,
যদি শিথিলতার সংকল্প থাকে, যদি ভাবিবার অবসর থাকে, তবে
এই উপন্যাস পাঠ করুন । রয়েল, ৩০৬ পৃষ্ঠায় ১ম খণ্ড পূর্ণ,
মূল্য ১ ।

গীতিনাট্যবলী—(উষাহরণ, প্রণয়পাবিজাত, মায়াবতী,
সাগমনাবিজয়া, মেঘেতেবিজলা, কমলেকানিনী, হরবিলাপ,
বনিকছহিতা, নববাসর ও আশালতা এই দশ খানি গীতিনাট্য
একত্র মূল্য ১ ।

অপূর্ব কাহিনী—সুপ্রসিদ্ধ উদ্দ উপন্যাস ফ্যাশনা আজা-
এব অবলম্বনে বিরচিত অপূর্ব উপন্যাস, বঙ্গভাষায় অভিনব,
সাহিত্যানোদীর আদরের সামগ্রী মূল্য ১ ।

দরিদ্র রঞ্জন--সতী মঙ্গল, টাকার খেলা, ভৌতিককাহিনী,
কলির চং, গণিরছনালা, বিলাপ, মরণেজীবন, জীবনেমরণ, ইতি-
হাস, বৃকবামা, ছাত্রবন্ধু ও কৃষি বিজ্ঞান একত্র মূল্য ১।১০ ।

শ্রীগুরুদাস চট্টোপাধ্যায়,

বেঙ্গল মেডিক্যাল লাইব্রেরী,

২০১ নং কর্ণওয়ালিস ষ্ট্রিট, কলিকাতা ।

